

Ulutala o Lesona Ta'itasi

1. O Se Aposetolo a Iesu Keriso-----	4
2. O “Tagata Ese”-----	9
3. Fanau Usiusita’i a le Atua-----	13
4. O Le Upu a Le Atua-----	18
5. Ma’a Ola-----	24
6. Molimau Atu i le Lalolagi-----	28
7. O Se Olega i Tane ma Avā-----	33
8. O Uiga O Le Kerisiano-----	38
9. O Le Papatisoga E Mana’omia e Tagata Uma-----	44
10. Ola i se Olaga Fou-----	48
11. Alofa Naunau-----	53
12. O Se Olega i Ta’ita’i o Ekalesia-----	58
13. Ia Outou Fa’autauta, Ia Outou Mataala-----	63

O *Lesona Fa’ale-Tusi Paia o le Sapati*, o se polokalame su’esu’e lea o aso ta’itasi, o loo fa’avae atoa lava i le Tusi Paia ma le Agaga o Valoaga e aunoa ma ni manatu fa’aopoopo. O si’itaga ua fa’apupu’uina i le tulaga e mafai ai ina ia maua ai manatu manino ma le tu’usa’o. O puipui o loo fa’aaogaina i nisi o fa’amatalaga ina ia mautinoa ai le manino, malamalamaaga ma’oti o le manatu o loo talanoaina, ma faigofie ai ona faitau. E matuā fautuaina lava le su’esu’eina atili o tusi o loo aumaia ai la latou Lesona.

Aiā o meatotino © 2024 e le Matagaluega o le A’oga o le Sapati a le Seventh Day Adventist Reform Movement General Conference, 5240 Hollins Road, Roanoke, Virginia 24019, USA. www.sdarm.org

Fa’aliliuina e P. W.

Upu Tomua

O ai o i tatou e lē'i uia tulaga e fa'apei o mea na o'o ia Peteru, le so'o lē fefe e tautala? O lona olaga fa'aletagata e mautinoa lava o se olaga lea tatou te malamalama uma lava i ai, i nisi o vaega. O lona vilivilita'i finafinau ma lona naunau sauni ma agava'a e faia fa'atonuga a lona Matai, e matuā fa'aosofia ai lava lea lagona ia i tatou. E mautinoa lava tatou te malamalama i ana mea sese fa'alumaina i nisi o taimi, ma e fa'alototeleina fo'i i tatou i lona toe tula'i mai ina ua mavae lona pa'ū. O le la'asaga o le aveva ma tagata matua na uia e Peteru e ala i le ta'ita'iga a le Atua, na aumaia ai o ia i le aveva ma aporetolo o tapula'a maualuga o le amio, fa'atasi ai ma ana tusi e lua ua ta'uaogaina ua tusia ai i totonu o le Tusi Paia.

Talu ai ona o nei uiga uma, i le tolu masina oi lumana'i nei, o le au su'esu'e o le A'oga o le Sapati i le lalolagi atoa, o le a latou taula'i i *Lesona Mai I Tusi a Peteru (I)*. O ma'a tāua o le upu moni mai i lenei tane o le Atua, na ulufia e le Agaga Paia, ua fuafuaina e fa'amalosia ai la tatou savaliga ma le Ali'i i taimi faigata.

O le tasi o vaega autu o le tusi a Peteru, o loo fa'ailoa mai fa'apea, o tagata o le Atua, e tatau ona latou ola i olaga e fausia a'e ai le tino o Keriso ina ia aveva o se molimau pupula i se lalolagi fa'apogisaina i le agasala.

“O le toe fa'aola mai ma se toe fuata'iga e tatau ona faia, i lalo o le galuega a le Agaga Paia. O le toe fa'aola mai ma le toe fuata'iga, o mea eseese ia e lua. O le toe fa'aola mai o loo fa'ailoa mai ai se toe fa'afouina o le ola fa'aleagaga, o le toe fa'aolaina mai lea o malosi o le mafaufau ma le loto, o se toe fa'atuina mai lea mai i le oti fa'aleagaga. O le toe fuata'iga o loo fa'ailoa mai ai se toe fa'atulagaina, o se suiga lea i manatu, masaniga ma fa'atinoga. O le toe fuata'iga o le a lē aumaia ai fua lelei o le amiotonu se'ivagana ua feso'ota'i atu i le toe fo'i mai o le Agaga Paia. O le toe fa'afo'isia mai ma le toe fuata'iga, e tatau ona faia la la galuega filifilia, ma i le faia o lenei galuega, e tatau ai ona la galulue fa'atasi.” – *Selected Messages*, bk. 1, p. 128.

O se molimau tāua lava, e aumaia ai se olega malosi lava ia i tatou ta'ito'atasi, lea e mafai ona tatou fa'apotopotoina mai mo lo tatou tutupu a'e fa'aleagaga, a'o tatou su'esu'eina le ulua'i tusi a Peteru: “Lo'u uso e, afai e te mana'o i ai, e mafai ona aveva oe ma tagata malosi i totonu i le Atua. O loo ia te oe taleni o malosi ua foa'i atu e le Atua e te tausia ina ia tu'uina atu fa'apaiaina i le auunaga ia te Ia. Peita'i, afai e te lē gaua'iina atu mea uma lava ia Keriso, o ou agava'a o le a fa'amaonia e mata'utia tele lona leaga ia te oe ma isi, ma ē ta'ita'ia ai i latou ina ia latou savavali vavae ese mai i le upu moni ma vavae ese mai ia Keriso.

“O tagata o le ekalesia i – e tele le galuega latou te mana'omia e faia mo i latou. E tatau ona latou maua le vilivilita'i finafinau mo Keriso, e tatau ona sili atu ona latou agamalu loto maulalo, e tatau ona sili atu lo latou onosa'i, e tatau ona sili atu lo latou agalelei, e tatau ona sili atu ona latou naunau e a'oa'oina i latou, ma e tatau ona sili atu lo latou fa'apei o Keriso i uiga uma lava. I a latou amio, e tatau ona latou fa'ailoa atu i le lalolagi le mana fa'apaiaina o le alofa tunoa. Talosia ia aua ne'i ē punitiaina le ala aga'i atu i lenei galuega tāua e mana'omia lona fa'ataunu'uina, e ala i au poloa'iga poo au fa'ata'ita'iga fo'i. O le a ē galue fa'atasi ea ma Iesu? O le a ē fa'amaoni ea i le Ali'i o Lē na fa'atauina oe? O le a ē tu'ueseina ea i tua mataupu uma lava e itiiti lo latou tāua? E tatau ona papatisoina atu oe i totonu o se fa'atuatua e sili atu ona telē, ma se alofa e sili atu ona tele. E te mana'omia le ava migao sili atu mo mea e fa'avavau lo latou tāua.” – *Testimonies for the Church*, vol. 5, pp. 570, 571.

Tau ina ia fesoasoani mai le Atua ia i tatou uma ina ia tatou taliaina nei apoapoa'iga i totonu o ō tatou loto a'o tatou su'esu'e!

O le Matagaluega o le A'oga o le Sapati a le Koneferenisi Aoao

Taulaga Sapati Muamua mo Narang Mandi Church, i Pakistan

O le feau a le Fa'agaioiga Toe Fuata'i Aso Lona Fitu O Le Toe Afio Mai, na ulufale atu i Pakistan i le vaega mulimuli o le seneturi lona lua sefulu. O le fuaitau aofa'i atoa o tagata o Pakistan e 241.5 miliona ma o le tapua'iga a le vaega sili ona to'atele o ia tagata, o le Islam (96.47%), ona soso'o atu ai lea ma le tapua'iga o le Hinduism (2.14%) Tapua'iga Kerisiano (1.27%), ma isi tapua'iga (0.11%). O lo matou atunu'u e si'omia e Afghanistan, China, India, Sami o Arabia ma Iran. O fa'ato'aga e maua ai le tusa ma le 20.9% o le aofa'i o le tupe maua mai i oloa ma auaunaga uma e fa'atauina mulimuli lava i le i'uga o se taimi fa'atapula'aina i totonu o le atunu'u atoa. O le fa'atulagaga o loo fausia ai oloa ma auaunaga fa'atau atu, ma fa'atau mai i totonu o Pakistan, ua fa'avasegaina o se fa'atulagaga lea a se atunu'u tauatia'e e maulalo lana tupe maua mai. O le atunu'u e mativa lava lona fa'avasegaina i le tele o fa'ailo o atina'e ua fa'atuina e le Polokalame O Atina'e a Malō Au Fa'atasi ma le Fale Tupe a le Lalolagi.

O le aai o Narang Mandi e i le itumalo o Muridke i totonu o le setete o Punjab. O le fuaitau aofa'i atoa o tagata o lenei itumalo, e sili atu ma le 500,000. I tausaga ta'i sefulu ua mavae atu, na matou faia ai ni fa'atasiga, semina o a'oa'oga, ma isi gaioiga mo le atia'eina o a'oa'oga fa'apena i ekalesia i le lotolotoi o lo tatou au uso i Pakistan. E ui lava i le lotolotoi o faigata e fetaia'i ma i matou, o loo mafai pea ona matou fa'atumauina lo matou fa'atuatua i totonu ia Keriso. O le taimi nei la, o a matou galuega ua salalau solo i totonu o lo matou atunu'u. O loo matou aga'i i luma ina ia atina'eina vaega eseese o le galuega a le Atua e fa'apei o tala'iga fa'amisionare, a'oa'oga e fa'ataua i le ola maloloina, a'oa'oga ia avea ma ta'ita'i, fa'atuina o nofoaga tutotonu o a'oa'oga, ma le toe fa'aleleia o a matou fale tapua'i tuai i totonu o Pakistan.

“O loo fetalai mai le Ali'i i Ona tagata i le taimi lenei, e fa'apea, Ia faia ni fuafuaga e mafai ai ona ulufale atu i aai, ma tala'i atu le upu moni i le tulaga faigofie ma le fa'atuatua. O le Agaga Paia o le a galue e ala atu i a outou taumafaiga ina ia tumau i loto. Aua le aumaia ni a'oa'oga uiga ese i lau feau, ae ia ē tautalagia upu faigofie o le tala lelei a Keriso, lea e mafai ona malamalama i ai le fanau iti ma tagata matutua. O tagata e lē'i a'o'oga ma i latou na a'o'oga, e tataua ona latou malamalama uma i upu moni o le feau a le agelu lona tolu, ma e tataua ona a'oa'oina i latou i le tulaga faigofie lava. Afai tou te manana'o e fa'alatalata atu i tagata i se auala latou te taliaina ai outou, ia fa'amaulalo o outou loto i luma o le Atua ma ia outou a'oa'oina Ona ala.” – *Medical Ministry*, p. 299.

O a tatou taulaga ofo uma e tataua ona tu'uina atu ma le loto fiafia; o mana'oga o le Atua o le a talia ma le fiafia ma o Lana galuega o le a manatu i ai, e i ai lana aiā tonu lava i se vaega o tupe ua Ia tu'uina mai i o tatou lima. O uso ma tuafafine mai i le Misiona i Pakistan o loo fa'afetai atu ia te outou, o tatou uso, tuafafine ma talavou pele mo lau foa'i tele mo Lana galuega i totonu o lenei vaega faigata o le lalolagi . . . “auā e alofa le Atua i lē e foa'i ma le loto fiafia” (2 Korinito 9:7).

O ō outou uso ma tuafafine mai i le Ekalesia i Pakistan

O Se Aposetolo a Iesu Keriso

MAU TAULOTO: “Ua fetalai atu le Ali’i, Simona e, Simona e, fa’auta, ua mana’o tele Satani ia te oe, ia lūlū ia te oe e pei o le saito: A ua ou tatalo mo oe, ina ia lē mavae lou fa’atuatua: pe a liua mai fo’i oe, ia ē fa’amalosi i ou uso” (Luka 22:31, 32).

“Ina ua mavae ona ta’ita’ia atu Peteru i le fa’afitia o ia e ia lava ma lona fa’alagolago atoatoa i le mana o le Atua, o lea na filifilia ai loa o ia e galue e avea o se auuuna leoleo mamoe . . . Na fa’ato’a mafai lava ona ia iloa le mana’oga o le tagata talitonu o le fa’alagolago atu ia Keriso, ina ua ia iloa lona lava vaivai.” – *The Acts of the Apostles*, p. 515.

Faitauga Fautuaina: *The Desire of Ages*, pp. 244-251

Ulua’i Aso

Mati 31

1. TALI ATU I LE VALA’AU A KERISO

a. Fa’amatala le ulua’i fetaia’iga fa’afuase’i a Simona Peteru ma Iesu. Ioane 1:40-42.

“Na taumafai Anetere’a e fa’ailoa atu le olioli na fa’atumulia ai lona loto. O lona alu atu e saili lona uso o Simona, na ia alaga atu ai, ‘Ua matou maua le Mesia.’ E le’i toe fa’atali Simona mo se isi vala’aulia fa’alua. Na ia fa’alogo fo’i i lauga a Ioane lē Papatiso, ma na ia fa’ata’alise atu ai loa i le Fa’aola. Na silasila ifo fofoga o Keriso ia te ia, ma Na Ia faitauina lana amio ma le tala’aga o lona olaga. O lona natura oso vale, o lona loto alofa mutimutivale, o lona fa’anaunauta’iga ma lona talitonuina o ia e ia lava, o le natura o lona pa’ū, o lona salamō, o ana galuega, ma lona oti fa’amaturo – na faitauina uma lava e le Fa’aola.” – *The Desire of Ages*, p. 139.

b. O a mea na tutupu na valaauina fa’apitoa ai loa e Iesu Peteru ma lona uso ina ia avea ma Ona so’o? Mataio 4:18-20.

“O le usita’i vave o nei tane, e aunoa ma se fesili, e aunoa ma se folafolaga o se totogi, e foliga mai e ofoofogia; peita’i o upu a Keriso o se vala’aulia lea na tauaveina fa’atasi atu ai se mana malosi. Na finagalo Keriso Na te faia nei tane fai faiva maulalo, i le feso’ota’i atu ia te Ia, o se auala o le aveesea mai o tagata mai i le auuunaga ia Satani, ma tu’uina ai i latou i le auuunaga i le Atua.” – *Gospel Workers*, p. 24.

2. O SE SO'O FA'AMAONI MA LE VILIVILITA'I

a. O le a le manatu o Peteru e fa'atatau ia te ia lava i le amataga o le ave'a o ia ma so'o? Luka 5:8.

“I aso o Keriso, o ta'ita'i fa'aletapua'iga o tagata, na latou manatu sa latou mau'oa i oa fa'aleagaga. O le tatalo a le faresaio, 'Le Atua e, ou te fa'afetai atu ia te Oe, ina ua ou lē fa'apei o isi tagata' (Luka 18:11, R.V.), na ia fa'ailoa atu le lagona o lana vasega, ma le malō atoa i sona tulaga tele lava. Peita'i i le motu o tagata na si'omia mai Iesu, sa i ai nisi na latou lagonaina lo latou mativa fa'aleagaga. Ina ua fa'aalia le mana fa'ale-Atua o Keriso i le vavega o le 'au i'a tele na tosoina a'e i le upega, na fa'apa'ū ifo ai Peteru i aao o le Fa'aola, ma alaga fa'apea, 'Le Ali'i e, Inā e maliu ese atu ia nai ia te a'u; auā o a'u o le tagata agasala' (Luka 5:8); na fa'apena ona i ai i le motu o tagata na fa'apotopoto i luga o le mauga, i latou na lagonaina lo latou 'malaia, pagatia, mativa, tauaso, ma le lē lavalavā' (Fa'aaliga 3:17).” – *Thoughts From the Mount of Blessing*, pp. 6, 7.

b. O le a se mea na talitonu i ai Peteru e fa'atatau ia Iesu, po'o ai o Ia? Mataio 16:13-16.

“Mai lava i le amataga, na talitonu Peteru o Iesu o Ia o le Mesia. O le to'atele o isi na talitonu i le tala'iga a Ioane lē Papatiso, ma na latou taliaina Keriso, na amata ona latou masalosalo i le auga tonu o le galuega a Ioane ina ua falepuipuiina o ia ma fasiotia; ma o lenei ua latou lē talitonu ai ia Iesu fa'apea o Ia o le Mesia O le to'atele o so'o o Iesu na manatu ma le finafinau o le a nofo tupu Iesu i luga o le nofoali'i o Tavita, na latou tu'ua o Ia ina ua latou iloa e leai se manatu fa'apena o Iesu. Peita'i o Peteru ma ana uo latou te le'i liliu ese mai i lo latou fa'amaoni. O loto feliuliua'i o i latou na vivi'i ananafi ae fa'asala ma faitio nei, e le'i fa'aumatiaina ai le fa'atuatua o le so'o moni o le Fa'aola. Na fa'ailoa mai e Peteru, 'O Oe o le Keriso, le Alo o le Atua-soifua.' Na te le'i fa'atali mo mamalu fa'atupu ina ia latou fa'apaleina lona Ali'i, peita'i na ia taliaina o Ia i Lona fa'alumaina. . . .

“Na tali atu Iesu ia Peteru, ma fa'apea atu, 'Amuia oe, Simona Pa-iona: auā e lē se tagata na fa'aalia atu ia te oe, a'o Lo'u Tamā oi le lagi.'

“O le upu moni lea na ta'utinoina atu e Peteru, o le fa'avae lea o le fa'atuatua o le tagata talitonu. O le upu moni lea, lea ua fa'ailoa mai e Keriso lava Ia e fa'apea, o le ola e fa'avavau lea. Peita'i o le mauaina o lenei iloa, e lē o se fa'avae lea mo le vi'ia e le tagata o ia lava. E lē o se poto po'o se lelei o Peteru lava ia, lea na fa'aalia atu ai ia te ia. E lē mafai lava e le aigā tagata, ia te ia lava, ona ausia se iloa e fa'atatau i le Atua. . . . E na o le agaga lava o loo fa'atamafaiina i tatou, e mafai ona ia fa'aalia mai ia i tatou mea loloto a le Atua. . . . O le mea moni o le iloaina fa'ale-agaga e Peteru o le mamalu o Keriso, o se fa'amaoniga lea e iloa ai, na 'a'oa'oina o ia e le Atua.” – *The Desire of Ages*, pp. 411, 412.

3. NAUNAU MO TALI

a. O a fa'ata'ita'iga fa'ale-Tusi Paia o loo fa'ailoa mai ai le mafaufau su'esu'e o Peteru ma o loo fa'aalia mai ai e mafai fo'i ona tatou tutupu a'e e ala i le fausiaina a'e o le uiga lava lea e tasi? Mataio 15:15; 18:21; 19:27; Mareko 13:3, 4.

“E leai lava se isi su'esu'ega o le a matuā fa'aleleia ai manatu ta'itasi, lagona ta'itasi, ma fa'anaunauga ta'itasi e pei o le su'esu'eina o le Tusi Paia. . . . O iinei tatou te a'oa'oina ai le auala e fa'aleleia ai le olaga lenei ma le auala e mafai ai ona fa'amausalīina le olaga oi lumana'i. E leai lava se isi tusi e mafai ona fa'amalieina fesili o loo tu'ufesili ai le mafaufau ma fa'anaunauga o le loto. O le mauaina o se iloa e fa'atatau i le Upu a le Atua, ma gaua'i i ai, e mafai ai e tagata ona si'itia a'e mai i le tulaga sili ona loloto o le lē malamalama ma le fa'alumaina, ina ia avea ai ma atali'i o le Atua. . . .

“E leai se tusi e tutusa ma le Tusi Paia i le avea ma malosi e a'oa'o ai. E leai se isi lava mea o le a fa'apena ona foa'iina mai le malosi i tomai uma lava e fa'apei ona mana'omia i tagata a'o'oga uma, ina ia malamalama ai i upu moni tetele lava o fa'aaliga. O le mafaufau e suia lemu atu lava i mataupu o loo fa'atagaina o ia e manatunatu i ai. Afai e na o mea masani lava o le olaga e fa'atumulia ai, ma lē manatunatu ai i autū sili ona tetele ma sili ona maualuga, o le a avilu loa ma fa'avaivaia. Afai e lē mana'omia lava le mafaufau e tauivi ma fa'afitauli faigata, pe matuā fa'agaioia fo'i ina ia manatunatu i upu moni tāua, o le a toetiiti lava a leiloa ese lona malosi e tupu a'e ai, pe a mavae sina taimi.

...

“I totonu o le upu a le Atua, e maua ai e le mafaufau matāupu mo manatunatuga sili ona loloto, ma fa'anaunauga silisili ona maualuga.” – *Testimonies for the Church*, vol. 5, pp. 24, 25.

“O le mafaufau sili ona sa'iliili e mafai ona ia a'oa'oina ma le saogalemu i totonu o le a'oga a Keriso, mataupu ia o le a fa'amaonia e mo lo latou lelei mo le taimi lenei ma le olaga e fa'avavau.” – *An Appeal to Mothers*, p. 32.

b A'o lagolagoina le mafaufau sa'ili'ili i mataupu fa'aleagaga (Ioane 5:39), O le a le taimi e fa'agata ai le uiga sa'ili'ili fia iloa maloloina o le tagata? Teuterome 29:29.

“O [Satani] o lo o ia sa'ili i taimi uma lava ina ia fa'aosofia se agaga o le su'esu'e fia iloa lē ava, o se naunauta'iga lē malolo, fia iloa, ina ia sa'ili'ili i mea lilo o le potu ma le mana o le Atua. I a latou taumafaiga ina ia sa'ilia mea ua finagalo malie le Atua e natia, e to'atele tagata ua latou lē amanaiaina ai upu moni ia ua Ia fa'aalia, ma e tāua i le fa'aolataga.” – *Patriarchs and Prophets*, pp. 54, 55.

“E lē tatau ona tatou taumafai e si'itia i lima lē migao le ie puipui o loo Ia natia ai i tua Lona mamalu. . . . O se fa'amaoniga o Lona alofa, o iina o lo o natia ai Lona mana, ma o iina o loo ufitia ai o Ia i ao mata'utia o le mea lilo ma le lē mafa'amatalaina; auā o le si'itiaina o le ie puipui o loo ufitia ai le pupula o le Atua, o le oti lea.” – *The Review and Herald*, April 7, 1885.

4. ITITI LE FA'ATUATUA, AE TELE LE TALITONUGA O LE TAGATA IA TE IA LAVA

a. O le a se mea e tatau ona tatou a'oa'oina mai i le ulua'i tala tusia i le mea na tupu ia Peteru e fa'atatau i le savali i le fa'atuatua? Mataio 14:28-31.

“[O Peteru] sa tatau ona ia fa'atumauina lana vaai ia si'itia a'e i luga ia Iesu; peita'i na ia va'ai ifo i lalo i galu sousou, ma na muta ai loa lona fa'atuatua.” – *Testimonies for the Church*, vol. 2, p. 273.

“Se'ivagana ua faia ma galuega o le olaga atoa o le tagata agasala, lona va'ava'ai atu i le Fa'aola si'itiaina, ma ia taliaina ai e ala i le fa'atuatua le amiotonu lea ua avea ma ona avanoa sili ona tāua lona mauaina, e lē mafai ona sili a'e ona lavea'iina o ia nai lo le mafai e Peteru ona savali i luga o le vai, se'ivagana ua ia fa'atumau mausalīina lana va'ai ia Iesu. O le taimi lenei, o le fuafuaga finafinau lava a Satani le punitiaina o le va'ai atu ia Iesu, ma ta'ita'ia ai tagata ina ia latou va'ava'ai atu i le tagata. . . . Ua tele tausaga o va'ava'ai atu le ekalesia i le tagata ma latou mana'omia ai ni mea e tele mai i le tagata, a ua lē va'ai atu ia Iesu, o Lē o loo ogatotonu i ai o tatou fa'amoemoega o le ola e fa'avavau.” – *Testimonies to Ministers*, p. 93.

b. O le umi atu o le taimi na mafuta ai Peteru ma Iesu, na fa'apefea ona ia so'ona fa'atāuaina ia lava ma lona malosī e manumalo ai i se tofotofoga tele lava? Mataio 26:33-35, 69-75.

“E leai se mea e matuā inosia tele i le Atua pe e sili foi ona matautia le leaga i le tagata e fa'apei o le fa'amauualuga fa'alialiavale ma lona fa'alagolago ifo ia te ia lava. I agasala uma lava, o le agasala lenei e sili ona leai se fa'amoemoe, e sili ona lē mafai ona fofōina.” – *Christ's Object Lessons*, p. 154.

“E leai se isi o le au so'o na sili a'e le fa'ailoaina mai e lona talaaga, o le auala o le koleniga a Keriso, nai lo le talaaga o Peteru. O le toa o Peteru, sauni e osofa'i, ma talitonu ia te ia lava, na vave ona ia malamalama ma e fa'ata'alise on gaiōi, e vave lona tauī ma sui atu, ae taumasuasua fo'i i le fa'amagalō, na masani lava ona ia sese, ma na masani foi ona ia maua a'oa'iga. . . . Na a'oa'i ma le onosa'i le Fa'aola ma le alofa e iloa ai eseese, i Lona soo oso vale, ma saili ai ina ia taofia lona talitonu ia te ia lava, ma ia a'oa'o atu ia te ia le loto maulalo, usita'i, ma le talitonu.

“Peita'i e na o se vaega lava o le lesona na a'oa'oina. O lona mautinoaga ia te ia lava, e le'i se'ieseina a'e ma ona a'a. . . .

“Mo i latou uma lava, o le mea na tupu ia Peteru sa i ai se lesona. O le talitonu o le tagata ia te ia lava, e fa'ato'ilaloina ai i le tofotofoga. O le galuea'iina mautinoaga o le agasala lea e lē' o lafoa'ia lava, e le'i mafai ona taofia e Keriso. Peita'i e fa'apei ona a'apa atu Lona aao e lavea'i ina o le a ufitia e galu Peteru, na fa'apena ona a'apa atu Lona alofa mo lona lavea'iga ina ua fafati a'e vai loloto i luga o lona agaga.” – *Education*, pp. 88, 89.

c. Aisea e lē fa’amautinoaina ai e tausaga e tele o le avea ma tagatā ekalesia, le malosi sili atu i le fa’atuatua? Roma 11:20-22; 1 Korinito 10:12; 8:2.

Aso Tofi

Aperila 4

5. O SE APOSETOLO UA LIUA

a Aisea e lē taofia ai i tatou e le Atua i taimi uma mai i lo tatou mulimuli i o tatou lava ala, ma lo tatou iloa e mafai ona i’u i le agasala ma le mā? Isaia 48:17; Luka 22:31, 32.

“Na fetalai atu Keriso ia Peteru, a’o ia le’i fa’afitia o Ia, ‘A liua mai oe, ia ē fa’amalosi i ou uso.’ Luka 22:32. O nei upu na matuā tāua lava e fa’atatau i le galuega lautele ma le fa’amanuiaina o le a faia e lenei aposetolo i le lumana’i mo i latou o le a o mai i le fa’atuatua. O le iloa o Peteru lava ia e fa’atatau i le agasala ma ona mafatiaga ma lona salamō, lea na saunia ai o ia mo lenei galuega. Na ia fa’ato’a iloa le mana’oga o le tagata talitonu i le fa’alagolago atu ia Keriso. . . . ina ua ia iloa lona vaivai. O lenei, ua ia liua ma ua taliaina o ia, . . . o le a ia tausia ai mamoe ma tama’i mamoe ua tu’uina atu i lana tausiga i le alofa agalelei e fa’apei ona alofa atu Keriso ia te ia.” – *The Acts of the Apostles*, pp. 515, 516.

b. I ona tausaga mulimuli ane, o le a le fa’amalosiga na tu’uina atu e Peteru lea ua liua, i ana tusi i tagata talitonu o loo tofotofoina? 1 Peteru 3:14; 4:12-14.

“O nei tusi o loo fa’ailoa mai ai le fa’ailoga o le tusia e se tasi na taumasuasua ai puapuaga o Keriso ma Lana fa’amafanafanaga; o se tagata ua liua lona tagata atoa e le alofa tunoa, ma o lona fa’amoemoega o le ola e fa’avavau na mautinoa ma mausali.” – *Ibid.*, p. 517.

Aso Faraile

Aperila 5

FESILI TOE FA’AMANATU

- 1. A ou fa’alogoina le si’ufofoga o Iesu o vala’au mai i mea eseese e tutupu i le olaga, e fa’apefea ona mafai ona ou mautinoa ia tali vave atu ma le vilivilita’i e fa’apei ona faia e Peteru?**
- 2. A’o fa’aumiumiina le tele o tausaga o lo’u ta’utinoina o le Fa’akerisiano, o le a se mea e lē tatau lava ona ou fa’agaloina?**
- 3. I le augatupulaga lenei o le fa’alavelaveina o le mafaufau i taimi uma lava, o fea ou te mana’omia e taula’i i ai lo’u naunauta’iga sa’ili’ili fia iloa fa’alenatura pe afai o loo o’u finafinai moni lava ia lavea’iina a’u mo le ola e fa’avavau?**
- 4. O a vaega o le olaga atonu o loo lamatia ai a’u i lo’u talitonu ma fa’alagolago ifo ia te a’u lava?**
- 5. A ou sese, e fa’apefea ona mafai ona ou aumaia lesona lelei mai i lena sese?**

O “Tagata Ese”

MAU TAULOTO: “O lea ua outou olioli tele ai, e ui lava ina mafatia outou i nai aso nei, pe afai e tatau ai, i fa’aosoosoga eseese” (1 Peteru 1:6).

“O i tatou o tagata faimalaga, o tagata malaga ma tagata ese, i luga o le fogaeleele. Aua tatou te fa’aaluina a tatou tupe ma meatotino i le fa’amalieina tu’inanau o fa’anaunauga ia ua fa’atonu mai le Atua ia i tatou ina ia fa’ato’ilaloina. Ae ia tatou fa’atuina se fa’ata’ita’iga tonu i luma o i latou o loo tatou galulue fa’atasi. Ia tatou fa’atusalia sa’o atu lo tatou fa’atuatua. . . . Ia fa’agae’etia loto o tagata e lou a’afiaga i le paia tele o mana’oga o le Atua.” – *Testimonies for the Church*, vol. 6, p. 452.

Faitauga Fautuaina: *The Great Controversy*, pp. 17-38.

Ulua’i Aso

Aperila 7

1. O SE TUSI I NI TAGATA FA’APITOA

a. Na fa’apefea ona fa’aigoa e Peteru kerisiano na salalau solo i Anatolia (Asia Minor) lea na tusia atu i ai lana ulua’i tusi? 1 Peteru 1:1.

b. A’o avea so’o o Keriso o ni tagata ese i le lalolagi lenei, o le a le silafaga a le Atua ia i latou? 1 Peteru 1:2; 2:9; Efeso 2:19.

“O tagata o le Atua – le Isaraelu moni – e ui lava ina salalau solo i mālō uma, ua na o i latou lava o ni tagata aumau i luga o le fogaeleele, o lo latou tagatā nu’u moni o loo i le lagi.” – *Patriarchs and Prophets*, p. 447.

“O le aiaiga o le taliaina i totonu o le aiga o le Atua, o le alu ese lea mai i le lalolagi, ma vavae ese mai i ona a’afiaga uma e fa’aleagaina ai. O tagata o le Atua e lē tatau ona i ai sa latou so’otaga ma le ifo i tupua i ona foliga uma lava. E tatau ona latou ausia se tapula’a sili atu ona maualuga. E tatau ona iloga i tatou mai i le lalolagi, ona fetalai mai loa lea o le Atua, ‘O le a Ou talia outou o ni tagata o Lo’u aiga fa’atupu, o fanau a le Tupu oi le lagi.’ I le avea o i tatou ma tagata talitonu i le upu moni, e tatau ai ona tatou ma’oti ese lava i a tatou fa’atinoga mai i le agasala ma tagata agasala. O lo tatou tagatā nu’u moni o loo i le lagi.

“E tatau ona sili atu le manino o lo tatou iloa i le tāua o folafolaga ua faia e le Atua ia i tatou, ma ia sili atu ona loloto lo tatou fa’atāuaina o le mamalu ua Ia foa’i mai ia i tatou.” – *Fundamentals of Christian Education*, p. 481.

Aso Gafua

Aperila 8

2. O LE AU FILIFILIA A LE ATUA

a. Ina ua fa'aigoaina i tatou e Peteru o le "au filifilia" a le Atua, o lona uiga ea a filifilia loa, e lē mafai loa ona tatou fano? Fa'amatala e ala i le fa'atusatusaina o le Ioane 15:16 i le Luka 3:8, 9; Luka 6:13-16 i le Ioane 6:70, 71; Isaia 41:8, 9 i le Roma 11:20-23.

“Ina ua filifilia Iuta e le Ali'i, sa i ai le fa'amoemoe ia te ia. Sa i ai ni ona uiga lelei. I lana so'otaga ma Keriso i le galuega, e ala i lona fa'alogologo atu i Ana fetalaiga, sa ia te ia se avanoa lelei na te iloa ai ona sese. . . . Na tu'uina foi o ia e lo tatou Ali'i i se tulaga na mafai ona ia faia ai lana filifiliga pe fausiaina a'e lona uiga mana'o matape'ape'a, po'o lona iloa fo'i o lenei uiga leaga, ma fa'asa'oina. Na ia tauaveina tupe itiiti na aoina mo ē matitiva ma o latou mana'oga tāua. . . .

“O lenei tupe itiiti o se fa'aosoosoga lea i taimi uma ia Iuta. . . . Na a'oa'i o ia e lo tatou Fa'aola ona o lenei mana'o matape'ape'a. O lenei a'oa'iga na fa'atupulia ai le ita i totonu o le loto o Iuta, se'ia o'o ai ina ia malie e fa'alata lona Ali'i mo se tupe itiiti. O le a i ai i le lotolotoi o tagata tausī Sapati i latou e lē sili a'e lo latou fa'amaoni i totonu o ō latou loto nai lo Iuta.” – *Testimonies for the Church*, vol. 4, pp. 41, 42.

b. O le a le tapula'a autu e fa'amausaliina ai le filifiliga "e tusa ma le mua'i silafiaina e le Atua"? 2 Peteru 3:9; 1 Timoteo 2:4; Efeso 1:4, 5.

“E tu'uina mai e le Tamā Lona alofa i luga o Lana fanau filifilia o loo nonofo i le lotolotoi o tagata. O tagata nei ua toe faatauina mai e Keriso i le tau o Lona lava toto; ma talu ai ona latou te tali atu i le vala'aulia a Keriso, e ala i le alofa tunoa silisiliese o le Atua, o lea ua filifilia ai i latou ia lavea'iina o ni Ana fanau ususita'i. . . . O tagata ta'itasi uma lava o le a fa'amaulaloina o ia e ia lava e pei o se tamaitiiti, o lē o le a talia ma usita'i i le Upu a le Atua i le uiga faigofie o se tamaitiiti, o le a i ai i latou i le lotolotoi o le au filifilia a le Atua.” – *The Signs of the Times*, January 2, 1893.

c. O le a se mea e tatau ona tatou faia ina ia fa'amausaliina ai lo tatou filifilia ma alo ese ai mai i le toe fa'aluaina o le i'uga fa'anoanoa o Iuta? 2 Peteru 1:10; 3:17; 1 Ioane 3:2, 3.

“Afai tatou te gaua'i i aiaiga ua faia e le Atua, o le a tatou fa'amausaliina lo tatou filifilia i le fa'aolataga. O le usita'i atoatoa i Ana poloaiga o le fa'amaoniga lea e iloa ai tatou te alolofa i le Atua, ma e lē'i fa'ama'a'aina i tatou i totonu i le agasala.” – *The SDA Bible Commentary* [E. G. White Comments], vol. 6, p. 1079.

Aso Lua

Aperila 9

3. UPU FA'AMALOSI'AU

a. O ai e patino i ai le mamalu uma mo le filifilia o i tatou mo le faaolataga – ma aisea? 1 Peteru 1:3; Salamo 72:18, 19.

“I le amataga lava o le ulua’i tusi a Peteru, o le auauna-toea’ina a le Atua na ia tu’uina atu i lona Ali’i se sa’afi’afiga o le viiga ma le fa’afetai. ‘Ia fa’afetaia le Atua, o le Tamā o lo tatou Alii o Iesu Keriso.’” – *The Acts of the Apostles*, p.517.

b. O a upu o loo sa’ili Peteru e fa’amafanafana ai le au uso o loo fetaia’i ma sauāga mata’utia? 1 Peteru 1:3 (vaega mulimuli), 4. Vaai fo’i i le Eperu 11:26.

“I lenei fa’amoemoe o se tofi mautinoa i le lalolagi fa’afouina, na olioli ai ulua’i Kerisiano, e o’o lava i taimi o tofotofoga matautia o puapuaga. Na fai mai le tusi a Peteru, ‘Na outou olioli tele, e ui lava ina mafatia outou i nai aso nei, pe afai e tatau ai, i fa’aosoosoga eseese’” – *Ibid.*, pp. 517, 518.

c. Aisea e fa’ataga ai e le Atua fa’aosoosoga, o mafatiaga ma puapuaga ina ia o’o mai i luga o Lana fanau filifilia? 1 Peteru 1:6, 7; Mataio 5:11, 12.

“O tofotofoga ma mea e fa’alavelaveina ai le aga’i i luma, o auala filifilia ia a le Atua o Lana a’oa’iga, ma o Ana aiaiga filifilia fo’i ia o le fa’amanuiaina. O Lē na te faitauina loto o tagata, e sili atu Lona iloa lelei o a latou amio nai lo lo latou iloa o a latou lava amio. Na te silafia, o nisi o loo i ai malosi ma mafaufau lē-fa’aitu’au, lea a sa’o le fa’atonutonuina, e mafai ona fa’aaogaina i le tauaveina i luma o Lana galuega. O Lona lava finagalo Na te aumaia ai nei tagata i tofiga eseese ma mea eseese e tutupu, ina ia latou iloa ai i a latou amio, uiga leaga ia sa natia mai ia i latou lava. Na te foa’i atu ia i latou le avanoa e fa’asa’osa’o ai nei uiga leaga ma ia saunia ai i latou lava mo le auaunaga ia te Ia. E masani lava ona Ia fa’atagaina afi o puapuaga e osofa’ia i latou ina ia fa’amamāina ai i latou.

“Talu ai ona o le mea moni ua valaauina i tatou ina ia tatou onosa’ia tofotofoga, o loo fa’aailoa mai ai o loo silafia e le Alii Iesu i totonu ia i tatou se mea tāua, lea Na te finagalo ina ia fausiaina a’e. . . . E fa’ataga e le Alii Ana fanau filifilia ina ia tu’uina i totonu o le ogaumu a’asa o puapuaga ina ia fa’amaonia ai ,poo le a le amio o loo latou amio a’i, ae pe mafai fo’i ona saunia i latou mo Lana galuega.” – *The Ministry of Healing*, p. 471.

Aso Lulu

Aperila 10

4. FA’AMATALAGA E FA’ATATAU I LE FA’ATUATUA

a. O le a le auala lava e tasi e mafai ona aumaia ai i tatou e le Atua “i le fa’aolataga” 1 Peteru 1:5; Luka 8:48.

“O le fa’atuatua ia Keriso lea e lavea’iina ai le tagata, e lē o le fa’atuatua lea o loo fa’aailoa mai e le toatele. ‘Talitonu, talitonu,’ o la latou alaga lea; ‘na o le talitonu lava ia Keriso, ma o le a fa’aolaina oe. E na o le pau lava lena o le mea e tatau ona ē faia.’ A’o talitonu atoatoa atu le fa’atuatua moni ia Keriso mo le fa’aolataga, o le a ta’ita’ia atu ai i le liuaga atoatoa i le tulafono a le Atua. O le fa’atuatua e fa’aalia i galuega.” – *The Review and Herald*, October 5, 1886.

“O le auala e mafai ai ona tausia i tatou e le mana o le Atua e ala i le fa’atuatua, o fa’anaunauga o le mafaufau e tatau ona si’itia a’e i taimi uma lava i tatalo lē leoa mo le fesoasoani, mo le malamalama, mo le malosi, ma le atamai. Peita’i o manatunatuga ma tatalo e lē mafai ona suitulaga i le fa’aleleia atili o le taimi i le finafinau ma le fa’atuatua. O le galue ma le tatalo e mana’omia uma i le fa’aatoatoaina o le amio fa’a-kerisiano.” – *God’s Amazing Grace*, p. 317.

b. Aisea e mana’omia ai e le fa’atuatua tofotofoga? 1 Peteru 1:7; Iopu 23:10; Iakopo 1:3.

“I le olaga fa’aletapuaiga o tagata ta’itasi uma lava e manumalo mulimuli lava, o le a i ai va’aiga mata’utia lava o le nunumi lē malamalama ma tofotofoga; peita’i o lona iloa e fa’atatau i le Tusi Paia o le a mafai ai e ia ona fa’amanatu mai folafolaga fa’alototele-loto a le Atua, lea o le a fa’amafanafanaina ai lona loto ma fa’amalosia ai lona fa’atuatua i le mana o le Atua Malosi. . . . O le tofotofoina o le fa’atuatua e sili atu lona tāua nai lo le auro. E tatau ona iloa e tagata uma lava, o se vaega lenei o le koleniga i le a’oga a Keriso, lea e aogā e fa’amamāina ma fa’aleleia ai i latou mai i le eleele o le fa’alelalolagi.” – *Ibid.*, p. 81.

c. O fa’apefea ona fa’amatala e le aposetolo o Peteru le natura o le fa’atuatua? 1 Peteru 1:8, 9. Fa’atusatusa i le fa’amatalaina e Paulo o le fa’atuatua. Eperu 11:1.

“Aua lava ne’i galo ia i tatou, e o’o lava i lo tatou savavali i le vanu, o loo fa’atasi Keriso ma i tatou pe a tatou savavali ma le talitonu iina e fa’apei ona tatou i luga o le tumutumu o le mauga. Na fai mai le leo ia i tatou, ‘O le a ē lē lafoina atu ea lau avega i luga o Lē Na te tauaveina avega, o le Ali’i lea o Iesu Keriso? O le a e lē mana’o ea e te ola i le itu lāina o le satauro?’” – *Mind, Character, and Personality*, vol. 2, p. 811.

Aso Tofi

Aperila 11

5. O LE MEA LILO O LE FA’AOLATAGA

a Aisea na sili atu ai le faigofie ona malamalama i le “fa’aolataga i le alofa tunoa” e ala mai i le fa’atuatua, ina ua mavae le fanau mai o Keriso i le tino tagata ma Lona maliu? 1 Peteru 1:10-12; Luka 10:24; 1 Ioane 1:1-3.

“E o’o lava i perofeta na fa’amanuiaina i fa’aaliga fa’apitoa a le Agaga, latou te lē’i malamalama atoatoa i le tāua o fa’aaliga ia na tu’uina atu ia i latou. . . .

“Ae peita’i . . . na latou sa’ili ma le finafinau ina ia latou maua le malamalama atoa lava na finagalo malie le Atua ina ia fa’aalia mai. . . . Oka se lesona lelei mo tagata o le Atua i augatupulaga Kerisiano, auā o nei valoaga na tu’uina mai i Ana auauna mo lo latou manuia! . . . Fa’atusatusa lo latou finafinau paia ma uiga lē fia galue, lē naunau o loo taliaina ai e i latou na filifilia i augatupulaga mulimuli ane, lenei meaalofa a le Lagi. Oka se a’oa’iga i le uiga fa’alēano, fiafia i le fa’afifilemu, fiafia i le lalolagi lea e loto malie e

fa'aioa atu fa'apea, o valoaga e lē mafai ona malamalama i ai!" – *The Great Controversy*, p. 344.

b. Aisea ua avea ai le fuafuaga o le fa'aolataga o se mea lilo e o'o lava i agelu? 1 Peteru 1:12 (vaega mulimuli); 1 Korinito 4:9.

“O le afio mai o Iesu e nofo fa'atasi ma i tatou, na finagalo ai o Ia ia fa'aalia mai le Atua ia i tatou ma agelu. . . . O lo tatou tama'i lalolagi, o le tusi lesona lea a le iunivesa. O le fuafuaga ofoofogia a le Atua o le alofa tunoa, o le mea lilo o le alofa-e toe fa'atau mai ai, o le autu lea o loo 'naunau agelu e va'ava'ai i ai,' ma o le a avea lea ma a latou su'esu'ega i tausaga lē muta e fa'avavau. O le au fa'aolaina ma agelu e lē'i pa'u'ū o le a latou maua i le maliu o Keriso la latou su'esu'ega ma la latou pese.” – *The Desire of Ages*, pp. 19, 20.

Aso Faraile

Aperila 12

FESILI TOE FA'AMANATU

1. O le a se mea e mafai ona ia fa'amanatu maia ia te a'u, o a'u o se tagata ese, o se tagata faimalaga, i totonu o lenei lalolagi – le tagata lea e lē tatau ona ia manatu o lona aiga o loo iinei?
2. E fa'apefea ona mafai ona ou fa'amausaliina lo'u filifilia ma lo'u fa'aolataga?
3. O le a se mea o le a sili atu ona fa'aa'upegaina ai a'u ina ia ou tauaveina ma le loto toa tofotofoga ma fa'aosoosoga?
4. O le a se mea e tauau ina fa'avaivaia – pe fa'amalosia ai fo'i – lo'u fa'atuatua?
5. E fa'apefea ona mafai ona ou fa'aaluina tatau le taimi e sili atu ona tele e su'esu'e ai le fuafuaga o le fa'aolataga i se tulaga sili atu ona loloto?

Lesona 3

Sapati, Aperila 20, 2024

Fanau Usiusita'i a le Atua

MAU TAULOTO: “Ua outou fa'amamā i o outou loto i le gaua'i i le upu moni e le Agaga, ua i'u i le alofa fa'amaoni i le au uso, o le mea lea ia matuā fealofani ai outou ai le loto naunau” (1 Peteru 1:22).

“A tatou taofi mau atu loa ia Keriso e ala i le fa'atuatua, ua fa'ato'a amata loa la tatou galuega. O tagata ta'itasi uma lava e i ai o latou masaniga leaga ma le agasala lea e tatau ona fa'ato'ilaloina e ala i le tauiviga finafinau. O tagata ta'itasi uma lava e mana'omia ia tauina le taua o le fa'atuatua.” – *Selected Messages*, bk. 2, p. 20.

Faitauga Fautuaina: *Steps to Christ*, pp. 43-48.

1. FILIFILIA MA LE FA'AETEETE O Ō TATOU MANATUNATUGA

a. E tusa ai ma le Upu a le Atua, o fea e amata ai le usita'i moni? 1 Peteru 1:13, 14; Roma 12:2.

“O toe fuata'iga moni uma lava e amata lava i le fa'amamāina o le loto. O le fufuluina o le toe fanaufouina ma le toe fa'afouina o le mafaufau e ala i le mana o le Agaga Paia, lea e galuea'iina ai se suiga i le olaga.

“O lo tatou va'ava'ai ia Keriso e suia ai i tatou. Afai e manatunatu le mafaufau i taimi uma lava i mea fa'alētumau, o nei mea o le a matua miti'ia ai le mafaufau, ma a'afia ai le amio, o lea ua lē va'aia ai le mamalu o le Atua ma ua fa'agaloina. O avanoa o loo mafai ona latou maua ina ia latou malamalama ai i mea fa'alelagi, ua lē amanaiaina. Ua oti loa le olaga fa'aleagaga.” – *Sons and Daughters of God*, p. 105.

b. O fea e aga'i i ai manatunatuga ma faufauga fa'alēnatura o manatu fa'aletagata? Kenese 6:5; Ieremia 17:9.

c. O le a le mea o le a tatou faia pe a tatou iloa o ō tatou manatu ma faufauga e lē mamā? Galuega 8:22.

2. MANATU FA'AUTAUTA

a. E fa'aapefea ona mafai ona tatou “fusi a'e sulugatiti o ō tatou mafaufau” i se uiga fa'atinoia? Kenese 4:7.

“O i latou e lē manana'o e pa'u'ū i faufauga a Satani, e tatau ona latou puipuiina lelei ala e aga'i atu i le loto; e tatau ona latou 'alo ese mai i le faitauina, va'ai, poo le fa'alogo foi i mea o le a fa'amanatu mai ai manatu lē mamā. O le mafaufau e lē tatau ona tu'ua e manatunatu i matāupu uma lava e ono fa'amanatu mai e le fili o agaga. O le loto e tatau ona leoleoina ma le fa'amaoni, afai e leai, o le a fafaguina e manatu leaga mai i fafo, lagona leaga i totonu, ma o le a fealualua'i ai loa le tagata i le pogisa. Fai mai le tusi a Peteru, 'Ia outou fa'autauta, ia fusi a'e sulugatiti o ō outou mafaufau,'” – *The Acts of the Apostles*, p. 518.

b. Aisea e matuā taua ai tele le puleaina o manatunatuga o ō tatou loto? Fa'ata'oto 23:7 (vaega muamua); 24:9 (vaega muamua).

“O manatunatuga, e tatau ona aumaia ia gaua'i atu i le finagalo o le Atua, ma lagona fo'i ia i lalo o le pule'aga a le mafaufau ma le tapua'iga. O ō tatou manatunatuga e lē'i foa'iina mai ia i tatou ina ia fa'atagaina e so'ona tamo'e solo ma le lē puleaina ma fa'ataga e manatunatu i so'o se mea e mana'o i ai, e aunoa ma se taumafaiga ina ia taofia ma

koleniina ma a'oa'iina. Afai e sesē manatunatuga, o le a sesē fo'i lagona; ma o manatu ma lagona tu'ufa'atasia e fausia a'e ai le amio fa'aleagaga. A tatou filifili loa e fa'apea, o le aveā o i tatou ma kerisiano e lē o mana'omia ai i tatou ina ia taofia o tatou manatunatuga ma o tatou lagona, ua aumaia loa i tatou i lalo o le a'afiaga o agelu leaga, ma tatou vala'aulia mai ai loa lo latou fa'atasi mai ma la latou pule'aga. Afai tatou te gaua'i i lagona e osofia ai i tatou ma tatou fa'atagaina ai o tatou manatu e manatunatu i se taula'iga o le masalosalo, fa'alotolotolua, ma le mafatia, o le a tatou lē fiafia, ma o ō tatou olaga o le a fa'amaonia mai o se to'ilalo." – *The Review and Herald*, April 21, 1885.

c. Aisea e aioi mai ai le aposetolo o Peteru ia i tatou ina ia tatou fa'autauta ma "fa'amoemoe e o'o i le i'uga? 1 Peteru 1:13 fa'atusatusa i le mataupu e 5:8.

"Ia matuā puipuia ma le fa'amaoni ou manatunatuga. Ia matuā malu puipuia lava le puipuia o lou loto mai i manatunatuga ta'itasi uma e fa'alatalata atu i ai. E tatau ona ē fa'atuina a'e i luga pa puipui e tete'e atu ai i le fa'alatalata mai o Satani. O le mataala i le vaega e tasi ae fa'atalalē ai i isi vaega, o le a lē aoga lea. . . . O loo i ai fa'afanoga i o tatou luma ia e tatau ona tatou fa'afetaia'ia, ma o lo tatou saogalemu e tasi lava, o loo i totonu o le Atua." – *This Day With God*, p. 174.

Aso Lua

Aperila 16

3. SOLA ESE MAI I TU'INANAUGA UA TUANA'I MA IA PAIA

a. O a vaega eseese o ō tatou olaga e tatau ona tatou matuā fa'autauta ai lava i o tatou mafaufau ina ia fa'apaiaina i tatou? 1 Peteru 1:14, 15; 4:2, 3.

"Aua ne'i fa'aseseina e se tasi ia lava i le manatu fa'apea, o agasala na teufatuina mo se taimi e mafai ona faigofie ona lafoa'ia i se taimi pu'upu'u? E lē sa'o le manatu lea. O agasala ta'itasi uma lava e teufatuina, e fa'avaivaia ai le amio ma fa'amalosia ai masaniga; ma o le amioleaga i le tino, mafaufau, ma o le amio leaga, o le i'uga lea. Atonu e mafai ona ē salamo i le sesē ua ē faia, ma tu'uina ou vae i ala tonu; peita'i o le suiga i lou mafaufau ma lou iloaina o le agasala, o le a faigata ai mo oe ona ē iloa le mea tonu mai i le mea sese. E ala i masaniga sese ua fausiaina, o le a toe osofa'i ai pea lava pea oe e Satani." – *Christ's Object Lessons*, p. 281.

b. E ui lava ina fa'amanatu mai ia i tatou i taimi uma lava ina ia tatou paia (1 Peteru 1:15, 16) – lea atonu tatou te manatu e mafai ona fa'ataunu'uina e ala i a tatou lava taumafaiga – a'o le mea moni, o a auala e mafai ai e i tatou ona tatou paia? Levitiko 20:7, 8; Filipi 2:13; Tito 3:5.

"E ui lava ina leai se amiotonu i totonu ia i tatou lava, o le agalelei ma le alofa tele o le Atua, ua tauia ai i tatou e peisea'i o le amiotonu o se meatotino lea a i tatou. A uma loa ona tatou faia le lelei atoa lava e mafai ona tatou faia, o i tatou lava o auaua lē aogā. . . . O le mea ua tatou fa'ataunu'uina, e na o le alofa tunoa lava o Keriso ua mafai ai ona tatou

faia, ma e leai se tau i e tatau mo i tatou mai i le Atua ona o la tatou amiotonu.” – *The Review and Herald*, June 27, 1893.

c. Ina ua uma le olega ina ia fa’autauta, aisea ua fa’amanatu mai ai e le aposetolo ia i tatou e fa’atatau i le fa’amasinoga o le a o’o mai? 1 Peteru 1:17; Kolose 3:5, 6.

“O galuega a tagata ta’itasi uma lava e iloilo ina i luma o le Atua ma e tusia fa’amauiina mo le fa’amaoni poo le lē fa’amaoni fo’i. O tafatafa o igoa ta’itasi i totonu o tusi a le lagi o loo tusia ai ma le ma’oti mata’utia, upu sesē ta’itasi, o gaoigaga fa’apito ta’itasi uma, o tiute ta’itasi uma e lē’i fa’ataunu’uina, ma agasala lilo ta’itasi uma, i fa’atinoga fa’afoliga taufa’asese uma. O lapata’iga poo a’oa’iga ta’itasi uma mai i le lagi e fa’atalalē i ai, o sekone e fa’ama’imauiina, o avanoa e lē fa’aleleia atili, o le a’afiaga e tu’uina atu mo le lelei poo le leaga fo’i, fa’atasi ai ma ona i’uga e mamao lava ona o’oo’oga, o mea uma lava nei o loo tusia uma e le agelu o fa’amaumauga.” – *The Great Controversy*, p. 482.

Aso Lulu

Aperila 17

4. TOE FA’ATAUINA MAI E KERISO

a. O le a se mea ua aumaia e Peteru o se mafua’aga lelei lea, e lē gata ina aogā, ae o lo tatou tiute fo’i lo tatou faia o taumafaiga ina ia tatou manumalo mai i tu’inanauga ua mavae? 1 Peteru 1:4, 18, 19; 1 Korinito 6:18-20.

“O tagata uma lava ua fa’atauina i lenei tau lē mafuatia. O le sasa’aina mai o le fale oa atoa o le lagi i lenei lalolagi, o le foa’iina mai ia i tatou o le lagi atoa e ala mai ia Keriso, ua fa’atauina ai e le Atua le loto, o lagona, o le mafaufau, ma le agaga, o tagata ta’itasi uma lava. Po’o i latou o ni tagata talitonu pe e lē talitonu fo’i, o tagata uma lava o meatotino ia a le Atua. O tagata uma ua vala’auina ina ia auauna mo Ia, ma, mo le uiga la ua latou fetaia’i ai ma lenei mana’oga, o tagata uma fo’i o le a mana’omia ina ia talatala atu se tala i le aso tele o le fa’amasinoga.” – *Christ’s Object Lessons*, p. 326.

b. O anafea na fa’amausaliina ai le fuafuaga o le fa’aolataga? 2 Timoteo 1:8, 9.

“Na silafia e le Atua mea e tutupu i le lumana’i, a’o le’i foafoaina le lalolagi. Na te lē’i faia Ana fuafuaga ina ia fa’afetaui ma mea e tutupu, peita’i na Ia fa’atagaina mea tutupu ina ia fa’aalia pea ma galuea’iina. Na te le’i galue ina ia aumaia ai se tulaga fa’apitoa o mea tutupu, peita’i na Ia silafia o se tulaga fa’apea o le a tula’i mai. O le fuafuaga e tatau ona fa’ataunu’uina i le liliu ese o so’o se tasi o agelu i tulaga maualuluga o le lagi – o le mea lilo lenei, o le mea lilo lea sa natia mai i tausaga o le vavau. Ma na saunia ai loa se taulaga ofo i fuafuaga e fa’avavau na te faia le galuega tonu lava lea ua faia e le Atua mo le aigā tagata pa’ū.” – *The Signs of the Times*, March 25, 1897.

c. O fea e sau ai le fa’atuatua i le Atua? Roma 10:17; 1 Peteru 1:21.

“E leai se tagata e mafai ona ia foafoaina le fa’atuatua. O le Agaga o lo o galue ma fa’amalamalamaina ai le mafaufau fa’aletagata, na te foafoaina le fa’atuatua i le Atua. I totonu o le Tusi Paia, o le fa’atuatua o loo fa’ailoaina mai e fa’apea, o le meaalofa lea a le Atua, e mamana e o’o atu ai i le fa’aolataga, e fa’amalamalamaina ai loto o i latou e sa’ili mo le upu moni e peisea’i o se oa natia. O le Agaga o le Atua na te fa’ama’otiina mai le upu moni i le loto. O le tala lelei o loo fa’aigoaina o le mana o le Atua e o’o atu ai i le fa’aolataga auā, e na o le Atua lava e mafai ona Ia faia le upu moni e avea o se mana e fa’apaiaina ai le loto.” – *The SDA Bible Commentary* [E. G. White Comments], vol. 7, p. 940.

Aso Tofi

Aperila 18

5. O LE PALE O LE USITA’I

a. Ina ua mavae ona aioi mai le aposetolo i le au talitonu ina ia tete’e atu i o tatou tu’inauga ua mavae, o le a le sini ua ia tu’uina mai o le ituaiga usita’i silisili lea? 1 Peteru 1:22.

“Na fa’aauau le fa’amatalaga a Peteru, ‘ia matuā outou alofa le tasi i le tasi i le loto mamā naunau.’ O le upu a le Atua – le upu moni – o le auala lea e fa’aalia ai e le Atua Lona Agaga ma Lona mana. O le usita’i i le upu e fanau mai ai fua o le amio lea e mana’omia – ‘o le alofa lē fa’atagā fai, lē fa’afoliga lea i le au uso.’ O lenei alofa e fanau mai i le lagi ma e ta’ita’ia atu ai i sini maualuluga ma gaoiga lē fa’apito.” – *The Acts of the Apostles*, p. 519.

“‘Ua outou fa’amamā i o outou loto i le gaua’i i le upu moni e le Agaga ua i’u i le alofa fa’amaoni i le au uso.’ . . . O le a matuā tāua tele la, ia i latou uma lava e tauaveina le galuega, o i latou e asiasi i aiga ma tufa atu pepa o tusitusiga ma i latou e galulue i ofisa, lo latou fa’atumauiina ma lo latou fa’atinoaina ma le fa’amaoni o tapula’a e sili ona maualuga ma paia o le Upu a le Atua.” – *The Publishing Ministry*, p. 297.

“Tatou te mana’omia ia teufatuina le alofa i totonu o o tatou loto. E le tataua ona tatou sauni e manatu i mea leaga e fa’atatau i lo tatou au uso. E tataua ona matuā itiiti lava lo tatou fa’auigaina o mea latou te faia poo upu fo’i latou te tautala ai. E tataua ona avea i tatou ma kerisiano o le Tusi Paia. [1 Peteru 1:22]. . . .

“E tataua ona tatou fesiligia le amio po’o uiga o o tatou manatu ma lagona, o o tatou lagona ita, sini, upu, ma gaoiga. . . . Se’ivagana ua tatou sa’ili ma le finafinai i le va’iliiliina o o tatou loto i le malamalama o le Upu a le Atua, o le alofa o le tagata ia te ia lava, o le a fa’ailoa maia se manatu e matuā sili atu ona lelei e fa’atatau ia i tatou lava nai lo manatu e tataua ona tatou maua.” – *This Day With God*, p. 83.

“Ana fa’apea e lē o i ai ni mea e lē o atoatoa ai i tatou i o tatou lava olaga, semanu tatou tatou te lē masalosalo fua i lo tatou au uso. O le tagata lea o loo fa’asalaina o ia e lona lava malamalama’aga e iloa ai le lelei ma le leaga, lea e matuā naunau lava e fa’amasino. Ia gatete tagata ta’itasi uma ma ia fefe ia te ia lava. . . . ‘Ua outou fa’amamā i o outou loto i le gaua’i i le upu moni e le Agaga ua i’u i le alofa fa’amaoni i le au uso.’” – *The Review and Herald*, October 29, 1901.

Aso Faraile

Aperila 19

FESILI TOE FA’AMANATU

1. O le a le mea e tatau ona ou faia pe a ulufale mai se manatu agasala pe lē mamā i lo'u mafaufau?
2. E fa'afia ona tatau ona ou su'esu'eina lo'u loto e fa'atatau i le natura o le mafua'aga o'u te faia ai se gaioga?
3. E fa'apefea ona mafai ona ou fausiaina a'e se lagona sili atu ona loloto o le amio mamā i lo'u olaga?
4. O le a se mea e mafai ona sili atu le fausiaina a'e ai o lo'u agaga fa'afetai mo le tau na totogiina e Iesu mo a'u?
5. O le a le moni o lo'u alofa i lo'u 'au uso?

Lesona 4

Sapati, Aperila 27, 2024

O Le Upu a le Atua

MAU TAULOTO: “E fa'apei o tama meamea fa'ato'a fanau mai, ia naunau outou i le suasusu e lē suia o le upu, ina ia outou tutupu ai” (1 Peteru 2:2).

“O le upu a le Atua o le fatu lea. O fatu ta'itasi uma lava o loo i ai i totonu ia te ia se tapula'a e ola a'e ai. O totonu o le fatu e mātala a'e ai le ola o le la'au. E fa'apena fo'i ona i ai le ola i totonu o le upu a le Atua.” – *Christ's Object Lessons*, p. 38.

Faitauga Fautuaina: *Messages to Young People*, pp. 189-191.

Ulua'i Aso

Aperila 21

1. O SE MANA'OGA E TATAU MA E MANA'OMIA

- a. O le a le aiaiga e mana'omia o le fa'aolataga na fa'ailoa atu e Iesu ia i latou na fa'alologologo mai i Ana fetalaiga? Ioane 3:5-7; Mataio 18:1-3.
- b. O le a se mea ua fa'asino atu i ai Peteru o se auala lea e mafai ai ona tatou liua (toe fanau)? 1 Peteru 1:23.

“O le suiga o le loto lea e avea ai i tatou ma fanau a le Atua, o loo fa'aigoaina i totonu o le Tusi Paia, o le fanau mai. . .

“A avea loa le upu moni o se tapula'a tumau i le olaga, ua 'toe fanau loa le tagata, e lē o le toe fanaufouina i le fua e pala, a'o le fua e lē pala lava, o le fanaufouina lea e le upu a le Atua, lea e soifua ma tumau e fa'avavau.’ O lenei fanaufouina o le i'uga lea o le taliaina o Keriso o Ia o le upu a le Atua. Ona fa'amausaliina lea e le Agaga Paia upu moni fa'alelagi i le loto, ua fafaguina malamalamaaga fou, ma o malosia na o'o mai i le taimi lea e lē o fa'aaogaina, ua fafaguina nei ina ia galulue fa'atasi ma le Atua. . . . O Keriso o Ia na fa'ailoaina upu moni i le lalolagi. E ala mai ia te ia, o le fua e lē pala lava – o le Upu lea a le Atua – na lulūina i totonu o loto o tagata.

“O le Upu na te fa’aumatiaina le natura fa’alelalolagi, ma foa’i mai se ola fou i totonu ia Keriso Iesu – le fa’atusa fa’alelagi lea.” – *The Faith I Live By*, p. 19.

Aso Gafua

Aperila 22

2. OLA E FA’AVAVAU FA’AFEAGAI MA LE OLA LĒ TUMAU MA O LE FUA E PALA

- a. **O a upu fa’avalō’aga na si’itia mai e Peteru ina ua ia tautala e fa’atatau i le fa’atauva’a tele o le ola o le tagata? 1 Peteru 1:24; Isaia 40:6-8.**
- b. **I le Tusi Paia atoa, o le a se mea o loo fa’atusalia i ai le ola o se tagata – ma aisea fo’i? Salamo 103:15, 16; Iakopo 4:14.**

“E leai so tatou taimi e fa’ama’imauina. Tatou te lē iloa po’o afea e tapunia ai lo tatou nofo va’ava’aia. O le taimi sili ona umi, ua na o sina taimi pupu’u lava lea o lo tatou olaga iinei, ma tatou te lē iloa po’o le a le vave o le a taia ai e le ū a le oti o tatou fatu. . . .

“Ua tatou sauni ea? Ua tatou fa’amasani ea ma le Atua, le Pule o le lagi, o Lē na tu’uina mai le tulafono, fa’atasi ai ma Iesu Keriso o Lē na Ia auina mai i le lalolagi e fai Mona sui? A muta loa le galuega o lo tatou olaga, o le a mafai ea ona tatou fa’apea ifo, e fa’apei ona fetalaia e Keriso lo tatou fa’aa’oa’o: ‘Ua ou tu’u atu le viiga ia te Oe i luga o le fogaeleele: ua ou fa’aumaina le galuega na Ē tu’uina mai ia te a’u ou te faia. . . . ua ou fa’aalia Lou Suafa’? Ioane 17:4-6.” – *The Ministry of Healing*, p. 454.

- c. **I le fa’atusatusa atu i le olaga fa’aletagata e fa’apei o le mutia ma le ausa, o le a se mea e tumau e fa’avavau e fa’apei o le Atua? 1 Peteru 1:25; Salamo 119:89.**

“Na fai mai le fetalaiga a Iesu, E fa’apei o kamuta o nei fale o loo i luga o le papa, e fa’apenā fo’i lē o le a taliaina upu ua Ou fai atu ai ia te outou, ma faia ai ia upu o le fa’avae o lana amio ma lona olaga. O seneturi e tele ua mavae, na tusia ai e le perofeta o Isaia, ‘O le upu a lo tatou Atua o le a tumau e fa’avavau’ (Isaia 40:8); ma o Peteru fo’i, i se taimi umi lava mulimuli ane ina ua mavae le Lauga i luga o le Mauga, o lona toe tautalagia mai o nei upu a Isaia na ia fai mai ai, ‘O le Upu lenei ua folafolaina atu e le tala lelei ia te outou’ (1 Peteru 1:25). O le Upu a le Atua e na o le pau lava lea o le fa’avae mausali ua iloa e lo tatou lalolagi. O le fa’avae mautinoa lea. Na fetalai mai Iesu, ‘O le a mavae atu le lagi ma le lalolagi, a’o A’u Upu o le a lē mavae atu lava.’ Mataio 24:35. . . .

“I le taliaina o le upu, tatou te talia ai Keriso. Ma e na o i latou lava o loo fa’apena ona latou talia Lana upu, o i latou na o loo fausia i luga ia te Ia. . . . O Keriso, le Upu, o le fa’aaliga lea o le Atua – o le fa’aaliga lea o Lana amio, Lana tulafono, Lana alofa, Lana soifuaga – e na o le pau lava lea o le fa’avae e mafai ona tatou fausia ai i luga se amio o le a tumau.

“Tatou te fausia i luga ia Keriso e ala i lo tatou usita’i i Lana upu. . . . O le fa’apaiaina. . . . o le i’uga lea o le gaua’iina atu o mea uma lava i le Atua.” – *Thoughts From the Mount of Blessing*, pp. 148, 149.

3. AVEESEA O MEA O LOO TAUTEVATEVA AI

a. Ta’u mai ni mea e tautevateva ai o loo fa’alavelaveina ai i tatou mai i lo tatou taliaina o le Upu a le Atua e fa’apei ona i ai i totonu ia Iesu. 1 Peteru 2:1, 2.

“Ia talia i totonu o ō outou loto atoa, upu a Keriso, ma ia avea outou o ni tagata e faia Ana upu. E lē mafai ona tatou maua fa’amanuiaga e mafai ona aumaia e le alofa ma le fa’atasi mai o Keriso, pe afai tatou te teufatuina lagona o le a fa’aleagaina ai le loto gatasi lea sa tatalo ai Keriso ina ia i ai i le lotolotoi o Ona so’o.” – *The Review and Herald*, July 25, 1893.

“O i tatou lava lea e tatau ona tatou fa’ato’ilaloina. Ia matuā faitioina lava lou loto. Sai’li’ili lou loto ina ia ē iloa ai poo a mea o loo fa’alavelaveina ai le ulufale sa’oloto mai o le Agaga o le Atua.” – *Our High Calling*, p. 21.

“E lē tatau ona tautala sauā lē fa’aaloalo, e lē tatau ona otegia i se uiga ita lē fiafia, auā o agelu a le Atua o loo savavali atu ma toe fo’i mai i totonu o potu ta’itasi. . . . Atonu e faia mea sese laiti, peita’i o upu o a’oa’iga e fa’asā ai, e fafaguina ai lagona o le tauimasui, ma ua lē vi’ia ai le Atua. . . . So’o se upu lava e tautalagia ma le lē manatunatu lelei po o le tautalagia fo’i e aunoa ma le fa’autauta, e tatau ona fa’alēaogaina i le taimi lava lena. . . . O la tatou galuega lenei.” – *In Heavenly Places*, p. 182.

b. Aumai fa’ata’ita’iga o auala ua taofia ai tagata e le ita loto tiga lē lafoa’ia, pepelo, ma le matau’a, mai i lo latou taliaina o le Upu a le Atua. Kenese 4:5-8; Mareko 15:10; Galuega 13:44, 45.

“O a tatou tatalo e foliga mai e lē taliina mai i le taimi lava e tatalo ai. . . . A tatou aioi atu ia te Ia, atonu Na te silafia e aoga mo i tatou le su’esu’e o ō tatou loto ma salamō mai i le agasala. O lea na te avatua ai i tatou i tofotofoga. Na te aumaia i tatou i le fa’alumaina, ina ia tatou iloa ai le mea o loo fa’alavelaveina ai le galuega a Lona Agaga Paia e ala atu ia i tatou.” – *Christ’s Object Lessons*, p. 143.

“O le loto matau’a e lē na o se uiga leaga lē pulea lea, ae o se uiga leaga na te fa’alavelaveina ma fa’aleagaina le fa’atulagaga o tomai uma lava. . . .

“O le tagata matau’a loto leaga na te punitia ona mata i uiga lelei ma galuega lelei a isi. Na te sauni lava i taimi uma e ta’ufa’atauva’aina ma fa’auigaseseina uiga ia e sili ona lelei. O tagata e masani lava ona latou fa’aalia ma lafoa’iina isi sese, peita’i e matuā itiiti lava si fa’amoemoe e ono maua mai i le tagata matau’a loto leaga. Talu ai ona o le matau’a loto leaga i se tagata, o le ioeina lea o le sili a’e o lena tagata nai lo a’u, o lea o le a lē fa’atagaina ai e le fa’amaualuga loto vi’i so’o se maliega lava. Afai e faia se taumafaiga ina ia fa’atalitonu ai le tagata matau’a i lana agasala, e atili ai lona ita leaga lē fa’amalieina. . . .

“O le tagata anovale loto leaga na te fa’asalalauina le ‘ona i soo se mea lava e alu i ai, ma fa’amāsesei ai uo, ma save’u a’e ai le ita ma le fouvale i le Atua ma le tagata.” – *Testimonies for the Church*, vol. 5, p. 56.

4. NAUNAU I LE SUASUSU MONI O LE UPU

a. Ina ua mavae ona fa’asino atu Peteru i le Upu a le Atua o se mana lea e fa’aliliuina ai o tatou agaga, o le a le ituaiga “fa’anaunauga” o loo ia augani mai ia tatou fa’atinoina? 1 Peteru 2:2.

“O le fa’atāuaina o le Tusi Paia e fa’atupulaia i lona su’esu’eina. . . .

“E leai lava se isi mea ua fuafuaina e fa’amalosia ai le mafaufau nai lo le su’esu’eina o le Tusi Paia. E leai lava se isi tusi e sili ona malosia e si’itia a’e ai manatunatuga, e avatua ai le malosia i tomai, e fa’apei o upu moni lautele o le Tusi Paia e fa’amamaluina ai. Ana fa’apea e su’esu’eina le Upu a le Atua e pei o le tulaga e tataua ona i ai, semanu o le a matuā lautele le malamalama’aga o le mafaufau, ma se amio mamalu, lea ua seāseā va’aia i le taimi leni.

“E leai se iloa e sili ona mausali, e sili ona tumau, ma sili ona lautele ona o’oo’oga, e fa’apei o le iloa e maua mai i le su’esu’eina o le Upu a le Atua.” – *In Heavenly Places*, p. 135.

b. Ta’u mai se tasi o mafua’aga e ala ai ona mumusu tagata e su’esu’e le Upu a le Atua. Ioane 3:19, 20.

“Ua ē fa’atalalē i le Tusi Paia. Ua ē inoino ma te’ena molimau auā latou te a’oa’iina au agasala fa’apelepele ma fa’alavelave ai i lou olaga fa’afifilemu.” – *Testimonies for the Church*, vol. 5, p. 49.

c. O le a se mea na fa’aaluina i ai e le to’atele o tagata su’esu’e o manatu fa’alemaufau o Atenai, lo latou taimi atoa lava, ma o le a se fa’afitauli fa’apea o loo feagaiga ma i tatou i le taimi leni, aemaise ai lava le lē fai fa’atatau lelei i le fa’aaogaina o le initaneti ma auala eseese o fa’asalalauga? Galuega 2:21-23, 32; 2 Korinito 4:3, 4.

“Oka, ma’imau e, pe ana manatunatu talavou i le a’afiaga e faia i le mafaufau, e tala fa’aoso lagona. E mafai ea ona ē tatalaina le Upu a le Atua ma faitau i upu o le ola ma le naunau, pe a uma ona faitauina tusi fa’apena? E te lē iloa ea ua ē lē naunau i le tusi a le Atua?” – *The Adventist Home*, p. 416.

“E to’atele o loo latou fa’avaivaia le mafaufau e ala i lo latou faitauina o tala ma tusi o tala lē moni, ma ua leai ai so latou fiafia mo le upu a le Atua. Ua avea i latou o ni tagata onanā, ma o le a lē mafai ona latou va’ai i fesili tāua o le olaga ma le taunu’uga i le malamalama sa’o, se’ivagana ua latou tu’ueseina leni masaniga.” – *The Review and Herald*, April 14, 1891.

5. TUPU A'E FA'ALEAGAGA

a. O le a le mea e lē mafai ona tatou faia pe afai tatou te lē tumau i le avea o i tatou ma tagata su'esu'e finafinau o le upu a le Atua? 2 Peteru 3:18 (vaega muamua).

“Na apoapoa’i atu le aposetolo i tagata talitonu ina ia latou su’esu’eina le Tusi Paia, e ala i se malamalama’aga tatau e mafai ona latou faia ai le galuega mautinoa mo le ola e fa’avavau. Na iloa e Peteru, o le iloa o tagata ta’itasi uma lava lea o le a manumalo mulimuli lava, o le a i ai va’aiga o le lē malamalama ma tofotofoga; peita’i na ia iloa fo’i o se malamalama’aga e fa’atatau i le Tusi Paia, o le a mafai ai e lē o loo fa’aosoosoina ona manatua folafolaga ia o le a fa’amafanafanaina ai le loto ma fa’amalosia ai le fa’atuatua i le Atua malosi.” – *The Acts of the Apostles*, p. 521.

b. O le a le lamatiaga o loo i ai i latou ua tofo “e agalelei le Ali’i” peita’i latou te fa’atalale i le tu’uina o le upu a le Atua i o latou loto? 1 Peteru 2:3; Eperu 6:4-6.

“E to’atele o loo va’ava’ai ifo ma le loto fa’amalieina o i latou lava i tausaga uumi na latou lagolagoina ai le upu moni. O lenei ua latou manatu ua tatau ona latou maua se tau mo ō latou tofotofoga ma lo latou usita’i i le taimi ua mavae. Peita’i o lenei iloa fa’amaoni i mea a le Atua i le taimi ua tuana’i, ua sili atu ai ona latou agasala i Ona luma mo le lē fa’atumauina o lo latou fa’amaoni ma aga’i ai i luma i le atoaga. O le fa’amaoni mo le tausaga ua mavae o le a lē mafai lava ona togiolaina ai le fa’atalale o le tausaga lenei. O le fa’amaoni o se tagata ananafi, o le a lē togiolaina ai lona pepelo i le aso lenei.” – *Testimonies for the Church*, vol. 5, p. 63.

“Ia tatou sa’ilia ta’ito’atasi nei le Ali’i. O i latou sa na o se galuega tafitafi-aluga lo latou olaga fa’aletapua’iga i le taimi ua mavae, ia latou fa’alatalata atu nei i le Atua.” – *Ibid.*, vol. 9, p. 216.

FESILI TOE FA'AMANATU

1. O a fua o se liuaga moni?
2. E fa’apefea ona mafai ona ou iloa po ua ou sauni e fetaia’i ma le Alii pe afai ou te oti i le po lenei?
3. E i ai ea se tuagane po’o se uso i totonu o le ekalesia ou te lē fiafia i ai? Afai e i ai, aisea? Pe o le mafua’aga ea o lo’u lē fiafia ia i latou, o le fuā loto leaga poo le matau’a anovale?
4. E fa’afia ona tatau ona fautuaina mo a’u ina ia faia a’u su’esu’ega fa’ale-Tusi Paia?
5. Fa’amatala le eseese o le tupu a’e i totonu ia Keriso ma le leai o se ola tuputupu a’e?

Taulaga Sapati Muamua mo Misiona i le Lalolagi

O lo o tula’i le lagi i le to’asa tele i le fa’atalalē o loo fa’ailoa atu i agaga o tagata. O le a tatou iloa ea le finagalo o Keriso e fa’atatau i lenei uiga? O le a le lagona o le a o’o i le tamā ma le tinā, pe ana fa’apea la te iloa o le la tama, lea ua leiloa i le malūlū ma le timu aisa, ua lē amanaiaina, ma ua tu’ua ina ia fano, e i latou sa ono mafai ona lavea’iina o ia?” – *The Desire of Ages*, p. 825.

A tatou tautala fa’ale-agaga, o ai nei fanau “o loo leiloa i le malūlū ma le timu aisa”? “E miliona ma miliona tagata o loo sauni e fano, o loo fusifusia i filifili o le lē malamalama ma le agasala, latou te lē’i fa’alogo lava e fa’atatau i le alofa o Keriso mo i latou. Ana fa’apea e fesuia’i o tatou tulaga ma i latou, o le a se mea o le a tatou manana’o latou te faia mo i tatou? O mea uma lava la nei, i le lautele e mafai ai e lo tatou malosi ona tatou faia ai, ua tatou i lalo o le matafaioi sili ona tāua, ina ia tatou faia mo i latou.” – *Ibid.*, p. 640.

“O so’o se mea lava e tataua ona susulu atu i ai le malamalama o le upu moni, ina ia fafaguina ma ia liua loto ia o loo momoe i le lē malamalama. I atunu’u uma lava ma aai uma lava e tataua ona folafolaina ai le tala lelei.” – *Evangelism*, p. 19.

E fa’apefea la ona latou vala’au atu ia te Ia o Lē latou te lē’i talitonu i ai? ae e fa’apefea fo’i ona latou talitonu ia te Ia o Lē latou te lē’i fa’alogo lava i ai? ae e fa’apefea ona latou fa’alogo e aunoa ma se tagata e tala’i atu ia i latou? Ma o le a fa’apefea ona latou tala’i atu pe afai e lē auina atu i latou?” (Roma 10:14, 15, vaega muamua).

“O le tala’iga e tu’uina atu i le lalolagi atoa, ua mana’omia i le taimi lenei, manū o mātala pea faitoto’a. E moni lava, o le itula lenei e mafai moni ai lava ona tatou toe tautalagia upu a Iesu: “E tataua ona ou faia galuega a Lē na auina mai a’u, manū o ao: auā e sau le po, e lē toe mafai ai ona galue se tasi. A’o o’u i ai i le lalolagi, o A’u o le malamalama o le lalolagi” (Ioane 9:4, 5).

“E lē o tagata uma e mafai ona o atu i nofoaga uma lava e mana’omia e o’o atu i ai le feau i luga o lenei paneta pogisa. Peita’i o le aveina atu o lenei feau, e i ai lona tau e manaomia mai ia i tatou uma lava: O le Taimi, mafaufau naunauta’i fa’autauta, malosi, ma tupe e tataua ona foa’iina ma le loto i lenei galuega se’ia o’o ina fa’amalamalamaina le lalolagi atoa lava i le pupula o le Atua. O lou loto foa’i fa’amaoni i galuega i le lalolagi atoa e mafai ona faia ai se suiga tele lava!

O lo Outou Au Uso mai i le Koneferenisi Aoao

Ma'a Ola

MAU TAULOTO: “O outou fo’i, ua atiina a’e outou pei o ma’a ola o le fale fa’aleagaga, o le au ositaulaga paia, e avatu taulaga fasia fa’aleagaga e malie i le Atua ona o Iesu Keriso (1 Peteru 2:5).

“O i latou e malamalama i le upu moni mo le taimi lenei, e tatau ona latou manatunatu lelei pe fa’aapefea la latou fa’alogo pe fa’aapefea fo’i ona latou fausia a’e ma a’oa’o atu i isi i mea e tatau ona fa’atinoina.” – *Selected Messages*, bk. 3, p. 22.

Faitauga Fautuaina: *The Spirit of Prophecy*, vol. 2, pp. 272-274.

Ulua’i Aso

Aperila 28

1. FA’AATAINA MAI I LE TAIMI UA MAVAE

a. O le fa’atatau atu o le fa’amatalaga a Peteru i le valo’aga a Isaia (Isaia 28:16), o fa’aapefea ona ia fa’amatalaina mai Iesu Keriso? 1 Peteru 2:4, 6.

b. O le a le mea na tupu fa’ale-tala’aga o loo fausia ai lenei ata? 1 Peteru 2:7.

“I le fausiaina o le malumalu o Solomona, o ma’a na saunia atoa lava i le nofoaga na aumaia ai, auā ina ua aumaia nei ma’a . . . na pau lava le galuega a tane faigaluega e tatau ona fai, o le tu’uina lea o ma’a i o latou tulaga. . . .

“E lē’i fa’atagaina se mea faigaluega e fa’aaogaina i ma’a ina ua aumaia i le nofoaga na fausia ai le malumalu. E tasi le ma’a e lē tutusa ona itu na aumaia mai i le nofoaga na aumaia ai ma’a, ina ia fa’aaogaina i le fa’avae o le malumalu. Peita’i e lē’i mafai ona maua e le afaigaluega se nofoaga mo lenei ma’a. . . . Na ta’atia ai iina lenei ma’a e lē’i fa’aaogaina, ma sa feoa’i ta’amilo ane ai le afaigaluega pe lāvea ane ai fo’i, ma na latou matuā lē fiafia tele i lona ta’atia ai iina. Sa leva ona avea ma ma’a ua lafoa’iina. Peita’i ina ua o’o mai kamuta fau fale i le ta’atiaina o le ma’a tulimanu, na umi se taimi o latou sa’ili ma le lē fa’amanuiaina mo se ma’a e lava lona malosi ma lona telē . . . [na te] tauaveina le mamafa tele lea o le a tu’u mai i ona luga. Afai latou te faia se filifiliga lē poto o se ma’a mo lenei nofoaga taua, o lona uiga o le a lamatia le saogalemu o le fale atoa lava. . . .

“O mafaufau o le kamuta fau fale na mulimuli lava ona taula’i ane i lenei ma’a telē, ma na latou va’iliiliina ma le fa’aeteete. Ua uma ona tauaveina e lenei ma’a tofotofoga ta’itasi uma lava. . . . Na taliaina loa le ma’a, ma aumaia loa i lona tulaga fuafuaina ma sa iloa ai, na fetau lelei lava.” – *The Spirit of Prophecy*, vol. 3, pp. 36, 37.

2. O LE MA'A TULIMANU AUTU

a. E ui lava ina fa'aigoaina e Iesu Simona ia "Sefa," o lona uiga "o se ma'a" (Ioane 1:42; Mataio 16:18, 19), Aisea na lē mafai ai ona avea Peteru "o le papa" lea na fausia ai i luga e Keriso Lana ekalesia? Mataio 26:73, 74; Kalatia 2:11-13.

"O Peteru a vave ma finafinai i gaoiga, e toa ma e lē-maliliu; ma na silafia e Keriso i totonu ia te ia uiga o le a tele lona aoga i le ekalesia." – *Testimonies for the Church*, vol. 4, p. 488.

"O Peteru e lē o ia lea o le papa lea na fa'avaeina ai i luga le ekalesia. O faitoto'a o seoli na manumalo ia te ia ina ua ia fa'afitia lona Ali'i i upu fetu'u ma upu leaga. O le ekalesia na fa'avaeina i luga o Lē na lē mafai e faitoto'a o seoli ona manumalo i ai." *The Desire of Ages*, p. 413.

"E lē'i fetalai Keriso e fa'atatau ia Peteru e fa'apea o ia o le papa lea o le a ia fa'avaeina ai Lana ekalesia. O Lana fetalai lea, 'o lenei papa,' na fa'atatau ia te *Ia lava* o le fa'avae lea o le ekalesia Kerisiano. I le Isaia 28:16, o loo fetalai ai fo'i le igoa lava lea e tasi. . . . O le ma'a lava lea o loo tautalagia e fa'atatau i ai i le Luka 20:17, 18. . . . E fa'apena fo'i i le Mareko 12:10, 11. . . .

"O nei mau o loo fa'amaonia mautinoa mai ai e fa'apea, o Keriso o le papa lea o loo fausiaina ai i luga le ekalesia." – *The Spirit of Prophecy*, vol. 2, pp. 272, 273.

b. Aumai fa'amaoniga e iloa ai, e aunoa ma le avea o Peteru ma fa'avae o le ekalesia, ua na o ia o se tasi o le au uso eseese sa i tulaga ta'ita'i. Kalatia 2:9; 1 Peteru 5:1; Efeso 2:20, 21.

"O Iakopo na ta'ita'i i le fonotaga [Galuega 15], ma o lana filifiliga mulimuli lenei, 'O lenei, o lo'u lea manatu, ia soia le fa'alavelave ia i latou [tagata o nu'u ese].' . . .

"O lenei manatu na muta ai le talanoaga. I lenei fa'ata'ita'iga ua tatou maua ai se fa'amaoniga o se sesē o le mataupu na umia e le ekalesia Katoliko Roma e fa'apea, o Peteru o ia o le ulu o le ekalesia. . . . E leai ma se mea i le olaga o Peteru na tu'uina mai ai se fa'atagaga i le fa'amatalaga fa'apea na si'itiaina o ia i luga a'e o lona au uso e avea ma sui o Lē Silisiliese." – *The Acts of the Apostles*, pp. 194, 195.

c. O ai na manatu Peteru e na o le pau lava lena o le papa mausali ma o le fa'avae moni o le ekalesia? 1 Peteru 2:3-6.

3. O SE MA'A E TAUTEVATEVA AI

a. Ta'u mai se uiga e tasi ua tu'uina atu ia Iesu ma e fa'apefea ona feso'ota'i atu i le feau o le tala lelei mo tagata agasala. 1 Peteru 2:4 (vaega muamua), 7.

“A’o tautalagia le upu o le ola, ia molimau a outou tali mai i o outou loto e fa’apea, ua outou talia le feau e peisea’i ua fetalai mai i le lagi. O lenei tulaga o se masaniga lava mai i anamua, ou te iloa; peita’i o le a avea o se taulaga ofo fa’afetai i le Atua mo le areto o le ola ua foa’iina mai i le tagata fia ‘ai. O lenei tali atu i le musumusuga a le Agaga Paia o le a avea o se malosi i lou lava agaga ma o se fa’amalosiaga fo’i i isi. O le a tu’uina atu ai ni fa’amaoniga e iloa ai, o loo i ai i totonu o le fale o le Atua ma’a ola o loo fa’asusuluina atu le malamalama.” – *Testimonies for the Church*, vol. 6, p. 367.

b. E fa’apefea ona tatou iloa, e o’o lava ia i latou o loo iloa le upu moni mo le taimi lenei, o loo lamatia i latou i le “tautevateva i le upu”? Roma 9:31-33; 1 Peteru 2:8.

“O le Ali’i i Lona alofa tele na Ia auina mai ai se feau sili ona tāua i Ona tagata e ala mai i toea’i’ina o Waggoner ma Jones [i le Koneferenisi Aoao a le Ekalesia Aso Fitu na faia i Minneapolis i le 1888]. O lenei feau na fuafuaina ina ia aumaia ai le Fa’aola si’itiaina a’e i luma o le lalolagi i se tulaga sili atu ona ma’oti, o le taulaga fasia mo agasala a le lalolagi atoa. Na fa’ailoa mai ai le amiotonu e ala i le fa’atuatua i le Fa’aola; na vala’auliaina ai tagata ina ia latou talia le amiotonu a Keriso, lea e fa’aalia i le usita’i i poloa’iga uma lava a le Atua. E to’atele ua lē toe iloa atu Iesu. Latou te mana’omia ina ia taula’i atu o latou mata i Lona peresona fa’alelagi, o Lana amiotonu, ma Lona alofa lē-masuaia.” – *Testimonies to Ministers*, pp. 91, 92.

“O nisi ua latou fausiaina a’e le ita i tane na filifilia e le Atua e tauaveina se feau fa’apitoa i le lalolagi. Na latou amatalia lenei galuega fa’asatani i Minneapolis. Mulimuli ane, ina ua latou iloa ma lagonaina le fa’aaliga o le Agaga Paia o molimau fa’apea o le feau e aumai i le Atua, na atili ai ona latou feita i ai, auā o se molimau lea e tete’e ai ia i latou. Latou te lē’i manana’o e fa’amaulalo o latou loto ina ia salamo.” – *Ibid.* pp. 79, 80.

“Na fa’ailoaina mai ia te a’u le tulaga maulalo o tagata o le Atua . . . na latou o ese mai ia te Ia, ma ua latou fa’aleogalua. O loo ia i latou le fa’amatalaina o le upu moni, peita’i e lē o ia i latou lona mana e lavea’iina ai.” – *Testimonies for the Church*, vol. 1, p. 210.

“O le feau i le ekalesia i Laotikaia, e fetau lelei lava i lo tatou tulaga o loo i ai nei. E matuā manino lava le fa’aatina mai o le tulaga o i latou o loo manatu o loo ia i latou le upu moni atoa lava, ma latou te fa’amauualuluga i lo latou iloa e fa’atatau i le Upu a le Atua, a’o lona mana e fa’apaiaina ai, e lē’i lagonaina i o latou olaga.” – *Faith and Works*, pp. 82, 83.

Aso Lulu

Me 1

4. AVEA MA MA’A MATAALA (OLA)

a. O fa’apefea ona fa’aata mai e Peteru le tuputupu a’e fa’akerisiano? 1 Peteru 2:5.

b. O le a le uiga o le avea ma “ma’a mataala” i totonu o le fale fa’ale-agaga o le Atua? Efeso 4:13, 15, 16. Fa’atusatusa i le Fa’aaliga 3:1 (vaega mulimuli), 2.

workshop

“E tatau ona tatou galulue fa’atasi ma nei tane e matuā atamamai. . . . O nei ma’a salafalafa tatou te aumaia pe afai e mafai ai, i totonu o le falea’oga o le Atua, le nofoaga lea o le a fa’amafolafolaina ma fa’asikueaina ai i latou, ma aveesea ai vaega salafalafa uma, ma fa’ai’ilaina ai i latou i lalo o le aao fa’alelagi se’ia o’o ina avea ma ma’a tāua i totonu o le malumalu o le Atua, ma o le a avea ma ma’a ola e fa’apupulaina atu le malamalama. O le a fa’apena ona mafai ona latou tutupu a’e e avea o se malumalu paia mo le Atua.” – *Evangelism*, p. 573.

“O le a lē talia e le Ali’i se auaunaga e lē faia ma le loto, o se fa’asologa o sauniga e lē o i ai moni lava Keriso. O Ana fanau e tatau ona avea ma ma’a mataala ola i totonu o le fale o le Atua. Afai o le a tu’uina atu atoatoa e tagata uma i latou i le Atua, afai o le a fa’amuta lo latou su’esu’e ma fuafua mo ō latou lava fiafiaga, mo tafāoga, ma feso’ota’iga o le mana’o i fiafiaga, ma o le a latou su’esu’eina ai Upu, . . . o le a latou lē fia aai lava pe fia feinu mana’ona’o fo’i mo lagona o fiafiaga oso poo se suiga fo’i. Afai e mo lo tatou naunauta’iga moni lava lo tatou manuia fa’aleagaga, ma, afai o le fa’aolataga o ō tatou tagata e fa’alagolago i lo tatou mausali i luga o le Papa e Fa’avavau, o le a lē sili atu ea ona tatou galulue i lo tatou sa’ili mo le Papa lea o le a taofia atu le fale atoa i le ma’a tulimanu autu, ina ia tatou lē nunumi ma lē malamalama ai i lo tatou fa’atuatua.” – *Fundamentals of Christian Education*, pp. 461, 462.

c. O le a le “taulaga fasia fa’aleagaga” e sili ona lelei e mafai ona tatou ofoina atu i le Atua? 1 Peteru 2:5 (vaega mulimuli); Salamo 51:17; 1 Samuelu 15:22 (vaega lona lua).

“O taulaga mu ma taulaga fasia e lē’i talia e le Atua i taimi anamua se’ivagana ua sa’o le agaga na ofoina ai le meaalofa. Na fai mai Samuelu: ‘... Fa’auta, o le usita’i e sili lea nai lo taulaga fasia, ma le gaua’i e sili lea nai lo le ga’o o mamoe po’a.’ O tupe uma lava i luga o le fogaeleele, e lē mafai ona fa’atauina ai le fa’amanuiaga a le Atua pe fa’amautinoaina ai fo’i ia te oe se manumalo e tasi lava.

“E to’atele tagata e manana’o e faia so’o se taulaga fasia, ma taulaga fasia uma lava, peita’i latou te lē faia le taulaga fasia tonu lava lea e *tatau* ona latou faia, o le gaua’iina atu lea e i latou o i latou lava, ina ia gaua’i atu o latou loto i le finagalo o le Atua.” – *Testimonies for the Church*, vol. 4, p. 84.

Aso Tofi

Me 2

5. O I TATOU EA O TAGATA MONI IA TATOU TE TA’UTINOINA

a. O a upu o le Tusi Paia tatou te fa’avi’ivi’iina ai i tatou lava? 1 Peteru 2:9 (vaega muamua), 10.

b. O le a le vasega o tagata e na o i latou lava ia e mafai ona fa’atatau i ai upu ia mai i le 1 Peteru 2:9? 1 Peteru 2:5, 9 (vaega mulimuli); Mataiao 5:16; Roma 2:28, 29.

“O le tagata e fa’amalamalamaina lona mafaufau e ala i le tatalaina atu o le upu a le Atua i Lona malamalama’aga, o le a ia iloa lona matafaioi i le Atua ma le lalolagi, ma o le

a ia iloa o ana taleni e tatau ona fausiaina a'e i se auala o le a maua ai i'uga sili lava; auā e tatau ona ia 'fa'ailoa atu vi'iga' o Lē ua vala'auina o ia 'nai i le pouliuli aga'i atu i Lona malamalama ofoofogia.' 1 Peteru 2:9. A'o ia tupu a'e i le alofa tunoa ma le iloa e fa'atatau i le Ali'i o Iesu Keriso, o le a ia iloa ona lava vaivaiga, o le a ia iloa lona lava valea, ma o le a ia sa'ili i taimi uma lava e fa'atumau ma matuā fa'aaoga ona malosi o le mafaufau, ina ia mafai ai ona avea o ia ma kerisiano atamai." – *Counsels to Parents, Teachers, and Students*, p. 37.

"E i ai tagata o le Atua o le a lē taliaina le fa'ailoga a le manu feai i o latou lima taumatau po'o o latou muaulu. E i ai le nofoaga a le Atua mo Ona tagata e tula'i ai i totonu o le lalolagi lenei, ina ia fa'asusuluina atu le malamalama." – *The Review and Herald*, April 15, 1890.

Aso Faraile

Me 3

FESILI TOE FA'AMANATU

1. E fa'apefea ona mafai ona ou mautinoa ia fausia i luga o Iesu ae lē o o'u lava manatu?
2. Na silafia e Keriso i totonu ia Peteru, uiga o le a matuā aoga lava i le ekalesia. o le a se mea e mafai ona ou faia ina ia fa'aleleia atili ai la'u ekalesia?
3. E fa'apefea ona ou ono lamatia i le faitauina o o'u tausaga o galuega fa'amaoni mo le ekalesia, po'o lo'u aga'iga'i fo'i i luma i vaega eseese o le toe fuata'iga, e avea ma a'u amiotonu mo lo'u fa'aolataga?
4. O le a se mea e mafai ona faia moni ai lava a'u o se "ma'a mataala" i totonu o le malumalu o le Atua?
5. O a uiga e iloa ai se kerisiano paia, "e ese mai" i le fa'atusatusa atu i le kerisiano e na ona ia tauaveina le igoa o le avea ma kerisiano?

Lesona 6

Sapati, Me 11, 2024

Molimau Atu i le Lalolagi

MAU TAULOTO: "Auā o le finagalo lea o le Atua, o la outou amio lelei tou te fa'agūgūina ai le valea o tagata valea" (1 Peteru 2:15).

"O le pale fa'atupu o Keriso e tatau ona si'itia i luga a'e o pale o tupu fa'alelalolagi." – *The Acts of the Apostles*, p. 68.

Faitauga Fautuaina: *Testimonies for the Church*, vol. 1, pp. 358-361.

Ulua'i Aso

Me 5

1. ALO ESE MAI I MEA E FETE'ENA'I MA LE AGAGA

a. O le a le tasi o taua sili ona tāua ae e sili ona faigata mo tagata aumau ta'itasi? 1 Peteru 2:11; 1 Ioane 2:15, 16.

“Na malamalama le aposetolo o Peteru i le feso’ota’iga i le va o le mafaufau ma le tino, ma si’itia a’e ai loa lona leo i lapata’iga i lona au uso: ‘Le au pelē, ou te aioi atu ia te outou o tagata ese ma ē aumau, ia outou fa’amamao mai i tu’inanauga o le tino, o mea ia e tau ma le agaga.’ E to’atele latou te manatu i lenei fuaiupu e fa’apea e na o tu’inanauga o le tino o loo fa’atatau atu i ai; peita’i e i ai lona uiga e sili atu ona lautele. E fa’asāina ai tu’inanauga leaga uma lava e fa’amanu’alia ai i le ‘ai, poo lagona fo’i. O tu’inanauga leaga uma lava o le ‘ai, e i’u ina aveva ma tu’inanauga o loo tete’e atu i le agaga. O le fa’anaunauga o le ‘ai, na foa’iina mai ia i tatou mo se mafua’aga lelei, ae lē ina ia aveva ai ma auuuna a le oti, e ala i le fa’aleagaina, ma fa’apena ona pa’ū maulalo ifo ai i le aveva ma ‘tu’inanau lea e fai taua atu i le agaga.’ . . .

“O le malosi o le fa’aosoosoga ina ia tu’inanau sa’oloto i le ‘ai, e na o le tiga lē mafa’amatalaina lava o lo tatou Fa’aola i lena anapogi umi i le vao, e mafai ona fuaina ai. Na Ia silafia o le so’ona fa’amalieina o le tu’inanau fa’aleagaina o le ‘ai, o le a matuā fasiotia ai le va’ai fa’aleagaga a le tagata, ma o le a lē mafai ai ona iloa mea paia. . . . Afai na matuā malosi lava le tu’inanau sa’oloto i le ‘ai i luga o le aiga tagata, o le auala la e talepeina ai lona malosi, o le Alo o le Atua, na Ia onosa’ia se anapogi e toetiiti lava a atoa le ono vaiaso mo le tagata, oka se galuega o lo o i luma o le kerisiano! Peitai, tusa lava poo le a le tele o le tauiviga, e mafai ona ia manumalo. O le fesoasoani a lena mana fa’alelagi . . . o ia fo’i, e mafai ona ia manumalo atoatoa lava i lana tauiviga ma le agasala, ma ia paleina mulimuli ai loa le pale o le tagata manumalo i le malo o le Atua.” – *Counsels on Diet and Foods*, pp. 166, 167.

Aso Gafua

Me 6

2. LAUGA E ALA ATU I GALUEGA LELEI

a. Aisea e manatu ai i kerisiano moni uma lava fa’apea o i latou o ni tagata ese ma o ni fili fo’i o le lalolagi lenei? 1 Peteru 2:12; 1 Korinito 1:18, 23; 2:14.

“I le lotolotoi o tagata Iutaia na fa’alogo i lauga a [Paulo], e to’atele na ono feita ona o le feau o le a ia folafolaina atu. I le fua a tagata Eleni, o ana upu, o upu fa’avalevlea ia. O le a manatu tagata o ia e vaivai lona mafaufau ona o lona taumafai e fa’ailoa mai le auala, na mafai ona feso’ota’i atu ai le maliu o Iesu i le si’itiaina i luga o le aigā tagata poo le fa’aolataga fo’i o tagata.

“Peita’i, ia Paulo, o le maliu o Iesu o le sini e tasi lea na sili ona naunau i ai.” – *The Acts of the Apostles*, p. 245.

“O le agaga o le lalolagi e lē o sili a’e lona loto gatasi ma le agaga o Keriso i le taimi lenei, nai lo ulua’i taimi, ma o i latou e laugaina le upu a le Atua i lona tulaga mamā , o le a lē sili a’e le fiafia e talileleia ai i latou i le taimi lenei, nai lo na aso. O foliga o itu tete’e i le upu moni atonu e suia, o le matau’a atonu e itiiti ifo le fa’aalia fa’alaua’iteleina ona e

sili atu ona faia ma le poto taufa'asese; peitai o le ita lava lea e tasi, o loo i ai pea i le taimi lenei ma o le a fa'aalia pea e o'o i le i'uga o le taimi.” – *The Great Controversy*, p. 144.

b. O le a se mea o loo fa'asino atu i ai Peteru o se auala sili lea i le laugaina o le Tala Lelei ma fetaia'i ai ma le “valea o tagata valea”? 1 Peteru 2:12, 15.

“O a tatou faifeau ma a tatou faia'oga e tatau ona latou fa'ailoaina atu le alofa o le Atua i se lalolagi pa'ū. O loto liu suavai i le alofa, ia tautalagia atu ai upu o le upu moni. O i latou uma o loo i le sese ia a'oa'iina i le agamalu o Keriso. Afai e lē vave ona taofimauiina le upu moni e i latou o loo ē galue i ai, auā e te tu'ua'i, aua e te faitio pe fa'asala. Manatua e tatau ona ē fa'atusaina atu Keriso i Lona agamalu ma lona agalelei ma Lona alofa. E tatau ona tatou iloa o le a tatou fetaia'i ma le lē talitonu ma tagata tete'e mai. O le upu moni sa tatau lava ona fetaia'i i taimi uma ma nei uiga. Peita'i e ui lava ina tatau ona ē fetaia'i ma itu tete'e mai e sili ona leaga, aua e te ta'uleagaina i latou o loo tete'e mai ia te oe. . . .

“E tatau ona ē amio i le agamalu ia i latou o loo i le sese, auā e te le'i tauaso ea fo'i oe lava i se taimi e lē'i mamao atu i au agasala? Ma, talu ai ona o le onosa'i o Keriso ia te oe, e lē tatau ai ea ona ē agalelei ma onosa'i i isi? Ua tu'uina mai e le Atua ia i tatou le tele o apoapoa'iga ina ia tatou fa'aalia le agalelei tele lava ia i latou e tete'e mai ia i tatou, ne'i tatou liliueseina se agaga i le taula'iga sese.” – *Testimonies for the Church*, vol. 6, pp. 120, 121.

Aso Lua

Me 7

3. GAUA'I FA'AKERISIANO

a. Fa'amatala le uiga e tatau ona ia i tatou aga'i i pule fa'alemalō ma tulafono o le laueleele. 1 Peteru 2:13-17.

“O le aposetolo na manino ona ia fa'ailoa mai le uiga o tagata talitonu e tatau ona latou fa'atumauiina aga'i i pulega i tagata lautele: ‘Ia outou gaua'i atu i tofiga uma a tagata.’” – *The Acts of the Apostles*, p. 522.

b. Aumai fa'ata'ita'iga o mea e tatau ona faia i taimi e fete'ena'i ai tulafono a le laueleele ma le tulafono a le Atua – ae poo le a fo'i le uiga tatou te uiga a'i. Galuega 5:29; Esoto 1:15-17; Tanielu 6:7-10, 21, 22.

“Na ou va'aia o lo tatou tiute i mea uma lava e tutupu, lo tatou usita'i i tulafono a le laueleele, se'ivagana ua fete'ena'i ma le tulafono sili atu ona maua luga lea na fetalai mai e le Atua i Lona si'ufofoga mai i Sinai.” – *Testimonies for the Church*, vol. 1, p. 361.

“E lē o mana'omia i tatou ina ia tatou fouvale i pulega. O a tatou upu, pe tautalagia pe tusia fo'i, e tatau ona manatunatu i ai ma le fa'autauta, ne'i tatou foliga mai o loo tatou tete'e i tulafono ma le fa'atulaga lelei. E lē tatau ona tatou tautalagia pe faia fo'i so'o se mea o le a tapunia ai lo tatou ala i se tulaga lē tatau. E tatau ona tatou aga'i i luma i le Suafa o Keriso, ma lagolagoina ai upu moni ua tu'uina mai ia i tatou. Afai e fa'asāina i

tatou e tagata ia aua ne’i tatou faia lenei galuega, ona mafai loa lea ona tatou tali atu, e fa’apei ona tautala atu ai le au aposetolo.” – *The Acts of the Apostles*, p. 69.

“O le tagata ua tusia le tulafono a le Atua i totonu o lona loto, o le a ia usita’i i le Atua ae lē o tagata. . . . O le poto ma le pule a le tulafono a le Atua e matuā silisiliese lava.

“Na fa’ailoaina mai ia te a’u, o tagata o le Atua, o Ana oa fa’apitoa, e lē mafai ona auai i lenei taua nunumi [The American Civil War, 1861-1865], auā e fete’ena’i ma tapula’a uma lava o lo latou fa’atuatua. I le ami, e lē mafai ona latou usita’i i le upu moni ma usita’i ai fo’i i mana’oga o ō latou ta’ita’i i le taimi lava lea e tasi. O le a fa’aauau le osofa’ia o le malosi fai filifiliga o le mafaufau.” – *Testimonies for the Church*, vol. 1, p. 361.

c. Afai o i tatou o “auauna” i o tatou nofoaga o galuega, o a ituaiga tagata galulue e tatau ona i ai i tatou? 1 Peteru 2:18; Kolose 3:23.

“O loo i ai le atamai i le galuega sili ona maulalo, ma afai o le a fa’apena ona manatu i ai tagata uma, o le a latou iloa le mamalu i galuega fa’apea.” – *Fundamentals of Christian Education*, p. 315.

Aso Lulu

Me 8

4. PUAPUAGATIA ONA O MAFUA’AGA SESE

a. O a uiga e tatau ona ia i tatou e fa’atatau ia i latou e sauāina, fai upu fa’atigā mai, inoino pe amuamu mai fo’i ia i tatou? 1 Peteru 2:19, 20; Roma 12:19-21.

“E lē mafai ona tatou fa’atagaina o tatou agaga ia tigā ona o so’o se sese moni poo ni sese fo’i ua tatou manatu ua faia mai ia i tatou. O le tagata lava ia, o le fili lea e sili ona tatou mana’omia ia tatou fefefe i ai. E leai se ituaiga agasala e sili atu ona leaga sona a’afiaga i le amio, nai lo le a’afiaga o le lagona fa’aletagata e lē oi lalo o le puleaga a le Agaga Paia. E leai lava se isi manumalo e mafai ona tatou maua o le a matuā tāua lava e fa’apei o le manumalo e maua e le tagata ia te ia lava.

“E lē tatau ona tatou fa’atagaina o tatou lagona ina ia manu’a gofie. E tatau ona tatou ola, e lē ina ia puipuia o tatou lagona po o ō tatou igoa, ae ia tatou ola ina ia lavea’i agaga. . . . Po’o a lava manatu o isi e fa’atatau ia i tatou poo ni mea fo’i latou te faia mai ia i tatou, e lē tatau ona fa’avevesiina ai lo tatou tasi ma Keriso. . . .

“Aua e te tau ai. O le malosi atoa lava e mafai ona ē faia ai, ia ē aveesea mafuaaga uma lava mo malamalama’aga sese. Ia alo ese mai i le foliga o le agasala. Ia ē faia mea uma lava e te mafaia, e aunoa ma le fa’asatauroina ai o tapula’a, ina ia manumaloina mai ai isi. . . .

“Afai e tautalagia mai upu lē onosa’i ia te oe, aua lava e te tali atu i le agaga lava lea e tasi.” – *The Ministry of Healing*, pp. 485, 486.

b. Aisea e fa’atagaina ai i tatou e le Atua e puapuagatia i lima o tagata sauā ma le amioleaga? Mataio 5:11, 12, 43-48.

“O le ta’ita’iga lilo lea e fa’atagaina ai tagata amiotonu e puapuagatia i sauāga i lima o tagata amioleaga, o loo avea lea ma mafuaaga o le nunumi tele, lē malamalama i le to’atele o tagata o loo vaivai i le fa’atuatua. O nisi ua sauni e lafoa’i ese lo latou talitonuga i le Atua, auā Na te fa’atagaina tagata sili ona amioleaga ina ia manuia, a’o tagata sili ona lelei ma sili ona amio mamā o loo puapuagatiaina ma fa’apologaina e lo latou malosi sauā. Ua fesiligia le fesili fa’apea, E fa’apefea ona fa’atagaina e Lē e amiotonu ma tumu i le alofa, ma e lē mafuatia Lona mana, nei faiga lē tonu ma sauaga fa’apea? O se fesili lea e leai sa tatou aiā i ai. Ua foa’i mai e le Atua ia i tatou fa’amaoniga atoatoa o Lona alofa, ma e lē tatau ona tatou masalosalo i Lona agalelei ona e lē mafai ona tatou malamalama i le galuea’iina o Lana ta’ita’iga. . . .

“[O le Ali’i] Na te lē fa’agaloina pe fa’atalalē fo’i i Lana fanau; peita’i Na te fa’atagaina tagata amioleaga ina ia fa’aalia a latou amio moni, ina ia lē fa’aseseina ai so’o se tasi lava e fa’anaunau e faia Lona finagalo, e fa’atatau ia i latou. Ua toe fa’ailoa mai fo’i, o tagata amiotonu o loo tu’uina i totonu o le ogaumu o puapuaga, ina ia fa’amamāina ai i latou.” – *The Great Controversy*, pp. 47, 48.

Aso Tofi

Me 9

5. MULIMULI I LE FA’AA’OA’O

a Ina ua uma ona fa’alototele mai Peteru i kerisiano ina ia latou fetaia’i ma le olioli ma puapuaga ma sauaga, o le a se mea ua ia aumaia o se finauga sili lea ona malosi e ao ai ona tatou faia fa’apea? 1 Peteru 2:21-24.

“Na puapuagatia Iesu mo i tatou e sili atu nai lo le tulaga e mafai ona fa’apuapuagatiaina ai so’o se tasi o Ona so’o e ala i le sauā o tagata amioleaga. O i latou ua vala’auina ina ia onosa’ia sauaga ma le oti fa’amaturo, o loo latou mulimuli i la’asaga o le Alo pele o le Atua.” – *The Great Controversy*, p. 47.

b. O le a se ata e fa’alototeleina ai ua aumaia e le aporetolo i le i’uga o ona manatunatuga i le auala e tatau ai ona tatou fetaia’i ma puapuaga? 1 Peteru 2:25; Ioane 10:11.

“O Keriso o loo fa’atusalia mai o Ia o loo su’e, sa’ili, mo le mamoe na leiloa. O Lona alofa o loo si’omia ai i tatou, ma toe aumaia ai i tatou i totonu o le lafu mamoe. O Lona alofa e foa’iina mai ai ia i tatou le avanoa sili ona tāua o lo tatou nonofo fa’atasi ma Ia i nofoaga fa’alelagi.” – *Testimonies for the Church*, vol. 6, p. 479.

“O a tatou tagata faigaluega – faifeau, faia’oga, foma’i, o fa’atonu – o i latou uma lava e mana’omia ina ia latou manatua ua ta’utinoina atu i latou e galulue fa’atasi ma Keriso. . . . E tatau ona latou teufatuina i taimi uma se lagona o le alofa o le Fa’aola, o Lona mana, o Lona mataala, ma Lona agalelei. E tatau ona latou va’ava’ai ia te Ia o le Leoleo mamoe ma le ulu o ō latou agaga. O le a latou maua loa le alofa mutimutivale ma le lagolago a agelu fa’alelagi. O Keriso o le a avea ma o latou olioliga ma o latou pale o le olioliga. O ō latou loto o le a pulea e le Agaga Paia, ma o le a ia i latou se iloa e fa’atatau i

le upu moni lea e lē mafai lava ona maua e i latou e na ona igoa i le avea ma tagata talitonu.” – *Counsels to Parents, Teachers, and Students*, p. 284.

Aso Faraile

Me 10

FESILI TOE FA’AMANATU

1. E fa’apefea ona mafai ona lavea’iina a’u mai i le nofo pologa i le tu’inanau o le ‘ai ma lagona leaga?
2. O le a se mea o le a faia ai lo’u olaga o se molimau ola o le mana o le Tala Lelei?
3. O a nisi o auala e mafai ona sili atu ona ou fa’aalia ai le usita’i i pulega fa’alemalō?
4. A tu’ua’iseseina a’u pe e’ē mai fo’i se tasi ia te a’u, o le a la’u tali e tatau ona tali atu ai?
5. O le a se mea o le a ou naunau moni ai lava ina ia puapuagatia mo Iesu?

Lesona 7

Sapati, Me 18, 2024

O Se Olega i Tane ma Avā

MAU TAULOTO: “A’o latou va’ava’ai i a outou talanoaga mamā ma le mata’u” (1 Peteru 3:2).

“O le aiga o se nofoaga paia tele lea, o lea e lē tatau ai ona fa’aleagaina i uiga matagā, fa’anaunauga fa’aaliali o tu’inanauga leaga o le tino, ma le tu’ua’iina e le tasi o le isi. O loo i ai se Molimau o loo fetalai mai, ‘Ua Ou iloa au galuega.’ Ia avea le alofa, upu moni, agalelei, ma le onosa’i, o ni la’au totō e tausii fa’apelepeleina i totonu o le togala’au o le loto.” – *Mind, Character, and Personality*, vol. 1, p. 157.

Faitauga Fautuaina: *The Adventist Home*, pp. 99-112, 177-180.

Ulua’i Aso

Me 12

1. **O SE UIGA FA’ALE-TUSI PAIA E MASANI LAVA ONA LĒ AMANA’IAINA**
 - a. **O le a le tapula’a taua tele mo le fiafia o le aiga o loo masani ona te’ena e fafine i le taimi lenei? 1 Peteru 3:1 (vaega muamua); Efeso 5:22-24; Kolose 3:18.**

“Uso, o le a le mea na ē mana’omia mai i lau tane ina ua ē fa’aipoipo i ai? Na ē mana’o ea e te tauaveina le pule i ou lava lima, ma aumaia ai lona loto ia loto gatasi ma lou loto agasala, loto ma’a’a? O le a le tele o le malologa, loto malie, filemu, ma le olioli ua maua e lau tane i lona olaga fa’aipoipo? E matuā itiiti lava. . . . O le avā e lē tatau ona ia manatu o ia o se pepe meata’alo, ina ia tausii, va’ava’aia ma teuteuina, peita’i e tatau

ona ia iloa o ia o le fafine, o lē e tatau ona tu'uina atu lona tau'au i lalo o avega moni, ae e lē o ni avega e fausia i mafauauga, ma ia ola i se olaga malamalama, tumu i manatunatuga lelei, ma 'ia ia iloa, o loo i ai isi mea e tatau ona manatunatu i ai, nai lo naia.

“E te manatu ea e lē o se mea e lē fiafia ai lau tane pe a ia iloa le tagata moni e i ai oe, lea ua fa'ailoa mai e le Atua ia te a'u? Na ia fa'aipoipo atu ea ia te oe ma lona manatu o le a ē lē tauaveina lava ni avega, ma ē lē tofusua i faigatā, ma ē lē fa'atinoina lou fa'afitia o oe e oe lava? Na ia manatu ea, o le a ē lagona e lē o sou matafaioi lou puleaina o oe e oe lava, ma ia ē foliga fiafia, agalelei, ma onosa'i, ma ia fa'aaoga le poto masani o le mafaufau?” – *Manuscript Releases*, vol. 17, pp. 310, 311.

b. O le a le auala sili ona aoga mo se avā ua liua na te a'apa atu ai i lana tane lē talitonu? 1 Peteru 3:1, 2; 1 Korinito 7:10, 13, 14.

Aso Gafua

Me 13

2. LAGOLAGOINA O SE SO'OTAGA LOTO GATASI

a. O le a le fa'ata'ita'iga fa'ale-Tusi Paia o loo fa'aaoga e Peteru e avea ma fa'ata'ita'iga mo le so'otaga a se avā i lana tane? 1 Peteru 3:4-6. Fa'amatala le paleni o loo fa'aalia i lenei so'otaga. Kenese 21:9-12.

“O le fa'atonuga na tu'uina atu ia Aperamo e fa'atatau i le paia tele o le so'otaga fa'alefa'aipoipoga, e tatau ona avea ma lesona mo augatupulaga uma lava. O loo fa'ailoa mai ai, o aiā ma le fiafiaga o lenei so'otaga, e tatau ona puipuia ma le fa'aeteete, i se tau e sili ona tele. O Sara, e na o ia lava le avā moni a Aperamo. O ana aiā i le avea o ia ma avā ma tinā, e lē'i i ai se isi lava tagata na fa'atagaina e tofusua ai. Na ia ava i lana tane, ma o le mafua'aga lenei ua fa'ailoa mai ai o ia i le Feagaiga Fou, e avea ma fa'ata'ita'iga lelei. Peita'i na te lē'i mana'o e avatu lagona alofa o Aperamo i se isi fafine, ma e lē'i a'oa'iina o ia e le Atua mo lona mana'o e tuli ese lē na fa'atautavā mai ia te ia.” – *Patriarchs and Prophets*, p. 147.

b. O le a se mea e masani lava ona fa'anoanoa ai le tane i totonu o le li'o o le aiga ma fa'aleagaina ai lona igoa i luma o tagata? Fa'ataoto 14:1; 25:24; 27:15; fa'atusatusa i le 1 Peteru 3:4.

“O le to'atele lava o tane ma fanau latou te lē o mauaina se mea e tosina i ai i le aiga, o ē o loo fa'afeiloa'iina i taimi uma lava e le otegia ma le muimui, latou te sa'ilia le fa'amafanafanaga ma fiafiaga i nofoaga i fafo atu o le aiga. . . . O le avā ma le tinā, o le fa'atumulia o ia i ona popolega o feau o le aiga, e masani ai lava ona ia lē manatunatu i uiga fa'aaloalo iti ia e avea ai le aiga o se nofoaga fiafia i le tane ma le fanau, tusa lava pe na te lē manatunatu i ona lagona lē fiafia uiga ese ma faigata, a'o fa'atasi ma i latou. A'o fa'aaluina atoa lona mafaufau i le sauniga o se meaai poo ni ofu e ofu, o le tane ma ona atali'i, e feoa'i atu i totonu o le fale ma toe o mai i fafo e fa'apei o ni tagata ese.

“A’o foliga mai o loo fa’atinoina ma le ma’oti lelei e le tinā o le aiga ona tiute i le va’aiga i fafo, atonu o loo ia alaga a’e i taimi uma i le nofo pologa ua lafoina i ai o ia, ma ua ia so’ona fa’atelēina ai ona matafaioi ma ona tiute ua noatia i ai o ia, e ala i lona fa’atusatusaina o lona olaga ma le olaga lea ua ia manatu, o le olaga sili atu ona maualuga o fafine. . . . o lana galuega ma le olaga lea ua ia fa’aigoaina o le olaga sili atu ona maualuga o le fafine. . . . A’o ia fa’ananau atu ma le lē fa’amanuiaina mo se olaga e ese atu, o loo ia teufatuina ai se loto lē fa’amalieina agasala, ma faia ai lona aiga o se nofoaga matuā lē lelei lava mo lana tane ma lana fanau.” – *The Adventist Home*, p. 249.

“O le avā a le faifeau na te lē o tu’uina atu atoa o ia i le Atua, e lē mafai ona ia fesoasoani i lana tane. A’o ia manatunatu i le aoga o le amoina o le satauro, ma fa’amamafa atu le tāua o le fa’afitia e le tagata o ia lava, o le fa’ata’ita’iga o aso ta’itasi a lana avā, e masani lava ona fete’ena’i ma ana lauga, ma fa’aumatiaina ai lona malosi o lana lauga.” – *Gospel Workers*, p. 210, [1892 edition.]

Aso Lua

Me 14

3. ITUAIGA FA’AMAUALUGA MATA’UTIA LE LEAGA

a. E fa’apefea ona fa’amatagofieina e se avā kerisiano ia lava? Fa’ataoto 31:25-29.

“[O le avā] e tatau ona ia faia ma le vilivilita’i mea uma lava i lona malosi ina ia fusia atu lana tane ia te ia lava e ala i lona fa’amaoni atoa ia te ia ma lona fa’amaoni i le faia o lona aiga o se aiga fiafia ma tosina i ai lana tane.” – *Testimonies for the Church*, vol. 5, p. 598.

“E lē o fiafia le Atua i le lē fa’atulaga lelei, fa’atalalē, ma le leai o se uiga ma’oti mae’ae’a i so’o se tagata lava. O nei uiga lē lelei o ni uiga leaga mata’utia lava ia, ma e aveesea ai le alofa o le tane mai i le avā, pe afai o le tane e fiafia i le fa’atulaga lelei. . . . O se avā ma se tinā, e lē mafai ona ia faia le aiga o se nofoaga e fetau ma fiafia i ai, se’ivagana ua ia te ia se uiga o le fiafia i le fa’atulaga lelei, ma fa’atumau lona mamalu, ma lelei lana pulega; o lea la, o i latou uma lava e to’ilalo i nei vaega, ua tatau nei loa lava ona amata ona latou a’oa’oina i latou i lenei taula’iga.” – *The Adventist Home*, pp. 22, 23.

b. O ai e masani lava ona taumafai se fafine e lē’i liua, e fa’atosina mai – ma o a i’uga e o’o mai ai? Fa’ataoto 7:6, 7, 10, 18, 19; 2 Tupu 9:30; Isaia 3:16-26.

“O le a i ai fafine o le a avea ma mea faigaluega tau fa’aosooso, ma o le a latou faia le mea sili latou te mafaia ina ia fa’atosina ma manumaloina mai mafaufau o tane ia i latou.” – *The Review and Herald*, May 17, 1887.

“O ofu pupula e fa’alialia ai, taugata, e masani lava ona fa’aosofia ai le tu’inanau i totonu o le loto o lē o loo ofuina, ma fafaguina ai lagona leaga maualalo i totonu o le loto o lē o loo va’ai atu i ai. O loo silafia e le Atua o le fa’afanoga o le amio, e masani lava ona amatalia i le tu’inanau agasala o le loto vi’i ma le fa’alialiavale fa’amaualuga i ofu.” – *Child Guidance*, p. 416.

c. A’o foliga mai e lē o sa’ili ma le iloa le to’atele o fafine kerisiano ina ia fa’atosina ma mailei atu tane ia faia le mulilua, o le a le ituaiga fa’alialiavale fa’amauualuga ua lapata’ia ai i tatou uma lava? 1 Peteru 3:3; 1 Timoteo 2:9.

“E leai se mea e sili ona avea ma pa pupuni tele o loo fa’alavelave ia te oe [ma lau tane] e fa’apei o lo oulua loto vi’i fa’alialiavale fa’amauualuga. E te lua fiafia uma i le fa’alialiavale; o lenei uiga e leai sona tofi i le tapua’iga lelei ma le agamalu.” – *Testimonies for the Church*, vol. 2, p. 493.

“O le Tusi Paia o loo ia a’oa’oina mai le agamalu i ofu. . . . O lenei a’oa’oga o loo fa’asāina ai le fa’alialia i ofu, ma lanu pupula fa’alialiavale, ma teuga anoa’i so’ona fai. So’o se fuafuaga lava e fafauina ina ia tosina atu ai loto o tagata i lē o loo ofuina ofu, pe e fa’aosofia ai fo’i upu fa’avi’ivi’i ma vi’iga mai i tagata, e lē o aofia ai i le ofu agamalu lea e fa’atonu mai e le Upu a le Atua.

“O le fa’afitia e le tagata o ia lava i ofu, o se vaega lea o lo tatou tiute fa’akerisiano. O le ofu i ofu faigofie ma alo ese mai ai i le fa’alialiavale o teuga i tautaliga, mama, filifili asoa ma so’o se teūga lava, o loo o gatasi lea ma lo tatou fa’atuatuaga.” – *Child Guidance*, p. 423.

Aso Lulu

Me 15

4. O LE TIUTE O LE TANE

a. Ina ua mavae ona ole atu Peteru i avā, o le a le apoapoa’iga tāua o loo ia aumaia i tane – ma le i’uga fa’aleagaga o le lē amanaiaina o lenei apoapoa’iga? 1 Peteru 3:7.

“Ia fesoasoani le tane i lana avā e ala i lona agaalofa ma ona uiga alofa lē mavae. Afai na te mana’o e fa’atumauina le malosi fa’afouina ma le uiga fiafia o lana avā, ina ia avea ai o ia e fa’apei o le susulu o le la i totonu o le aiga, ia fesoasoani o ia i lana avā i le tauaveina o ana avega. O lona agalelei ma lona fa’aaloalo alofa o le a avea o se fa’amalosiaga tāua lava ia te ia, ma o le fiafia o loo ia foa’iina atu o le a aumaia ai le olioli ma le filemu i lona lava loto.” – *The Adventist Home*, p. 218.

b. Aumai se fa’ata’ita’iga o le auala e mafai ai ona faia e se tane lē talitonu se olaga fa’anoanoa mo lana avā. 1 Samuelu 25:3, 14, 17, 23-25.

“Afai e sauā le tane, matuā mausali i ana fa’atonuga, ma faitio e fa’atatau i gaiogiga a lana avā, e lē mafai ona ia maua lona fa’aaloalo ma lona alofa, ma o le so’otaga o le fa’aipoipoga o le a avea o se mea inosia i le avā. O le a ia lē alofa i lana tane, auā na te lē o taumafai ina ia faia o ia lava ina ia alofa atu i ai lana avā. O tane e tatau ona fa’autauta, mataala, ma tumau, fa’amaoni, ma alofa mutimutivale. E tatau ona latou fa’aalia le alofa ma le agalelei. . . . A i ai i le tane le amio fa’amaoni, loto mamā, si’itiaina o le mafaufau, lea e tatau ona maua e kerisiano moni uma lava, o le a fa’aalia fo’i i totonu o le so’otaga o le fa’aipoipoga. . . . O le a ia sa’ili e fa’atumauina lana avā i le ola maloloina ma le loto tele. O le a ia taumafai e tautalagia upu o fa’amafanafanaga, ina ia foafoaina se si’omaga o le filemu i totonu o le li’o o le aiga.” – *Ibid.*, p. 228.

c. O le a le uiga e tatau ona amio a'i se tane kerisiano moni lava aga'i i lana avā, ina ia osofia ai o ia e tali mai i se uiga lelei ia te ia? Efeso 5:25, 28, 33; Kolose 3:19.

“O tane e tatau ona latou auiliiliina le Fa'aa'oa'o, ma ia latou saili ina ia latou iloa le uiga o le fa'ailoga lea o loo fa'ailoa mai i le tusi o Efeso. . . . O le tane e tatau ona avea ma Fa'aola i totonu o lona aiga. O le a ia tula'i ea i lona tulaga mamalu o le tane lelei na foa'i mai e le Atua, ma saili ai i taimi uma ina ia si'itiaina lana avā ma lana fanau? . . . Ia su'esu'e tane ma tamā ta'itasi uma lava ina ia malamalama i upu a Keriso, aua ne'i su'esu'e ina ia malamalama ai i se itu e tasi, e na o le manatunatu lea i le usita'i atu o le avā i lana tane, peita'i, o le iloa e fa'atatau i le maliu o Iesu i Kalevario, ia su'esu'e ai le tane ina ia malamalama ai i lona lava tulaga i totonu o le li'o o le aiga.” – *Manuscript Releases*, vol. 21, p. 216.

Aso Tofi

Me 16

5. E LEAI SE “PULE” I TOTONU O LE AIGA KERISIANO

a O le a le mafana e tatau ona i ai le so'otaga i le va o le tane ma le avā? Kenese 2:23, 24; Mataio 19:4-6.

“E lē tatau ona faia e le tane po'o le avā fo'i se aioiga mo le pule. Ua uma ona tu'uina mai e le Ali'i le tapula'a e tatau ona ta'ita'ia ai i lenei mataupu. O le tane e tatau ona ia alofa i lana avā e fa'apei ona alofa Keriso i le ekalesia. Ma e tatau ona fa'aaloalo ma alofa le avā i lana tane. O i la'ua uma e tatau ona fausiaina a'e le agaga o le agalelei, ma ia fa'anaunau ia aua lava ne'i fa'atiga pe fa'amanu'alia e le tasi le isi.” – *The Adventist Home*, pp. 106, 107.

“E tatau ona i ai ia i tatou le Agaga o le Atua, afai e leai, o le a lē mafai lava ona tatou loto gatasi i totonu o le aiga. O le avā, afai o loo ia te ia le Agaga o Keriso, o le a ia fa'aeteete i ana upu; o le a ia puleaina lona lava loto, o le a ia usita'i, ae o le taimi lava lea e tasi o le a ia lē manatu ai o ia o se pologa, peita'i o ia o se pa'aga i lana tane. Afai o le tane o ia o se auauna a le Atua, o le a ia lē fia pule i lana avā; o le a ia lē loto ita e aunoa ma se mafua'aga ma fia fai fa'atonuga. E lē mafai ona tatou fa'atumauiina le agaalofa i totonu o le aiga ma le tele o mea e popole i ai; mo le aiga, afai o loo afio ai iina le Agaga o le Ali'i, o se fa'atusa lea o le lagi. . . . Afai e sese le to'atasi, o le isi o le a ia fa'atinoina le onosa'i fa'apei o Keriso ma lē alu ese ai i se uiga lē alofa.

“Aua ne'i taumafai le tane poo le avā na te faia se pule fa'amalosi i le isi. Aua lua te taumafai e fa'amalosi e le tasi le isi ina ia gaua'i atu i ou mana'oga. E lē mafai ona lua faia lenei tulaga ma fa'atumauiina ai pea le alofa o le tasi i le isi. Ia agalelei, onosa'i, ma ia fa'amagalo, ia manatu i mana'oga o le isi, ma ia fa'aaloalo. E ala i le alofa tunoa o le Atua, e mafai ai ona lua manumalo i le fa'afiafiaina e le tasi o le isi, e fa'apei ona lua ta'utino i le lua fa'aipoipoga o le a lua faia.” – *Ibid.*, p. 118.

FESILI TOE FA'AMANATU

1. E fa'apefea ona sili atu ona fa'aalia i taimi uma e o'u uiga ma lo'u leo i lo'u to'alua, tapula'a ia ua fa'atonu manino mai e le Atua?
2. Aisea e tatau ai ona sili atu ona vave lo'u ioeina o o'u sese ma ole atu mo le fa'amagaloga mai i lo'u to'alua?
3. Aisea ua valaa'uina ai a'u e le Atua ina ia ou sauni/naunau e oti mo lo'u to'alua?
4. E fa'apefea ona ou alo ese mai i lo'u mulilua i o'u manatunatuga ma ou lē fa'amaoni ai i lo'u to'alua?
5. Aisea o le a avea ai o se filifiliga poto mo a'u ma lo'u to'alua lo ma manatunatu ma le tatalo po'o ma agasala i le loto vi'i ma le fa'alialiavale – i ofu, poto e kuka, po'o mea totino fo'i e pei o ta'avale, masini e fa'apei o komupiuta ma telefoni, fale, ma isi mea fa'apena?

Lesona 8

Sapati, Me 25, 2024

O Uiga o le Kerisiano

MAU TAULOTO: “O le i'uga lenei, ia loto gatasi outou uma, ia alofa le tasi i le isi, ia alolofa e fa'apei o le au uso, ia mutimutivale i le alofa, ia fa'aaloalo” (1 Peteru 3:8).

“O i latou e fai mai o i latou o so'o o Keriso ae o le taimi lava lea e tasi o loo latou amio pa'a'a ai, agaleaga, ma lē agalelei i upu ma o latou uiga, latou te lē o a'o'oga mai ia Iesu. O se tane leoleoā, fia pule, sa'ili'ili masei, e le o ia o se kerisiano; auā o le avea ma kerisiano, o le fa'apei lea o Keriso.” – *The Adventist Home*, p. 427.

Faitauga Fautuaina: *The Adventist Home*, pp. 421-429.

Ulua'i Aso

Me 19

1. O SE KERISIANO MONI UA FA'AMATALAINA

a. O fa'apefea ona fa'aatina mai e Peteru se kerisiano moni? 1 Peteru 3:8.

“O le aogā o le fa'aaloalo o loo matua itiiti lava lona fa'atāuaina. O le to'atele o i latou e agalelei o latou loto, e le o fa'apena le agalelei o ō latou uiga. O le to'atele o i latou e mauaina le fa'aaloalo e ala i lo latou loto fa'amaoni ma lo latou amiotonu, o se tulaga fa'anoanoa, latou te lē o mauainauiga tali mālō. O lo latou lē mauaina o lenei uiga ua fa'aleagaina ai lo latou lava fiafia ma fa'avaivaia ai i latou mai i la latou auaunaga i isi.” – *Education*, p. 240.

b. O le a le uiga ese fa'a-Keriso o loo fa'amamafa fa'apitoa mai lava e Peteru? 1 Peteru 3:9; Mataio 5:44.

“O tagata uma e tatau ona fa'aalia i ai uiga ua fa'aleleia ma le alofa, e fa'apei o atali'i ma afafine o le Atua.

“O le fa'akerisiano o le a faia ai se tane e aveia o se tane fa'aaloalo amio lelei. O Keriso sa fa'aaloalo, e o'o lava ia i latou na sauāina o Ia; ma o Ona so'o moni o le a latou fa'aalia le agaga lava lea e tasi.” – *The Ministry of Healing*, p. 489.

“O lenei tapua'iga e a'oa'oina ai i tatou ina ia tatou fa'atinoina le onosa'i ma le umi-ona-puapuagatia, pe a aumaia i tatou i nofoaga o le a agaleagaina ai i tatou ma faia mai i ai uiga lē tonu. . . .

“O loo mana'omia lava i taimi uma le onosa'i, agalelei, fa'afitia e le tagata o ia lava, ma le fa'asatauroina e le tagata o ona lava mana'o i le fa'atinoina o le tapua'iga fa'ale-Tusi Paia.” – *God's Amazing Grace*, p. 248.

Aso Gafua

Me 20

2. MATAALA I A TATOU UPU

a. O le a le tapula'a tāua na toe fa'amamafaina mai e Peteru o le aiaiga lea o se olaga fiafia iinei, ma le olaga oi lumana'i? Salamo 34:12, 13; 1 Peteru 3:10.

“O Satani o loo galue i totonu o ekalesia ta'itasi uma lava ina ia fa'aleaga le lafu a le Atua. . . . Ua fa'atonuina a'u ina ia ou fai atu i tagata ta'itasi uma o loo fai mai o ia o le so'o o Keriso, 'Ia ē taofi i lou laulaufaiva mai i le leaga, ma ou laugutu, ina ia lē tautala i se upu leaga.' E ala i le fa'amaualugaina e le tagata o ia lava, e galue ai Satani ina ia fa'afanoina le tagata, ma o lana galuega e mafai ona va'aia i totonu o ekalesia ta'itasi uma lava. O'u tuaganē ma o'u uso, ia outou matuā leoleo ma'oti lava i ō outou agaga. Ia puipui i au upu, ne'i ta'ita'ia oe e Satani ina ia toe fa'aluaina lona lava tala'aga.” – *The Upward Look*, p. 114.

b. Aumai fa'ata'ita'iga o tagata na solia lenei tapula'a, ma na fa'apefea fo'i ona osofia ai le mā ma le fa'alumaina, aemaise ai lava mo lē na tautalagia ia upu. 1 Samuelu 14:24-27, 43-45; Eseta 6:6-10.

“Aua lava ne'i alu atu mai i ou laugutu se upu e tasi o le lē onosa'i, lē fa'amagalo, poo le ita fo'i. O le alofa tunoa o Keriso o loo fa'atali mai mo lou ole atu. O Lona Agaga o le a pulea lou loto ma lou mafaufau, ma pulea ai au upu ma au gaoiga. Aua lava e te lafoa'ia lou fa'aaloalo o oe ia te oe lava e ala i upu fa'ata'alise, lē manatunatu lelei i ai. Ia mautinoa o loo mamā au upu, ma paia lau talanoaga.” – *Child Guidance*, p. 219.

c. O le a fa'apefea ona taofia le to'atele mai i le foa'iina atu i ai o le ola e fa'avavau ona o le solia o lenei tapula'a? 1 Peteru 3:10 (vaega mulimuli) fa'atusatusa atu i le Fa'aaliga 14:5; 21:27.

“A feiloa’i fa’atasi nei tagata inu ti ma inu kofe mo le fa’afiafiaina o i latou, . . . ona sa’oloto lea o o latou laulaufaiva, ma latou amatalia ai loa le galuega leaga o le talanoa e fa’atatau i isi. O a latou upu e lē itiiti pe filifilia lelei fo’i. O tala manaia o muimuiga ua pasi solo atu, o le tele lava o taimi o le vai ‘ona fo’i lea o tala sese ma le lē moni, e fa’ata’uvaleaina ma fa’aosofia ai le ita o tagata lautele i lē o loo muimuina. O nei tagata muimui lē manatunatu lelei, e galo ia i latou o loo i ai lē o loo molimauina a latou muimuiga. O Lē e lē o va’aia o loo tusia a latou upu i totonu o tusi a le lagi. O nei faitioga agaleaga uma, o nei ripoti so’ona fa’atelēina, o nei lagona matau’a loto leaga, lea na fa’aioaina i lalo o le lagona osofia e le ipu ti, ua tusia e Iesu e peisea’i ua faia atu ia te Ia lava.” – *Counsels on Diet and Foods*, p. 423.

Aso Lua

Me 21

3. SA’ILIA O LE FILEMU

- a. **O a isi tapula’a tāua o le olaga kerisiano ua fa’amanatu mai e Peteru ia i tatou? 1 Peteru 3:11; Isaia 1:16, 17.**
- b. **E fa’apefea ona mafai ona tatou “alo ese mai i le leaga ma faia le lelei”? Ieremia 13:23 fa’atusatusa i le 1 Korinito 6:9-11; Ioane 3:5; Iakopo 4:7.**

“[O i latou o loo tusi atu i ai le aposetolo o Paulo] e tataua ona latou fa’aalia i o latou olaga le suiga ofoofogia ua faia i totonu ia i latou e le alofa tunoa e liua ai, o Keriso. . . . E le’i mafai ona latou suia o latou lava loto. Ma ina ua ta’ita’ieseina tagata mai i le itu a Satani ina ia latou tula’i mo Keriso, e ala i a latou taumafaiga, e lē’i tataua ona latou aveina le vi’iga mo le liuaga ua galuea’iina. . . .

“O le mana o le Atua o le vaega e tasi lea o le agava’a i le galuega tele o le mauaina o le manumalo i le lalolagi, i le tino, ma le ti’apolo. . . . E leai se mea e mafai ona fa’ataunu’uina e le tagata e aunoa ma le Atua, ma ua fa’atulagaina e le Atua Ana fuafuaga ina ia aua lava ne’i fa’ataunu’uina se mea e tasi i le toe fanaufouina o le aigā tagata, e aunoa ma le galulue fa’atasi o le tagata ma le Atua. O le vaega ua mana’omia e faia e le tagata e matuā itiiti lava lona lē mafuatia, peita’i i le fuafuaga a le Atua o le vaega tonu lava lena o loo mana’omia ina ia fa’amanuiaina ai le galuega.

“O le suiga tele lea ua va’aia i le olaga o se tagata agasala ina ua mavae ona liua, e lē o faia e so’o se uiga lelei fa’aletagata.” – *God’s Amazing Grace*, p. 319.

- c. **O le a le fa’amoemoe ma le folafolaga ua tu’uina mai ia i latou ua gaua’iina atu i latou lava i le mana-e-liua-ai, o le Tala Lelei, peita’i o loo fa’ato’ilaloina pea i latou e fa’aosoosoga eseese? 1 Peteru 3:12; Ioane 14:13, 14.**

“O le fa’atuatua ma le tatalo e mafai ai ona ausia e tagata uma mana’oga o le tala lelei. E leai se tagata e mafai ona fa’amalosia ina ia solia le tulafono. O lona lava loto malie e tataua ona mauaina muamua; o le loto e tataua ona sini muamua i le gaoiga agasala a’o le’i mafai ona manumalo le tu’inanau i le mafaufau fai filifiliga potu, a’o le’i manumalo fo’i le amioleaga i le malosia fai filifiliga o le mafaufau. O le fa’aosoosoga, tusa

lava po’o le a le malosi, e lē o se alofaga lava lea mo le agasala. ‘O fofoga o Ieova o loo i luga o ē amiotonu, e fa’afofoga mai fo’i Ona taliga i a latou tatalo.’ Alaga ia Ieova, le tagata fa’aosoosoina e. Lafo atu oe, e leai sou fesoasoani, lē aogā, i luga ia Iesu, ma ia ē ole atu mo Lana folafolaga tonu lava lea. O le a fa’afofoga mai o Ia. Na te silafia le malosi o lagona o le loto fa’alenatura, ma o le a Ia fesoasoani i taimi uma lava o fa’aosoosoga.

“Ua ē pa’ū ea i le agasala? Ia sa’ilia nei loa le Atua e aunoa ma le fa’atuai mo le alofa tunoa ma le fa’amagaloga.” – *Testimonies for the Church*, vol. 5, p. 177

Aso Lulu

Me 22

4. FAIA O AUAUNAGA LELEI E AUNOA MA LE MATA’U

a. O le a le fautuaga fa’atinoina ua tu’uina mai e Peteru, a mulimulita’iina, e mafai ona fesoasoani ai ia i tatou i le fofōina o le tele o fa’afitauli i feso’ota’iga? 1 Peteru 3:13; Fa’ata’oto 15:1.

“O upu e tautalagia i le tali atu i lē o loo ita, e masani lava ona gaioui e fa’apei o se sasa, e sasa atu ai le ita i le avea ma to’asa tele. Peita’i o le ita e fetaia’i ma le gugū e vave lava ona mate ifo. Ia nonoa e le kerisiano lona laulaufaiva, ma ia filifili ma le mausali na te lē tautalagia lava upu sauā, ma le lē onosa’i.” – *Messages to Young People*, p. 136.

b. O le a la tatou filifiliga e tatau ona faia i tagata e foliga mai e lē mafai ona fa’amalieina e ui lava i a tatou lapata’iga agamalu ia i latou? 1 Peteru 3:14, 16, 17.

“O Iesu lava Ia na te lē’i fa’atauina lava le filemu e ala i Lona ioe i ni maliega. . . . O auauna a Keriso ua vala’auina i latou i le galuega lava lea e tasi, ma e tatau ona latou mataala, ne’i latou lafoa’ia le upu moni, e ala i lo latou sa’ili ia aua ne’i tula’i mai ni fe’ese’esea’iga. . . . O le filemu moni lava e lē mafai lava ona fa’amausalīina e ala i le loto malie ia tu’u i lalo tapula’a. Ma e leai fo’i se tasi e mafai ona fa’amaoni e aunoa ma le fa’aosofiaina o itu tete’e mai. O se fa’a-Kerisiano e fa’aleagaga, o le a te’ena e fanau a le lē usita’i. Peita’i na fa’atonu atu Iesu i Ona so’o, ‘Aua tou te matata’u ia i latou e fasiotia le tino, peita’i e lē mafai ona latou fasiotia le agaga.’ O i latou e fa’amaoni i le Atua e lē mana’omia lo latou matata’u i le malosi o tagata po’o le ita o Satani. Ua mausali lo latou ola e fa’avavau i totonu ia Keriso. E tasi lava le mea e tatau ona latou matata’u i ai o lenei, ne’i latou lafoa’ia le upu moni, ma fa’apena ona latou fa’alataina ai le talitonuga ua fa’amamaluina ai i latou e le Atua.” – *The Desire of Ages*, p. 356.

c. O le a le puna e tatau ona sau ai a tatou galuega lelei uma lava ma a tatou upu agalelei uma lava? 1 Peteru 3:16 (vaega muamua); Galuega 24:16; Eperu 9:14.

“I totonu o le Upu a le Atua, tatou te faitau ai o loo i ai malosi fai filifiliga lelei ma leaga, ma, talu ai ona o lou malosi fai filifiliga na te lē o ta’usalaina oe i lou lē tausia o le tulafono a le Atua, e lē o fa’amaonia mai ai e fa’apea, e lē o ta’usalaina oe i Lana silafaga. Ave le malosi fai filifiliga o lou mafaufau i le Upu a le Atua ma ē vaai po’o tusa lou olaga

ma lau amio ma le tapula'a o le amiotonu ua fa'aalia ai iina e le Atua." – *The Review and Herald*, September 3, 1901.

Aso Tofi

Me 23

5. ILOAINA PO'O FEA O TATOU TUTU AI

- a **O a mafua'aga autu e tatau ai ona tatou su'esu'eina le upu a le Atua i aso ta'itasi? Iosua 1:8; Salamo 119:11; 1 Peteru 3:15; 2 Timoteo 2:15**
- b **O le a le lamatiaga tele o loo i ai le to'atele i le taimi lenei o loo fai mai latou te talitonu i le upu moni mo le taimi lenei? Hosea 4:6.**

“O i ai ea le autalavou i se tulaga e mafai ai ona latou tu'uina atu ma le agamalu ma le mata'u, se tali i tagata ta'itasi uma e fesili mai ia i latou i le mafua'aga o lo latou fa'amoemoe? Na ou va'ai o talavou e matua to'ilalo lava i lo latou malamalama'aga i lo tatou talitonuga. O va'aiga mata'utia o loo i o latou luma tonu lava, o se taimi lea o puapuaga o le a tofotofoina ai le taa o le amio.” – *Testimonies for the Church*, vol. 1, pp. 507, 508.

“O le feau mo le taimi lenei – o le ta'uamiotonuina e ala i le fa'atuatua – o se feau lea mai i le Atua. . . .

“Tatou te le o saogalemu pe afai tatou te fa'atalalē i le su'esu'eina o le Tusi Paia i aso ta'itasi mo le malamalama ma le iloa. . . . E le o i ai se tagata e to'a tasi mai i le to'a selau o loo malamalama mo ia lava, i le upu moni o le Tusi Paia e fa'atatau i lenei mataupu lea e matua aoga lava i lo tatou manuia i le taimi nei ma le olaga e fa'avavau.” – *Selected Messages*, bk. 1, p. 359.

“E to'atele e va'ava'ai atu i a latou faifeau na te aumaia ia i latou le malamalama mai i le Atua. . . . O tagata fa'apenei e tele le malamalama latou te le maua. Afai o le a latou mulimuli ia Keriso i aso ta'itasi . . . e mafai ona latou maua se iloa manino lava e fa'atatau i Lona finagalo, ma fa'apena ona latou maua ai se iloa taua lava. O lo latou le maua o lenei iloa tonu lava, o le au uso o loo fa'atagā tautalatala mai i le upu moni, latou te savavali i aloiafi na tutuina e isi; latou te le iloa le Agaga o le Atua ma e leai so latou iloa e fa'atatau i Lona finagalo, ma o lea e faigofie ai lava ona aveeseina i latou mai i lo latou fa'atuatua. O i latou o tagata le mausalī, auā na latou fa'alagolago i isi e maua mai ai se iloa mo i latou.” – *Testimonies for the Church*, vol. 2, p. 644.

Aso Faraile

Me 24

FESILI TOE FA'AMANATU

1. **O le a lo'u uiga aga'i i lo'u to'alua, fanau, le au uso, ma o'u uso a faigaluega?**
2. **Ta'u mai ni la'asaga autu e fa'amalosia ai i tatou i le auala e puleaina ai o tatou laulaufaiva.**
3. **O le a se mea e tatau ona ou faia pe afai e fa'ato'ilaloina a'u e se fa'aosoosoga?**

4. Fa'amatala le eseesea i le va o galuega lelei ma upu agalelei e sau mai i se malamalama'aga mamā, i le fa'atusatusa atu i faufauga fa'apito i se taumafaiga ina ia fausia a'e se igoa ta'uleleia.
5. E fa'apefea ona mafai ona maua se malamalama'aga sili atu ona loloto e fa'atatau i talitonuga o lo o o'u ta'utinoina?

SAPATI, IUNI 1, 2024

Taulaga Sapati Muamua mo se Galuega fa'aMisionare i le Vaega o le Pasefika

O le galuega o le fa'asalalauina o le feau o le tala lelei i totonu o lenei lalolagi, o se galuega tele lava lea, ona o le to'atele o tagata e lē'i fa'alogo lava i le tala lelei o le fa'aolataga. Ua fetalai mai le Ali'i "o le a tala'iina atu fo'i lenei tala lelei o le malo i le lalolagi atoa e fai ma molimau i malo uma; ona o'o mai ai lea o le i'uga" (Mataio 24:14). E alofa le Atua i tagata ta'itasi uma lava o le 7.8 piliona o tagata i totonu o lenei lalolagi ma Na te finagalo ia i latou uma lava ina ia maua le avanoa e liliu ai ia te Ia.

O loo tele tapua'iga i le vaega o le Pasefika e aofia ai le Taoism, Buddhism, Islam ma le Fa'akerisiano; ae ui i lea, o le to'atele lava e fai mai e lē o i latou o ni tagata lolotu po'o i latou fo'i e lē talitonu i le Atua. O loo i ai se galuega moni tele lava e tataua ona faia iinei.

"O le lalolagi atoa lava ua tatala mai nei mo le tala lelei. O Ethiopia ua fa'alālā mai ona lima i le Atua. Amata mai i Iapani ma Saina ma Initia, mai i laueleele o loo fa'apogisaina pea o lo tatou lava konitineti, mai i vaega ta'itasi o lo tatou nei lalolagi, o loo sau ai le alaga o loto ua taia i le agasala mo se iloa e fa'atatau i le Atua o le alofa. E miliona ma miliona e lē'i fa'alogo lava e fa'atatau i le Atua po'o Lona alofa fo'i ua fa'aaliaina i totonu ia Keriso. O le latou aiā lo latou mauaina o lenei iloa. E tutusa lelei a latou aiā ma i tatou i le alofa o le Fa'aola. Ma ua tu'uina mai nei ia i tatou o ē ua mauaina le iloa, fa'atasi ai ma a tatou fanau e mafai ona tatou fa'ailoaina atu i ai, ina ia tali atu i la latou alaga." *Education*, pp. 262, 263.

E ui lava ona o le fa'asalalauina o le feau, atonu e lē o i ai nisi o sa'olotoga i nisi o atunu'u e fa'apei ona i ai i nisi, o le upu na te maua lona auala aga'i atu i loto o tagata ma o loo to'atele tagata talitonu i le feau o le toe fuata'iina i nofoaga atonu e te manatu e te lē maua ai. O lenei Sapati matou te ole atu ai ia te oe ina ia ē tatalo fa'apitoa lava mo lenei galuega, ina ia fa'atagaina e le Atua ia fa'ataunu'uina e saunia ai nisi tagata sili atu ona to'atele mo Lona malo.

"O le auala mo le upu moni ia aga'i atu ai i luma, o tupe e matuā mana'omia lava e fesoasoani i se nofoaga tapua'i e tauave ai i luma le galuega o le upu moni i le itu i mātū o lenei laueleele tele o galuega. Matou te ole atu ia te oe ina ia matuā foa'i ma le loto.

"Auā e fa'apei o le timu e pa'ū mai i lalo, ma le timu aisa mai i le lagi, ma e lē toe fo'i atu i ai, peita'i e fa'asūsūina ai le laueleele, ma tutupu mai ai la'au ma tatupu, ina ia foa'i mai ai fatu i le tagata lūlū saito, ma areto i lē na te aina: O le a fa'apena fo'i La'u upu e alu atu nai Lo'u gutu: o le a lē toe fo'i mai ia te A'u, peita'i o le a ia fa'ataunu'uina le mea Ou te loto malie i ai, o le a manuia fo'i i le mea na Ou auina atu i ai" (Isaia 55:11).

Mo ō outou uso ma tuafafine o loo mamao ese atu.

O Le Papatisoga E Mana'omia e Tagata Uma

MAU TAULOTO: “O le fa’atusa fo’i lea ua fa’aola ai nei le papatisoga ia i tatou, (e lē o le fa’ate’aeseina o le eleele o le tino, a’o le tali a le loto fuatia ifo lelei i le Atua), e ala i le toe fa’atuina mai o Iesu Keriso” (1 Peteru 3:21).

“Ou te aioi atu i tagatā ekalesia i aai ta’itasi uma ina ia latou taofi mau atu i le Ali’i i taumafaiga finafinau mo le papatisoga a le Agaga Paia.” – *Counsels on Health*, p. 548.

Faitauga Fautuaina: *Steps to Christ*, pp. 17-22.

Ulua’i Aso

Me 26

1. O LE ALA E TASI O LE FA’AOLATAGA

a. O le a le fa’amatalaga a Peteru i ana tusitusiga ma ana lauga e fa’atatau i le ala e tasi lava e mafai ona maua ai le fa’aolataga? 1 Peteru 3:18; Galuega 4:10-12.

b. Aisea e lē mafai ai e le Atua i Lona alofa ona Ia fa’amagalo ma lavea’i tagata agasala ,e aunoa ma le maliu o Lona Alo? Isaia 26:10 ma le Roma 8:7 fa’atusatusa i le Roma 5:10 ma le Kolose 1:20-22.

“I le olaga lē sala o le tagata, na ia talanoa ai ma le olioli ma le [Atua]. . . . Peita’i ina ua mavae lana agasala, e lē’i mafai loa ona ia toe maua le olioli i le olaga fa’apaiaina, ma na ia taumafai loa e lafi mai i le Atua. . . . O le tagata agasala e lē’i mafai ona ia fiafia i le mafutaga ma le Atua; na ia mana’o e lafi mai i le mafutaga ma agelu paia. Ana fa’apea e mafai ona fa’atagaina o ia e ulufale atu i le lagi, semanu o le a leai sona fiafiaga mo ia. O le agaga o le alofa lē fa’apito o loo pule ai iina . . . o le a leai se tali e maua mai ai i totonu o lona loto. O ona manatunatuga, o ona fa’anaunauga, o ana faufauga, o le a matuā ese lava mai i uiga ia o loo galuea’iina ai agelu paia lē sala iina. O le a avea o ia o se leo pa’ulua i le lotolotoi o leo matagofie o le lagi. O le lagi o le a avea ia te ia o se nofoaga o le puapuaga. . . . E lē o se poloa’iga sauā na faia e le Atua le fa’asāina o tagata amioleaga mai i le lagi; ua te’ena i latou ona o lo latou lava lē agava’a mo ona tagata paia. O le mamalu o le Atua o le a avea o se afi e fa’aumatiaina ai, ia i latou.” – *Steps to Christ*, pp. 17, 18.

Aso Gafua

Me 27

2. MAUTINOAGA E ALA I LONA TOE SOIFUA MAI

a. E ui lava ina lavea'iina i tatou e ala i le maliu o Keriso, o le a le uiga o loo "lavea'iina ai fo'i i tatou e ala i le toe soifua mai o Keriso"? 1 Peteru 3:21 (vaega mulimuli); 1 Korinito 6:14; 15:22, 23; 1 Tesalonia 4:13-16.

b. O le a se mea o loo fa'amatala mai e Peteru po'o ai moni fo'i na fa'ataunu'uina le fa'atonuga a le Tamā ma toe fa'atuina mai Iesu? Fa'atusatusa le Galuega 2:22-24 i le 1 Peteru 3:18.

“O Lē na maliu mo agasala a le lalolagi, na fuafuaina e i ai pea i totonu o le tu'ugamau mo le taimi na fuafuaina. Sa i ai o Ia i totonu o lena fale puipui-papa o ia o se pagota o le fa'amasinoga tonu a le Atua. . . . Na Ia tauaveina agasala a le lalolagi, ma e na o Lona Tamā lava na mafai ona fa'asa'olotoina o Ia.” – *The Youth's Instructor*, May 2, 1901.

“O le toe fa'atuina mai o Keriso e le Tamā nai le oti, na Ia fa'amamaluina ai Lona Alo i luma o leoleo Roma, . . . ma 'au a Satani, ma luma o le iunivesa fa'alelagi.” – *Lift Him UP*, p. 102.

“Ona fa'alogoina lea o le agelu malosi, ma lona leo na mafua ai ona lūlū le eleele: Iesu o Oe le Alo o le Atua, ua vala'au Lou Tamā ia te Oe! Ona sau ai lea i fafo o Ia lē na mauaina le mana e fa'ato'ilaloina ai le oti ma le tu'ugamau.” – *The Present Truth*, February 18, 1886.

“O le Atua e ofu i le mana; e mafai ona Ia aveina ē ua oti i soligatulafono ma agasala, ma o le galuega a le Agaga lea na toe fa'atuina mai Iesu nai le oti, Na te liua ai le amio fa'aletagata, ma toe fa'afo'i mai i le tagata le fa'atusa o le Atua na leiloa.” – *The Youth's Instructor*, February 7, 1895.

c. O ai o le a toe fa'atuina mai le au paia uma lava i le tino e ola pea i le toe fo'i mai o Keriso, ma o le a le aiaiga e tasi lava o le a mafai ai ona faia lena tulaga? Roma 8:9-11.

“O tino e oti ua toe fa'aolaina mai e le Agaga o loo nofo i totonu ia te outou. . . .

“O le mana o le Agaga o Keriso e toe fa'aola ai o loo nofo i totonu o le tino e oti, e fusia atu ai tagata talitonu ta'itasi uma lava ia Iesu Keriso. . . .

“O Lē na te foa'iina mai le ola o le a Ia fafaguina a'e Ona tagata na Ia fa'atauina mai i le ulua'i toe tu. . . . E ala i le mana o le Fa'aola lea na afio i totonu ia i latou a'o latou feola ma, talu ai ona sa latou tofusua i le natura fa'alelagi, o lea e toe fa'aolaina mai ai i latou nai le oti.” – *Selected Messages*, bk. 2, p. 271.

“O le oti o le moe lea i le silafaga a Keriso – o le moe lē leoa, i le pogisa. Na te fetalai e fa'ataui i le oti lea e peisea'i e na o sina taimi pu'upu'u. . . . Ma, i le tagata talitonu la, o le oti e na o se moe itiiti lava lea. Ia te ia, o le oti, o lona moe lea.

“O le mana lava lea na toe fa'atuina mai Keriso nai le oti o le a toe fa'aolaina mai fo'i Lana ekalesia.” – *My Life Today*, p. 295.

Aso Lua

Me 28

3. O LE “MANA” I TUA O LE TALA LELEI

- a. **O ai na fa’aaoga e Iesu e tala’iina le tala lelei, ma aioi atu i le aigā tagata pa’ū i taimi o le Feagaiga Tuai? 1 Peteru 3:18 (vaega mulimuli), 19, 20. O le auala e malamalama ai i “agaga i totonu o falepuipui,” fa’atusatusa lenei fa’aupuga i le Fa’ata’oto 5:22; Isaia 42:6, 7; 61:1.**

“O le Atua o loo Ia ole mai pea i taimi uma lava i le loto o le tagata, ma fa’atonu mai ina ‘ia ia iloa Lona alofa ma Lona onosa’i mutimutivale. . . . Ua fa’apena ona Ia aioi mai i le aigā tagata i augatupulaga uma lava. I aso o Noa na fetalai mai ai Keriso i tagata e ala mai i se meafaigaluega fa’aletagata ma lauga mai ia i latou sa nofo pologa i le agasala.” – *This Day With God*, p. 278.

“A’o le’i o’o i le taimi lea, sa i ai lava le Agaga i le lalolagi; talu mai lava le amataga o le galuega o le fa’aolataga sa ia musumususu ai lava i loto o tagata.” – *The Desire of Ages*, p. 669.

- b. **Ina ua mavae le afio a’e o Iesu i le lagi, o ai na auina atu e Keriso e tu’uina atu le mana i aposetolo ina ia fa’aauuina le galuega o le tala lelei? Ioane 14:12, 16, 17; 20:21, 22; Galuega 1:2.**

“A’o i ai Keriso i luga o le fogaeleele, e lē’i mana’omia ai e le au so’o se isi lava fesoasoani. Ana lē aveesea lava Iesu mai ia i latou, o lea na latou fa’ato’a lagonaina ai loa lo latou mana’omia o le Agaga, ma na afio mai loa le Agaga.

“O le Agaga Paia o le sui lea o Keriso, peita’i na aveesea mai ia te ia uiga fa’aletagata, ma o lea e tuto’atasi ai lava ia. O le taofia o Keriso i le tino tagata, o lea e le’i mafai ai ona i ai o Ia i nofoaga uma. O lea, e mo lo latou manuia lona alu atu i le Tamā, ma auina mai le Agaga e avea ma Ona sui i luga o le fogaeleele. E leai la se tasi na sili atu lona fa’amanuiaina ona o lona nofoaga poo lana mafutaga vavalalata fo’i ma Keriso. E ala i le Agaga, o le a mafai ai ona maua e tagata uma lava le Fa’aola. I lenei uiga o le a sili atu ai ona Ia latalata ia i latou nai lo le tulaga e i ai pe ana fa’apea e lē afio a’e o Ia i le lagi.” – *Ibid.*

- c. **O le a le folafolaga a le Atua o le a toe fa’ataunu’uina i le taimi o le i’uga, i se tulaga e sili atu nai lo le taimi o le au aposetolo? Ioelu 2:28-31; Hosea 6:3.**

“O le galuega tele o le tala lelei e lē fa’amuta i fa’aaliga itiiti ifo o le mana o le Atua nai lo lea na fa’ailogaina ai lona amataga.” – *The Great Controversy*, p. 611.

Aso Lulu

Me 29

4. O LE PAPATISOGA E MANA’OMIA E TAGATA UMA

- a. **Fa’amatala le papatisoga atoatoa e mana’omia mo le fa’aolataga. Mareko 1:7, 8; Ioane 3:3, 5.**

“O lagona i totonu o le ekalesia e matuā lē lelei lava. . . . O le mafanafana o lo latou ulua’i alofa ua liu aisa nei, ma se’ivagana la ua fa’aliusuavaiina e ala i le papatisoga a le Agaga Paia, o la latou tu’ugalamepa o le a aveesea mai i lona nofoaga, se’ivagana ua latou salamo ma faia a latou ulua’i galuega.” – *Testimonies to Ministers*, pp. 167, 168.

b. Aisea e faigata ai i le to’atele o kerisiano ona tausia a latou ta’utinoga na faia i la latou papatisoga i le vai? Eperu 5:11, 12; 6:1, 2.

“E to’atele e lē o tu’uina mai se fa’amaoniga mausali e iloa ai o loo latou fa’amaoni i a latou tautoga o le papatisoga. O lo latou vilivilita’i ua fa’aliuaisaina e tapua’iga fa’afoliga, o fa’anaunauga fa’alelalolagi, fa’amauauga fa’alialiavale, ma le alofa o le tagata ia te ia lava.” – *Testimonies for the Church*, vol. 9, p. 155.

“E matuā tele le mana’omia e le au faigaluega o le papatisoga a le Agaga Paia, ina ia avea moni ai i latou ma misionare moni mo le Atua.” – *Counsels on Sabbath School Work*, p. 155.

“O la tatou galuega i le taimi lenei le gaua’iina o ō tatou loto ia Keriso, ina ia saunia ai i tatou mo le taimi o le fa’afouga mai i luma o le Atua – saunia mo le papatisogaa a le Agaga Paia.” – *Evangelism*, p. 702.

c. O ai Lē e to’atasi e mafai ona fa’amamāina o tatou loto ina ia faia a tatou ta’utinoga o le papatisoga o se “tali moni a se loto fuatia ifo lelei i le Atua”? Fa’atusatusa le 1 Peteru 3:21 i le Eperu 9:14; Roma 8:9, 10.

“O le mea tatou te mana’omia o se loto lea e toe fa’aolaina e le Agaga o le Atua; auā o le to’atele o tagata, o le malamalama’aga ua lē mafai ona manatunatu lelei ona o le tu’inanau sa’oloto i le agasala ma le lē talitonu. E tatau ona tatou iloa po’o le a le tapua’iga, ma ia tatou iloa e tatau ona i ai sa tatou so’otaga ola ma le Atua o le lagi.” – *The Signs of the Times*, July 25, 1892.

“E leai se isi a ua na o le Agaga Paia Na te fa’ailoa mai i le mafaufau le tapula’a fa’aleagaga o le amiotonu ma fa’ailoa mai le agasala, ma fa’atupulia ai le fa’anoanoa fa’ale-Atua e galuea’iina ai le salamo lea e lē toe mana’omia e toe salamo ai, ma fa’aosofia ai le fa’atinoina o le fa’atuatua ia te Ia Lē e to’atasi e mafai ona lavea’i mai i agasala uma.” – *Selected Messages*, bk. 3, pp. 137, 138.

Aso Tofi

Me 30

5. TAULA’IINA O Ō TATOU MANATUNATUGA

a O fea o loo toe fa’asino atu i ai Peteru i le ta’ita’iina atu o i tatou i le fa’aolataga? 1 Peteru 3:21 (vaega mulimuli), 22; Eperu 8:1.

“[O le Ali’i o Iesu] o loo nofo i le itu taumatau o le Atua ma Ia mauaina le mamalu silisili i le avea o ia ma Atua, o le mamalu lava lea sa ia te Ia a’o le’i faia le lalolagi. Na te tufatufaina atu Ana meaalofa ia i latou uma lava o le a ole atu ai ia te Ia e ala i le fa’atuatua. . . .

“O loo ia i tatou se faleoa lē mafā’amutalia, o se sami o le alofa i totonu o le Atua o lo tatou fa’aolataga.” – *That I May Know Him*, p. 338.

“Na Ia tula’i mai nai le tu’ugamau o ufitia e se ao o agelu i le mana ofoofogia ma le mamalu – o le Atua ma le tagata ua tu’ufa’atasia. Na Ia toe taofimauina le lalolagi lea na fai mai Satani na ia pule ai, e avea ma vaega o lana pule’aga fa’aletulafono, ma o Lana gaioiga ofoofogia i le foa’iina mai o Lona soifua, na Ia toe fa’afo’isia ai le aigā tagata atoa lava i le leleiga ma le Atua.

“Aua ne’i talitonu se tasi i le manatu pumo’omo’o, vāiti, e fa’apea, so’o se galuega lava a le tagata, e mafai ona fesoasoani ai i se auala e sili ona itiiti e fa’alēaogaina ai le aitalafu o ana solitulafono. O se fa’aseseēga mata’utia lava lea. Afai o le a ē malamalama i ai, e tataua ona fa’amuta nei lou finau malosi i ou lava manatu fa’apelepeleina, ma o loto fa’amaulalo ia outou su’esu’eina ai le togiola. O lenei mataupu o loo matuā lē manino lava le malamalama i ai, o lea, o le afe ma afe o ē o loo fai mai o i latou o fanau a le Atua, o i latou moni o fanau a le ‘ti’apolo, auā o le a latou fa’alagolago i a latou lava galuega. Na mana’omia lava e le Atua galuega lelei i taimi uma lava, e mana’omia fo’i e le tulafono galuega lelei, peita’i talu ai ona sa tu’uina e le tagata ia lava i le agasala, o lea ua leai ai se aoga o ana galuega lelei, e na o le amiotonu lava a Iesu e mafai ona lavea’iina ai. E mafai e Keriso ona lavea’i atoatoa auā o loo soifua pea o Ia e fautua mo i tatou. Na pau lava le mea e mafai ona faia e le tagata i lona lava fa’aolataga, o le talia lea o le vala’aulia. . . . E leai se agasala e mafai ona faia e le tagata e lē’i fa’amalieina i le maliu o Iesu. E fa’apena, ona fa’aauau ona ofo mai ai e Keriso i le tagata agasala i taimi uma i olega finafinau lava, se togiola mae’ae’a.” – *Selected Messages*, bk. 1, p. 343.

Aso Faraile

Me 31

FESILI TOE FA’AMANATU

1. E fa’apefea ona mafai ona maua le olioli sili atu i lo’u talanoa ma manatunatu e fa’atatau ia Iesu ma Lana Upu?
2. O le a se fa’amaoniga o i ai o le galuega a le Agaga Paia i totonu ia te a’u?
3. O le a se mea o le a fa’aleleia atili ai le fa’alauteleina o le galuega a le Agaga Paia Na te fa’aaogaina ai a’u i auaunaga?
4. E fa’apefea ona mafai ona ou iloa le papatisoga a le Agaga Paia i lona atoaga?
5. O le a se mea e masani lava ona mafua ai ona tatou lē iloa atu Iesu ma fa’apena ona leai ai fo’i ma so tatou fa’atuatua?

Lesona 10

Sapati, Iuni 8, 2024

Ola i se Olaga Fou

MAU TAULOTO: “Ina ia lē toe usiusita’i atu i tu’inanau o tagata i ona tausaga o totoe i le tino, a ia usiusita’i i le finagalo o le Atua.” (1 Peteru 4:2).

“O i latou ua fa’apaiaina moni lava o le a latou ava ma usita’i i le Upu a le Atua i le vave lava e tatalaina atu ai ia i latou, ma o le a latou fa’aalia se fa’anaunauga malosi ina ia latou iloa ai po’o le a le upu moni i vaega ta’itasi o mataupu.” – *Faith and Works*, p. 121.

Faitauga Fautuaina: *That I May Know Him*, p. 104;
Prophets and Kings, pp. 701, 702.

Ulua’i Aso

Iuni 2

1. O SE MANATU E FA’ALOTOTELEINA AI E FA’AVAVAU

a. O le a se mea ua fautua mai le aposetolo o Peteru ia i tatou ina ia tatou manatunatu i ai ina ia fa’amalosia ma fa’alototeleina ai i tatou pe a osofa’ia i tatou e fa’aosoosoga ma puapuaga eseese? 1 Peteru 4:1; Eperu 12:3.

“E mafai ona tatou fa’amalosia lo tatou fa’atuatua ma fafaguina lo tatou alofa e ala i lo tatou o atu so’o i aao o Iesu, ma o iina tatou te manatunatu ai i lona fa’alumaina.” – *Our High Calling*, p. 361.

“[1 Peteru 4:1] Ia tatou fesili fa’apea: O le a se mea o le a faia e lo tatou Fa’aola pe ana fa’apea o Ia o loo tutupu ai mea ia o loo tutupu ia i tatou? . . . O lenei fesili e taliina e le fa’ata’ita’iga a Keriso. Na Ia tu’ua lona tulaga fa’alēatua, tu’u ese Lona mamalu, fa’asatauro Ana oa, ma fa’aofuina Lona natura atua i le tino tagata, ina ia mafai ai ona Ia maua tagata i le tulaga sa latou i ai. O Lana fa’ata’ita’iga o loo fa’ailoa mai ai na Ia foa’i mai Lona soifua mo tagata agasala.” – *Testimonies for the Church*, vol. 4, p. 79.

“O Keriso na fa’aosoosoina i mea uma lava e fa’apei ona fa’aosoosoina ai i tatou. O i latou o loo mafatia i lalo o tofotofoga ma fa’aosoosoga, ma ua latou manatu ua lafoa’ia i latou e a latou uo, ia latou manatunatu e fa’atatau ia Keriso. . . . i Lona nofo to’atasi i le vao, ma fetaia’i ai ma fa’aosoosoga e sili atu ona faigata nai lo so’o se fa’aosoosoga ua aumaia ia i latou. Aua ne’i latou fa’avaivai i le fa’anoanoa, a ia aapa atu se lima gatete o le fa’atuatua ina ia taofimauiina le lima o loo fa’aloaloa mai e lavea’i. Ia latou lafo atu o latou agaga leai se fa’asoasoina i luga ia Iesu, o Lē, talu ai ona ua uma ona Ia uia lea lava fa’aosoosoga, o lea Na te silafia ai le auala e lavea’i ai i latou ua fa’aosoosoina.” – *Manuscript Releases*, vol. 21, p. 12.

Aso Gafua

Iuni 3

2. E ALA ATU I PUAPUAGA E O’O ATU AI I LE MANUMALO

a. Aisea e fa’atagaina ai e le Atua i tatou ina ia tatou ui atu i puapuaga ma tiga? 1 Peteru 4:1 (vaega mulimuli); 2 Korinito 12:7-10.

“Ina ua fa’aalia e le Fa’aola Ia lava ia Paulo i ave pupula o Lona mamalu. . . . na fa’atauasoina ai mata fa’aletino o Paulo ona o le pupula o le fa’atasi mai o Lē na ia upu leaga i ai, peita’i na fa’apena ona faia ina ‘ia ia maua ai le va’ai fa’aleagaga, ina ia

fafaguina ai o ia mai i le paiē lea na fa’anunumiina ma fasiotia ai lana va’ai fa’aleagaga.” – *The SDA Bible Commentary* [E. G. White Comments], vol. 6, p. 1058.

“O le mata’u tele lava na fa’apologaina ai a’u, o le manatu lea, afai ou te usita’i i le valaa’u o tiute, ma ou alu atu ma fa’ailoa atu ua alofagia a’u e Lē Silisiliese i fa’aaliga mo tagata, atonu o le a ou gaua’i atu i le loto vi’i agasala, ma . . . aumaia ai i luga ia te a’u le to’asa o le Atua, ma fano ai lo’u lava agaga. . . .

“O lenei na ou aioi atu afai e tatau ona ou alu ma fa’ailoa atu mea ua fa’ailoa mai e le Ali’i ia te a’u, ia tausia a’u mai i le fa’amauualuga lea e lē tatau ia te a’u. Na fai mai le agelu: ‘Ua fa’afofogaina au tatalo, ma o le a taliina mai. Afai e fa’amata’uina oe e lenei uiga leaga o loo ē fefe ai, o le aao o le Atua o le a fa’aloaloa atu e lavea’i ia te oe; e ala i puapuaga o le a Ia fa’alatalataina atu ai oe ia te Ia lava, ina ia fa’atumauiina lou agamalu. Ave le feau ma le fa’amaoni; onosa’i seia o’o i le i’uga, ma o le a ē ‘ai i le fua o le la’au o le ola ma ē inu i le vai o le ola.’” – *Christian Experience and Teachings of Ellen G. White*, pp. 67, 68.

b. E ui lava ina fa’aosoosoina e fa’anaunauga agasala o le tino, o le a le sini o kerisiano ta’itasi uma e tatau ona i ai? 1 Peteru 4:2, 15; Efeso 4:17, 22-24.

“E sili atu le mea e mana’omia e le Atua mai i Ona so’o nai lo le tulaga o loo iloa ai e le to’atele. Afai o le a tatou lē manana’o e fausiaina o tatou fa’amoemoega o le lagi i luga o se fa’avae sese, e tatau ona tatou taliaina le Tusi Paia e fa’apei lava ona tatou faitau atu i ai, ma ia tatou talitonu o le a faia e le Ali’i le mea ua Ia fetalai mai ai. Na te lē mana’omia mai ia i tatou se mea e tasi lava o le a Ia lē foa’iina mai ia i tatou le alofa tunoa e fa’atino ai. O le a leai se tatou alofaga e tu’uina atu i le aso o le Atua pe afai tatou te lē ausia le tapula’a ua tu’uina mai i o tatou luma i totonu o Lana upu.” – *Testimonies for the Church*, vol. 5, p. 171.

“O le liuaga o se galuega lea e lē fa’atāuaina e le tele o tagata. E lē o se mea itiiti le liuaina o se mafaufau fa’alelalolagi, fiafia i le agasala ma aumaia ai ina ia malamalama i le alofa lē mafa’amatalaina o Keriso. . . . A malamalama loa [le loto] i nei mea, ona ia va’aia loa lea o lona olaga i le taimi ua mavae ua ia inosia ma ita i ai. Ua inoino i le agasala. . . . Ua ia lafoa’ia ona fiafiaga ua mavae. Ua ia maua se mafaufau fou, lagona fou, o finafinauga fou e fiafia i ai, ma se loto fou.” – *The Faith I Live By*, p. 139.

Aso Lua

Iuni 4

3. O NI MASANIGA E TATAU ONA FA’ATO’ILALOINA

a. O a tu’inaunauga agasala o loo ta’ua mai e Peteru o loo ta’atele ma faigata ona manumalo mai ai? 1 Peteru 4:3.

Fa’atumulia i tu’inaunauga leaga lē mataofia o le tino: “O le tu’inaunauga agasala ua fa’atinoina i lenei augatupulaga amio pepelo lē fa’amaoni, e lē tatau ona avea ma tapula’a mo so’o o Keriso. O nei fa’aaliga ta’atele ua a’e mai nei o le lē popoi lē fa’atuaoia, e lē tatau ona tula’i mai i le lotolotoi o kerisiano. . . . Afai o lagona o tu’inaunauga leaga lē mataofia o le tino, olaga lē mamā o le fa’aleagaina o le tino, mulilua.

. . . afai o amioga nei o le taimi lenei i le lotolotoi o i latou e lē o iloa le upu moni, . . . o le a le tāua tele e tatau ona tula'i ai le vasega o loo ta'utino mai o i latou o so'o o Keriso. . . . i le eseesea manino mai i lena vasega o loo pulea e tu'inanauga fa'amanu!" – *The Adventist Home*, p. 329.

So'ona Tu'inanau i le Uaina: "O le auala e tasi lava e mafai ona fa'amausalīina le saogalemu o so'o se tasi mai i le malosi o le lē faifa'atatau lelei, i le 'ai, o lona lē fa'aaogaina atoa lava lea o le uaina, pia, ma vai inu malolosi. . . . O le tagata e manumalo lea o le a fa'amamaluina, ma o le a lē soloiesea lona igoa mai i le tusi o le ola." – *Child Guidance*, pp. 401, 402.

Fiafiaga, faigā'ai: "O kerisiano ia o loo fa'afoliga i a latou amio ma o latou olaga fa'aletapua'iga, o loo fa'aaogaina e le ti'apolo tafa'aosooso e fai ma ana mailei. O le vasega lenei e sauni i taimi uma lava mo fa'apopotoga mo fiafiaga po'o ta'alogā fo'i, ma o lo latou a'afiaga e tosina i ai isi. O tane ma tama'ita'i talavou ia ua taumafai ia avea i latou ma kerisiano o le Tusi Paia, ua fa'atauana i latou ina ia fa'atasi atu i le pātī. . . . Latou te lē o iloa fa'aleagaga, o nei fiafiaga o faigā 'ai moni lava nei a Satani, ua saunia ina ia taofia agaga mai i le. . . . mauaina o le ofu pa'epa'e o le amio, o le amiotonu lea a Keriso. Ua nunumi ai loa o latou mafaufau po'o le a le mea tonu mo i latou e tatau ona latou faia i le avea o i latou ma kerisiano." – *The Adventist Home*, p. 518.

"O le to'atele o tagata ua fa'aaogaina le toe fuata'iina o le soifua maloloina, ua latou lafoa'ia mea uma lava e fa'amanu'alia ai; peita'i o lona uiga la . . . e mafai ona latou aai i le tele o meaai latou te malilie ai? Latou te nonofo i lalo i le laulau . . . ma tu'uina atu i latou i le tu'inanau i le 'ai ma matuā so'ona aai ai lava. . . .

"Ma o le a le a'afiaga e faia e le so'ona 'ai i le manava? Ua fa'avaivaia, ua fa'avaivaia totoga e lomiina ai meaai, ma o fa'ama'i, fa'atasi ai ma ona a'afiaga leaga uma lava, ua aumaia ona o le i'uga lea. . . .

"Ua lē lelei lo latou fa'alogona, ma ua foliga mai ia i latou e matuā leaga lava a latou fanau. E lē mafai ona latou tautala lēmū atu ia i latou, pe gai oi to'a filemu fo'i i totonu o ō latou aiga e aunoa ma le alofa tunoa fa'apitoa. O i latou uma lava o loo i o latou itu uma, ua a'afia i le fa'ama'i o loo i luga ia i latou; o i latou uma fo'i e tatau ona puapuagatia ai i i'uga o ō latou ma'i. . . .

"E o'o lava i tagata toe fuata'i o le soifua maloloina, e mafai ona latou sese i le telē o le meaai e aina." – *Counsels on Diet and Foods*, pp. 135, 136.

Ifogātupua inosia: "E le'i fa'atagaina i latou e liua atu i aganu'u ma masaniga a tagata fa'apaupau, po'o lo latou fa'atumauina fo'i o fa'atusa o a latou ifogā tupua inosia. Tusa lava po'o le a le fa'apelepeleina o le tupua, po'o le a le matagofie na'uā o le fausaga, po'o le tomā na faia a'i, o mea uma lava na patino i tapua'iga fa'apaupau, e tatau ona fa'aumatiaina." – *The Signs of the Times*, January 13, 1881.

Aso Lulu

Iuni 5

4. FA'APEI O KERISO I SO'O SE MEA I TAIMI UMA LAVA

a. O le a le i'uga e masani lava ona tupu o le a tatou fetaia'i i lenei olaga, pe a tatou filifili tatou te ola e tusa ai ma le finagalo o le Atua? 1 Peteru 4:4, 12.

“A’o latalata mai pea le taimi o le i’uga, . . . o le a fa’aaoga e Satani mea faigaluega fa’aletagata ina ia tauemu ma faifai ia i latou o loo ‘fausia le pa.” – *Prophets and Kings*, p. 659.

“O loimata [o tagata o le Atua] o le a latou lapata’iina ai tagata amio leaga i lo latou lamatiaga i lo latou solia o le tulafono a le Atua, ma o le fa’anoanoa lē mafa’amatalaina o le a latou fa’amaulaloina ai i latou lava i luma o le Alii i le salamō. O tagata amio leaga o le a latou fa’atauemu i lo latou fa’anoanoa ma ulagia a latou olega finafinai. Peita’i o le tiga fa’alemafaufau ma le fa’alumaina o tagata o le Atua, o se fa’amaoniga moni lea e iloa ai, ua latou toe maua lo latou malosi ma la latou amio fa’ale-Atua lea sa leiloa ona o le agasala.” – *Ibid.*, p. 590.

b. O le a se mea e tatau ona manatua e kerisiano uma lava a’o tauemua pe inosia fo’i i latou? 1 Peteru 4:5, 13-16; 2 Peteru 2:12.

c. O le a le uiga e tatau ona ia i tatou pe a fa’amauoaina ē o loo tauemu mai ia i tatou – pe i ai fo’i se mea leaga e tupu ia i latou? A’o le a lo tatou uiga i tagata uma lava e fai mea leaga mai ia i tatou? 1 Peteru 4:17-19; Mataio 5:44.

d. O le a se mea tatou te mana’omia ia teuina i ō tatou mafaufau e fa’atatau i tagata e tauemu ma inoino mai ia i tatou – ma e fa’apefea ona mafai ona tatou ausia leni ituaiga mafaufau? 1 Peteru 4:6; Efeso 2:3-5; 2 Timoteo 2:24-26.

“A ē fetaia’i ma i latou o ē . . . e lē fiafia i le upu moni, aua le fa’amalosia atu ou manatu uiga ese. Talanoa muamua ma i latou e fa’atatau i mataupu e mafai ona outou ioe uma i ai. To’otuli fa’atasi ma i latou i le tatalo. . . . O oe ma i latou o le a aumaia fa’atasi i se so’otaga vavalalata ma le lagi, o uiga lē fiafia i le upu moni o le a fa’avaivaia, ma o le a sili atu le faigofie ona aapa atu i le loto.” – *Evangelism*, p. 446.

Aso Tofi

Iuni 6

5. MANATUA I MEA UMA LAVA E TUTUPU

a. O le a se mea e tatau ona tatou manatua i taimi uma lava pe tatou te mauoa, maloloina ma fiafia, pe o tatou mama’i fo’i, fa’anoanoa, po ua aveesea atu fo’i meatotino mai ia i tatou? 1 Peteru 4:7.

“Afai tatou te talanoa ma o tatou masalosologa ma mea tatou te popole ai, pe tatou te taumafai fo’i e fofōina mea uma lava e lē o mafai ona tatou va’ai manino atu i ai, a’o le’i i ai ia i tatou le fa’atuatua, o le nunumi lē malamalama o le a na ona fa’atuputeleina ma sili atu ona loloto. Peita’i afai tatou te o mai i le Atua, ma lo tatou lagonaina o le leai o so tatou fesoasoani ma lo tatou fa’alagolago ia te Ia, e fa’apei o le tulaga moni lava o lo o i ai i tatou, ma o le fa’atuatua agamalu talitonu tatou te fa’ailoa atu ai o tatou mana’o ia te Ia o Lē e lē mafuatia Lona poto, Na te silafia mea uma lava i le foafoaga, ma Na te pulea mea uma lava i Lona finagalo ma Lana upu, Na te mafai, ma o le a Ia fa’afofoga mai i la tatou alaga, ma o le a Ia fa’asusuluina mai le malamalama i o tatou loto. E ala i le tatalo

fa'amaoni e aumaia ai i tatou i le so'otaga ma le mafaufau o le Atua lē mafuatia. Atonu e lē o ia i tatou ni fa'amaoniga iloga i le taimi e silasila mai ai fofoga o lo tatou Fa'aola ia i tatou, i le agaga mutimutivale ma le alofa, peita'i o le tulaga moni lava lea o loo Ia faia. Atonu tatou te lē o lagonaina Lona pa'i mai i le va'aiga o mata, peita'i o Lona aao o loo i luga ia i tatou i le alofa ma le mutimutivale agalelei. . . .

“O le finafinau i le tatalo, ua faia lea e avea ma aiaiga o le mauaina mai. E tatau ona tatalo i taimi uma pe afai tatou te manana'o tatou te tutupu a'e i le fa'atuatua ma le iloa. . . . Ua apoapoa'i mai Peteru i tagata talitonu ina ia 'fa'autauta, ma ia mataala i le tatalo.' 1 Peteru 4:7. . . . O le tatalo lē muta o le so'otaga lē muta lea a le loto ma le Atua, ina ia tafe mai ai le ola mai i le Atua i totonu o lo tatou ola; ma toe tafe atu ai i le Atua le olaga mamā ma le fa'apaiaina mai i o tatou olaga.” – *Steps to Christ*, pp. 96-98.

“O upu a le aposetolo na tusia mo fa'atonuga mo le au talitonu i augatupulaga ta'itasi uma, ma e i ai lo latou tāua fa'apitoa lava mo i latou e ola i le taimi 'e o'o mai ai le i'uga o mea uma.' O ana apoapoa'iga ma lapata'iga, ma ana upu o le fa'atuatua ma le loto tele, o loo mana'omia e tagata ta'itasi uma lava.” – *The Acts of the Apostles*, p. 518.

Aso Faraile

Iuni 7

FESILI TOE FA'AMANATU

1. **O fea e tatau ona ou “alu” i ai e ala i le fa'atuatua pe a fa'apuapuagatiaina a'u ma ou fa'anoanoa ai— ma aisea fo'i?**
2. **O le a le sini e mafua ai ona ta'ita'ia atu i tatou e le Atua ia ui atu i mafatiaga ma puapuaga?**
3. **O o'u nofo pologa pea ea i o'u tu'inanauga fa'alelalolagi ua mavae? Afai o le tali o le ioe, o le a le umi o loo o'u fuafua e fa'atuai ai lo'u gaua'i atoa atu?**
4. **O le a lo'u uiga e tatau ona i ai ia i latou e tauemu mai ia te a'u?**
5. **O le a se mea atonu o loo fa'alavelaveina ai a'u mai i lo'u mauaina o se olaga e matuā tumu i le tatalo e fa'apei o le tulaga e tatau ona ou maua?**

Lesona11

Sapati, Iuni 15, 2024

Alofa Naunau

MAU TAULOTO: “Ia muamua i mea uma ona maua e outou le alofa naunau o le tasi i le tasi: auā o le alofa e ufiufi ai agasala e tele” (1 Peteru 4:8).

“O mea faigaluega a le alofa e matuā ofoofogia lava lona mana, auā o mea faigaluega fa'alelagi ia.” – *Education*, p. 114.

Faitauga Fautuaina: *Education*, pp. 113-118.

1. LOLOTO O LE ALOFA – O LE FA'AILO TELE LEA

a. Ua fa'apefea ona fa'aleagaina e le agasala le loloto o lo tatou alofa? Kenese 3:12.

“O le alofa, agaga fa'afetai, o le fa'amaoni i lo tatou Atua-foafoa – o uiga uma lava nei na fa'ato'ilaloina e le alofa o [Atamu] ia Eva. O Eva o se vaega o ia lava, ma na te lē'i mafai ona onosa'ia le manatu o le vavaeeseina o ia mai ia Eva [ina ua mavae ona ia aina le fua fa'asāina.] . . . O lea na ia filifili ai e oti fa'atasi ma Eva; afai o le a tataua ona ia oti, o le a ia oti fo'i fa'atasi ma ia. . . .

“[Mulimuli ane, i luma o le Atua], e lē'i mafai ona te'ena e Atamu pe faia fo'i se alofaga mo lana agasala; peita'i e aunoa ma le fa'aalia o lona salamō, na ia taumafai ai e lafo atu le tu'ua'iga i luga o lana avā, ma luga fo'i o le Atua lava Ia.” – *Patriarchs and Prophets*, pp. 56, 57.

b. O le a le auala e sili ona faigofie e iloa ai po'o a'u o se kerisiano moni? 1 Ioane 2:9; 4:20; Ioane 13:35.

“O anapo na ou miti ai fa'apea, o se vaega itiiti o tagata sa fa'apotopoto fa'atasi ina ia faia se fa'atasiga fa'aletapua'iga. Sa i ai se tasi na sau i totonu ma nofo i se tulimanu pogisa, i le nofoaga o le a lē iloa atu ai o ia e le tele o tagata. E lē'i i ai se agaga o le sa'olotoga. O le Agaga o le Atua sa fusifusia. E i ai ni fa'amatalaga na faia. . . . Na manino mai e lē'i i ai le alofa o Iesu i totonu o loto o i latou na fai mai e talitonu i le upu moni, ma o le i'uga mautinoa, e lē'i fa'atasi mai le Agaga o Keriso. . . . O le fa'apotopotoina fa'atasi, e lē'i toe fa'amalosia ai se tasi.

“Ina o le a fa'amutalia le fa'atasiga, na tula'i ai le tagata ese lea sa nofo i le tulimanu ma na ia fai atu ia i latou i se leo na tumu i le fa'anoanoa ma loimata, o loo matuā telē se mea lea latou te lē o maua i totonu o ō latou lava loto, i o latou lava olaga, o le alofa lea o Iesu.” – *This Day With God*, p. 157.

2. MALAMALAMA I LE TAPULA'A O LE ALOFA

a. O le a le tapula'a o loo fausia ai i luga le talitonuga o le alofa i lenei lalolagi? Luka 6:32-34.

b. O le a le tapula'a o loo fausia ai i luga le alofa moni fa'aleAtua? Mataio 5:44, 45; Ioane 15:13; 1 Ioane 4:7-11.

“O le alofa e sili atu nai lo se lagona oso, o se lagona. O le alofa o se tapula'a ola, galue lea. E lē ta'ita'ia e lagona, peita'i e ta'ita'ia e le malosi fai filifiliga o le loto. I totonu o le alofa lea o loo fa'amalamalamaina mai ai le filifiliga mausali a se mafaufau ua fa'amaulaloina ma agamalu, lea e taofi mau atu i le malosi o le Atua lē mafuatia, ma

fa'apea atu, O le a ou auauna ia te Oe e o'o lava i le oti." – *The Signs of the Times*, June 20, 1900.

“Afai o le a sauni lava i taimi uma tagata uma lava o loo sa'ilia le malo o le Atua ma Lana amiotonu e galulue i galuega a Keriso, semanu o le a matuā sili atu ona faigofie le ala aga'i atu i le lagi! O fa'amanuiaga a le Atua o le a tafe mai i totonu o le agaga, ma o Ona vi'iga o le a i ai i ou laugutu i taimi uma lava. O le a ē auauna loa i le Atua mai i tapula'a. O ou lagona atonu o le a lē i ai i se natura olioli i taimi uma; o le a i ai taimi e fa'apaologia ai e ao pogisa le lautele o lou iloa; peita'i o le fa'amoemoe o le kerisiano, e lē fa'alagolago i le fa'avae oneone o lagona. O i latou e gaiou mai i tapula'a, o le a latou va'aia le mamalu o le Atua i tala atu o pogisa, ma latou malolo atu i luga o le upu mautinoa o le folafolaga. O le a lē fa'avaivaia i latou mai i lo latou fa'amamaluina o le Atua, tusa lava po'o le a le pogisa o le ala. O faigata ma tofotofoga o le a na ona foa'i atu ai ia i latou se avanoa e fa'ailoa ai le fa'amaoni o lo latou fa'atuatua ma lo latou alofa.” – *The Review and Herald*, October 20, 1910.

c. Afai o i tatou ua uma ona papatisoina, o loo faigata pea ona tatou fa'amagalo, gaua'i, ma fa'ailoa atu le alofa ma le onosa'i, o le a le mea o loo tatou misia? Roma 8:7-10; 1 Ioane 4:8.

“O le fa'apaiaina moni lava e fa'atasia atu ai tagata talitonu ia Keriso ma le tasi i le isi i filifili o le agalelei. O lena fa'atasiga e fa'atupulia ai le tafe atu o galu taumasuasua o le alofa fa'aKeriso i taimi uma lava i totonu o le loto, lea e toe tafe atu i le alofa o le tasi i le isi.

“O uiga ia e aoga ona maua e tagata uma, o uiga ia na iloga ai le atoatoa o le amio a Keriso – o Lona alofa. . . .

“O le fa'aseseēga tele lava ma sili ona mata'utia le manatu fa'apea, e mafai e se tagata ona maua le fa'atuatua e o'o atu ai i le ola e fa'avavau, e aunoa ma lona mauaina o le alofa fa'aKeriso mo lona au uso.” – *The SDA Bible Commentary* [E. G. White Comments], vol. 5, p. 1141.

Aso Lua

Iuni 11

3. O SE TAPULA'A E TATAU ONA A'OA'OINA

a. O le a le tapula'a paia ua ofo mai e Peteru ia tatou a'oa'oina ma fa'atino i o tatou olaga i aso ta'itasi? 1 Peteru 4:8 (vaega muamua); 1:22.

b. O le a le uiga o le a “ufiufi ai agasala e tele” e le alofa”? 1 Peteru 4:8 (vaega mulimuli) fa'atusatusa i le Fa'ata'oto 17:9; Iakopo 5:19, 20.

“Afai e te manatu ua fa'amanu'alia oe e lou uso poo lou tuagane, alu ia te ia i le agalelei ma le alofa, ma e mafai ona lua taunu'u i se malamalama'aga ma le toe fa'aleleiga. A ē a'oa'i i le tagata sese, ia ē manatua i taimi uma lava o loo ē faia ia Keriso e ala atu i Lana au paia. Alu i lou uso lea ua ē manatu o loo sese, ma talanoa i le alofa na o oe lava ma ia; afai e fa'amanuiaina oe i le fofōina o le fa'afitauli, ua ē maua mai lou uso e

aunoa ma lou fa'aalia o ona vaivaiga, ma o le maliEGA i le va o oulua, o le ufiufi lea o agasala e tele mai i mata fia iloa o isi o loo mata'itū mai. O isi tagata latou te lē mana'omia lo latou iloa fua o ou fa'afitauli, ma e fa'apena ona mataala ai ina ia va'ava'ai ma le masalosalo i mea uma lava, atonu e faia e lē o loo ē manatu o loo sese, ma faia ai loa se fausaga sese o fa'amatalaga i ana sini." – *The Review and Herald*, February 24, 1891.

“O loo a'oa'o manino mai lava le Tusi Paia, o tagata sese e tatau ona fautuaina ma le onosa'i ma manatunatuga lelei. Afai e mulimulita'ia le ala sa'o, o le loto lea e foliga mai e ma'a'a e mafai ona manumaloina mai ia Keriso. O le alofa o Iesu e ufitia ai agasala e tele. O lona alofa tunoa e lē ta'ita'ia atu ai lava i le fa'aalia o sese o se isi tagata se'ivagana o se mea e tatau ona fai.” – *Counsels to Parents, Teachers, and Students*, p. 267.

“‘Ia muamua i mea uma ona maua e outou o le alofa naunau o le tasi i le tasi' o le tusi lea a le aposetolo. (1 Peteru 4:8). Aua e te fa'alogi i ripoti e fa'aleaga ai se uso po'o se tuafafine. Ia ē matuā fa'aeteete lava i lou taliaina o se ripoti e fa'aleaga ai lou tuaoi. Fesili i lē o loo aumaia le tu'ua'iga po ua ia usita'i i le Upu a le Atua e fa'atatau i lenei mataupu. Ua tu'ua mai e Keriso fa'atonuga manino i le mea e tatau ona faia. Alu i lou uso ma ta'u atu ia te ia lona sese tau o ia lava ma oe. Aua le faia sou alofaga mai i lenei fa'atonuga, i lou fai mai, E leai sa'u faitioga i le va o a'u ma lē o loo tu'ua'ia. O tulafono ua tu'uina mai e Keriso e matuā ma'oti lava, e matuā manino lava, o lea, o lenei alofaga e lē tusa ma le tulafono.

“Pe i ai, pe leai fo'i sau faitioga i le va o oe ma lē ua tu'ua'iina, o loo tumau pea le fa'atonuga lava lea e tasi a Keriso. O lou uso o loo ia mana'omia le fesoasoani. Ta'u atu ia te ia, ae aua le ta'uina i se isi tagata, e fa'apea, o loo fa'ata'amiloaina solo ripoti e fa'atatau ia te ia. Tu'u atu ia te ia le avanoa na te fa'amanoina mai ai.” – *In Heavenly Places*, p. 292.

Aso Lulu

Iuni 12

4. O SE FUA AOGA O LE ALOFA

a. O le a le uiga lelei o le amio o loo fa'asino atu i ai Peteru o se fa'aailoga lelei lea, o le alofa o le Atua o loo nofo i totonu o le loto? 1 Peteru 4:9.

b. Aisea ua avea ai le uiga tali malō o se uiga sili ona tāua fa'akerisiano? Eperu 13:2; Roma 12:13.

“E o'o lava i le lotolotoi o i latou e ta'utino mai o i latou o kerisiano, e itiiti lava si uiga tali malō o loo fa'atinoina ai. I le lotolotoi o ō tatou lava tagata, o le avanoa o le fa'aailoaina mai o le agalelei, e lē o manatu i ai i le tulaga e tatau ona i ai, o se avanoa sili lea ona tāua ma o se fa'amanuiaga fo'i. O loo matuā itiiti lava le uiga fa'afeiloa'i atu i isi, matuā itiiti lava le naunauta'iga ina ia faia se avanoa mo le to'a lua pe to'a tolu fo'i i le laulau 'ai a le aiga, e aunoa ma le fa'alumaina ai po'o le fa'alialia ai fo'i. O nisi latou te aioi mai e fa'apea, 'e faigatā tele lea tulaga.' . . .

“E lē o fialia le finagalo o le Atua i le naunauta'iga fa'apito lea e masani lava ona fa'aalia mo 'a'u ma lo'u aiga.' O aiga ta'itasi uma lava e teufatuina lenei agaga, e

mana'omia ina ia liua e ala i tapula'a mamā ua fa'ata'ita'ia mai i le soifuaga o Keriso. O i latou e tapunia ese i latou i totonu ia i latou lava, o loo lē manana'o e tali leleia tagata asiasi mai, latou te lē maua le tele o fa'amanuiaga.” – *Testimonies for the Church*, vol. 6, pp. 343, 344.

Ou te iloa tagata e maualuga lava a latou ta'utinoga, o ō latou loto o lo o matuā punitia lava i le alofa o le tagata ia te ia lava ma le loto fa'apito. . . . O ō latou olaga atoa lava o loo latou manatunatu ai ma ola mo na o i latou lava. O le fa'asatauroina o i latou lava ina ia faia ai se mea lelei mo isi, o le fa'amativaina o i latou ina ia fesoasoani ai i isi, e lē fa'atagaina lea e i latou. . . . O i latou lava o lo latou tupua lea. O vaiaso tāua lava, masina, ma tausaga o loo mavae atu e fa'avavau, peita'i e leai ni o latou fa'amaumauga i le lagi o ni galuega agalelei, o le fa'asatauroina mo le lelei o isi, o le fafagaina o ē fia 'aai, fa'aofuina o ē e lē lavalava, poo le aumaia fo'i o tagata ese i totonu o ō latou fale.” – *Ibid.*, vol. 2, p. 26.

c. O le a le “uiga tali malō” sese, o loo fa'atinoina e le to'atele o aiga kerisiano? Iopu 1:4; 2 Tupu 20:13-15.

“O le fa'afitia o Keriso le faia o sauniuniga mo tagata asiasi mai e mana'omia ai le taimi lea e patino tonu lava i le Atua. . . .

“O popolega ma avega lē mana'omia, ua foafoaina e le fa'anaunauga ina ia faia se fa'alialiaga i le taliina o malō. O le auala e saunia ai se vaega eseese tele lava o meaai mo le laulau, ua ova ai le galue a le avā; talu ai ona o le tele o meaai eseese ua saunia, ua so'ona a'ai ai mālō; ma o fa'ama'i ma mafatiaga, o i'uga ia mai i le so'ona galue ma le so'ona a'ai.” – *Ibid.*, vol. 6, p. 343.

Aso Tofi

Iuni 13

5. AUAUNAGA MONI FA'AKERISIANO

a. Ta'u mai se vaega e tasi o loo fa'aalia ai le alofa i le olaga o se kerisiano moni. 1 Peteru 4:10.

“Ua filifilia mai e le Atua ia i tagata ta'ito'atasi uma lava lana galuega e tusa ai ma le mea e mafai ona ia faia. O le a'oa'oga ma fa'atinoga e tatau ona agava'a ai tagata ina ia fetai'a'i ma so'o se mana'oga fa'afuase'i lava e ono tula'i mai; ma o fuafuaga potu e mana'omia, ina ia tu'uina ai tagata ta'itasi uma i lona tulaga fetai'i, ina ia mafai ona ia maua ai se iloa o le a saunia ai o ia na te tauaveina matafaioi.” – *Testimonies for the Church*, vol. 9, pp. 221, 222.

“O talavou e fa'apitoa ai lava, e tatau ona latou lagona, e tatau ona latou koleniina o latou mafaufau, ma fa'aaoga avanoa ta'itasi uma lava ina ia a'oa'oina i latou ia latou atamamai, ina ia mafai ai ona latou tu'uina atu auaunaga e taliaina e Ia, o Lē na foa'iina mai Lona soifua lē mafuatia mo i latou. . . . Ia fa'aleleia atili e i latou uma lava avanoa ia e alofagia ai o ia i le ta'ita'iga a le Atua, ina 'ia ia maua le iloa uma lava e mafai ona maua i fa'aaliga po'o a'oa'oga fo'i. . . .

“O taleni ta’itasi uma ua foa’iina mai i tagata, e tatau ona fa’aaogaina ina ia fa’atupula’ia ai lona tau, ma o le vaega uma la lea ua fa’aleleia atili, e tatau ona toe fa’afo’i atu i le Atua. Afai e leaga ou uiga, lou leo, o lau a’oa’oga, e te lē mana’omia e te nofonofono ai pea i lenei tulaga. E tatau ona ē taumafai i taimi uma lava ina ia ē ausia se tapula’a e sili atu ona maualuga, i a’oa’oga ma le iloa fa’aletapua’iga fo’i. . . . E lē foa’i mai e le Atua se auala e mafai ai ona maua e so’o se tagata se alofaga mo lona faia o galuega fa’atalalē lē fa’atulagaina lelei; peita’i o le tele lava o lenei ituaiga galuega, o loo ofoina atu ia te Ia e i latou o loo galulue i Lana galuega, peita’i e lē taliaina e Ia.” – *Fundamentals of Christian Education*, pp. 213-215.

b. O le a le sini e tasi lava e tatau ona i ai mo a tatou auauunaga uma lava? 1 Peteru 4:11. Kolose 3:23.

Aso Faraile

Iuni 14

FESILI TOE FA’AMANATU

- 1. O le a le eseeseega i le va o le alofa fa’alelagi ma le “alofa” fa’alelalolagi?**
- 2. O le a le tapula’a o loo ta’oto i le fa’avae o le alofa fa’akerisiano?**
- 3. E fa’aapefea ona mafai ona ou fausiaina a’e masaniga sili atu ona lelei o le uiga tali mālō?**
- 4. O a ituaiga auauunaga fa’akerisiano o le a lelei mo a’u ona ou fausiaina a’e?**
- 5. E fa’aapefea ona mafai ona ou fa’amautinoaina o la’u galuega e mo le Atua, ae lē o le faia ma le fa’atalalē lē fa’atulagaina lelei?**

Lesona 12

Sapati, Iuni 22, 2024

O Se Olega i Ta’ita’i o Ekalesia

MAU TAULOTO: “O le mea lea ia fa’amaulalo ai outou i lalo o le aao malosi o le Atua, ina ia fa’amaualugaina outou e Ia i ona po e tatau ai” (1 Peteru 5:6).

“O tane ua tula’i e avea ma sui, e lē o i latou uma o ni tane kerisiano fa’aaloalo. O loo matuā ta’atele lava le agaga o loo sa’ili mo le pule i luga o isi tagata.” – *Testimonies to Ministers*, p. 260.

Faitauga Fautuaina: *Testimonies to Ministers*, pp. 347-359.

Ulua’i Aso

Iuni 16

1. O SE ILOA E MANA’OMIA E TA’ITA’I TA’ITASI

a. O anafea na avea ai le aposetolo o Peteru o se leoleo mamoe moni, ua sauni e leoleo mo agaga o isi? Mataio 26:75; Ioane 21:15-17; 1 Peteru 5:1

“Na fa’afitia e Peteru le Tagata o le fa’anoanoa. . . . Peita’i na ia salamō mulimuli ane ma na ia toe liua. Sa moni le loto momomo o lona agaga ma na ia toe tu’uina atu o ia i se tulaga fa’afouina i lona Fa’aola. . . . Na ia sauni loa i le taimi lena e alofa mutimutivale i le tagata fa’aosoosoina. Na fa’alotomaulaloina o ia, ma na mafai ona ia iloa lagona o tagata vaivai ma le sese. Na mafai ona ia fautua ma lapata’i i le tagata fa’afefeteina, ma na saunia atoa lava o ia e fa’amalosi i lona au uso.” – *Testimonies for the Church*, vol. 3, p. 416.

b. E fa’apena fo’i, o le a le iloa ma le olaga e tatau ona maua e leoleo mamoe uma ma ta’ita’i uma lava o ekalesia i le taimi lenei? Ioane 3:1-3.

“O Nikotemo na liua ona o le i’uga o lenei talanoaga. O upu a Keriso o loo fetalaiia moni mai lava i peresitene o koneferenisi, toea’i’ina o ekalesia, ma i latou o loo i tofiga aloa’ia i a tatou fa’alapotopotoga fa’aletapua’iga, ‘E moni, e moni, Ou te fai atu ia te oe, Se’ivagana ua toe fanaufouina le tagata, e lē mafai ona va’ai o ia i le malō o le Atua.’” – *Testimonies to Ministers*, p. 369.

“O le mana liua o le Atua e tatau ona o’o mai i luga o loto o faifeau, afai e leai, e tatau ona latou sa’ilia se isi a latou galuega. . . .

“Se’iloga e avea faifeau ma tane liua, o le a mama’i fo’i ekalesia ma sauni e feoti.” – *Evangelism*, p. 643.

Aso Gafua

Iuni 17

2. APOAPOA’I MA LE PULE

a. O le a se mea e tatau ona manatunatu i ai le ekalesia a’o ia le’i filifilia se tagata i auaunaga, a’o le a fo’i le mea e tatau ona faia e le tagata a’o ia le’i taliaina le vala’au? 1 Peteru 5:2 (vaega muamua).

“Ua fa’ailoa so’o mai e le Atua, e lē tatau ona lagolagoina tagata e o atu e galulue i laufanua o matagaluega e aunoa ma le fa’amaoniga-e-lē-mafai-ona-sese e iloa ai, ua Ia vala’auina i latou. O le a lē tu’uina atu e le Atua le avega mo Lana lafu i tagata ta’itasi e lē agava’a. O i latou e vala’auina e le Atua, e tatau ona avea o ni tane e matuā loloto lo latou iloa, ua tofotofoina ma ua fa’amaonia, o i latou o tane o filifiliga tonu, o tane o le a lē fefefe e a’oa’i le agasala i le agaga o le loto maulalo, o tane e malamalama i le auala e fafaga ai le lafu.” – *Testimonies for the Church*, vol. 1, p. 209.

“O tagata ta’itasi uma lava e taliaina matafaioi e avea ai o ia o se fautua, o tagata ta’itasi uma lava o loo fautuaina tagata . . . o le a lē sili a’e lava lona poto se’ivagana ua matuā itiiti lava o ia i lana lava fua. . . . O lenei suiga e tatau ona tupu i totonu o tane ta’itasi uma lava, a’o ia le’i taliaina se tofiga e avea ai o ia o se ta’ita’i po’o se pule fo’i i le feso’ota’i atu i le galuega paia a le Atua.” – *Testimonies to Ministers*, pp. 370, 371.

b. O le a le lamatiaga na lapata’ia ai e Peteru i latou o loo galulue i totonu o le tovine a le Atua? 1 Peteru 5:2 (vaega lona lua).

“O le naunauta’iga ina ia pu’e mai totogi tetele, fa’atasi ai ma le finafinauga ina ia aveesea mai i isi a latou aiā na foa’i mai i le Atua, o loo i ai lona amataga i totonu o le mafaufau o Satani. . . . E itiiti lava se fa’atuatuga e mafai ona tu’uina i luga o i latou ua maileia i lenei mailei, se’ivagana ua latou liua mae’ae’a ma toe fuata’iina.” – Ibid., p. 393.

“O tane o loo i tofiga fa’amoemoeina, e tatau ona latou manatu i tupe ma meatotino o loo latou taulimaina, o mea ia a le Atua, ma e tatau ona fa’aaoga i se uiga fuafua lelei ma le fa’autauta, e aunoa ma se ma’imau

“O le pule e fa’aaoga ma fa’aalu ai tupe a le Atua, e lē tatau ona tu’ua atu i le filifiliga a so’o se tagata e to’atasi. E tatau ona aumai le tala o le tupe mo talā ta’itasi uma e fa’aaluina. O meatotino a le Atua e tatau ona fa’aaoga i taimi fetau ma nofoaga sa’o.” – *Medical Ministry*, p. 165.

c. E ui lava o le galuega mo le Atua e lē o se galuega e telē lona totogi, o a manatunatuga e tatau ona faia e le ekalesia? 1 Timoteo 5:17, 18.

“O tagata faigaluega uma i totonu o a tatou ekalesia, e tatau ona fetau le tau na te maua. Afai e fetau totogi e maua e le au faigaluega, latou te maua fo’i le loto fa’amalieina e foa’i ai tupe i le galuega. E lē sa’o le mauaina e nisi o se totogi telē lava, a’o isi, o ē o loo faia galuega tatau, tāua, ma o loo faia ma le fa’amaoni, e itiiti lava totogi o loo latou mauaina.” – *The Publishing Ministry*, p. 239.

Aso Lua

Iuni 18

3. O SE UIGA SILI ATU ONA LOTO MAULALO O LOO MANA’OMIA

a. O le a le mafua’aga autu o fa’afitauli i le lotolotoi o le au uso o loo i tofiga o matafaioi tāua? 1 Peteru 5:3; 3 Ioane 9.

“O le agaga o le fia pule ua o’o atu i peresitene o a tatou koneferenisi. Afai o loo mautinoa e se tagata ona lava malosi, ma sa’ili ai e fa’atino lana pule i luga o lona au uso, ma ia manatu ai fa’apea, ua tu’uina atu ia te ia le pule na te faia ai lona manatu ma malosi e pule, e tasi lava le auala, ma e na o le pau lava lea o le auala saogalemu, o le aveesea lea o ia, ne’i tele le manu’a e faia ma fano ai lona lava agaga ma lamatia ai fo’i agaga o isi.” – *Testimonies to Ministers*, p. 362.

b. O le a le olega ua tu’uina mai i ta’ita’i ma toea’ina uma lava o ekalesia (local), lea afai e mulimulita’ia, o le a taofia ai le fa’amaualuga ma se agaga o le fa’atāuina e le tagata o ia lava i le lotolotoi o le au uso o loo i tofiga sili atu ona maualuluga? 1 Peteru 5:2 (vaega muamua); 1 Korinito 6:2-5.

“Ua fa’ailoaina mai ia te a’u, o se mea sese le manatu fa’apea, o tane i tofiga o matafaioi fa’apitoa lava i Battle Creek, o loo ia i latou le poto e matuā sili atu ona maoa’e nai lo le poto o tagata lautele. . . .

“E to’atele ua latou a’oa’oina i latou ina ia tusi pe fesili mai fo’i mo fautuaga, pe a aumaia i latou i nofoaga faigata. Peita’i o se mea sese mo i latou ua tu’uina i tofiga o

matafaioi i a tatou ekalesia eseese, lo latou fa'alagolago i tane. . . . O se iloa vaivai, ma ma'i, o le a avea lea ma tofi o i latou e a'oa'oina ina ia fa'alagolago atoatoa i isi. . . .

“E tatau ea ona manatu i tane o lo o i Battle Creek e fa'apea, e lē mafuatia lo latou poto?” – Ibid., pp. 374, 375.

“Aua tou te va'ava'ai i tane o loo i tofiga mauualuga o matafaioi, mo le malosi, auā o tane tonu lava ia o loo lamatia i le manatu e fa'atatau i se tofiga o matafaioi e fa'apea, o se fa'amaoniga lea o le mana fa'apitoa o le Atua. O a tatou ekalesia, o loo vaivai auā o tagatā ekalesia, ua a'oa'oina ina ia va'ava'ai atu, ma fa'alagolago atu i le au faigaluega fa'aletagata, ma e afe ma afe o talā ua fa'aaluina lē aogā, i le fela'ua'iina solo o tane e i ai le gata'aga o ō latou ola, mai i le tasi nofoaga aga'i atu i le isi nofoaga, ina ia latou fofōina fa'afitāuli laiti.” – Ibid., p. 380.

c. O le a se mea o le a mafai ai e le au faigaluega e itiiti lo latou iloa, ona latou maua se malamalama'aga sili atu ona tele mo le fa'amanuiaina? Aumai se fa'ata'ita'iga o le mafua'aga o le to'ilalo ona o le lē maua o lenei malamalama'aga. 1 Peteru 5:5 (vaega muamua); 1 Tupu 12:6-8, 16; Luka 6:39.

“O talavou e mafai ona latou tu'uina atu se a'afiaga malosi lava pe afai o le a latou lafoa'ia lo latou fa'amaualuga ma lo latou loto fa'apito, ma tu'u atu atoatoa i latou i le Atua.” – *Testimonies for the Church*, vol. 1, p. 485.

“Ia fausiaina a'e e talavou se uiga e mafai ona a'oa'oina, ina ia mafai ona fa'amanuiaina i latou i taumafaiga a i latou o loo sa'ili e fesoasoani ia i latou.” – *The Youth's Instructor*, August 31, 1893.

Aso Lulu

Iuni 19

4. O LE FA'ATA'ITA'IGA A PETERU O LE LOTO MAULALO

a. E fa'apefea ona tatou iloa o se liuaga moni e tasi po'o se iloa moni fo'i e tasi i le Ali'i, e lē lava lea mo se leoleo mamoe – po'o so'o se tagata talitonu lava? 2 Korinito 13:5; Eperu 3:13.

“Ina ua asiasi atu Peteru i Anetioka, i se taimi mulimuli ane, na ia mauaina le fa'atuatuaga o le to'atele e ala i lana amio fa'autauta aga'i i tagata liua o nu'u ese. Mo sina taimi na ia gai oi e tusa ai ma le malamalama na tu'uina mai i le lagi. E o'o mai i le taimi lea, na ia fa'ato'ilaloina ai lona fa'ailoga tagata fa'alenua e fa'apei o lona nofo fa'atasi i laulau ma tagata liua mai o nu'u ese. Peitai ina ua o mai nai i Ierusalem ni tagata Iutaia o ē sa vilivilita'i mo le tulafono fa'asauniga, na suia ai e Peteru ona uiga i se filifiliga lē poto ma le lē fa'autauta agai i tagata na liua mai i tapua'iga fa'apaupau. . . . O lenei fa'aaliga o le vaivai e i latou na fa'aaloogia ma alofagia e avea ma ta'ita'i, na tu'ua ai se ata sili ona tigā i mafaufau o tagata talitonu o nu'u ese. Na lamatia le ekalesia i fevaevaea'iga.” – *The Acts of the Apostles*, pp. 197, 198.

b. A aumaia e se sese poo se amio a se faifeau, tagata faigaluega o le Tusi Paia, poo se ta'ita'i fo'i o le ekalesia, le ita fa'aaliali poo le nunumi fo'i i totonu o le ekalesia, e fa'apefea ona tatau ona a'oa'iina i latou? Kalatia 2:14; 1 Timoteo 5:20.

c. O a uiga e tatau ona uiga a'i se ta'ita'i ua liua, pe a a'oa'iina fa'aaliali o ia? 1 Peteru 5:5 (vaega lona lua), 6; Iakopo 5:16.

“O Paulo, o lona iloaina o le a'afiaga e lamatia ai, o le sese ua faia i le ekalesia e ala i gaioiga e lua na fa'atinoina e Peteru, o lea na ia a'oa'iina fa'aaliali ai o ia mo lona natiaina fa'apena o ona manatu moni. I luma o le ekalesia, na fesiligia ai Peteru e Paulo. . . .

“Na iloa e Peteru le sese na ia pa'u atu i ai, ma faia loa i le taimi lava lena le fa'asa'oina o le sesē ua faia, i le malosi na ia mafai ai. O le Atua, o Lē na te silafia le i'uga mai i le amataga, na Ia fa'atagaina Peteru na te fa'aalia lenei vaivaiga o le amio, ina ia iloa ai e le aposetolo tofotofoina, e lē'i i ai lava se mea i totonu ia te ia lava na mafai ona ia gugutu ai. E o'o lava i tane e sili ona lelei, a tu'ua i latou ia i latou lava, o le a latou sese i filifiliga. . . .

“O le tala'aga o lenei liliu ese mai i tapula'a sa'o, o loo tula'i e avea o se lapata'iga mata'utia i tane o loo i tofiga fa'amoemoeina i le galuega a le Atua. . . . O le sili atu o le telē o matafaioi e tu'uina i luga o le mea faigaluega fa'aletagata, ma o le sili atu o le telē o ona avanoa e fa'atonu atu ai ma pulea, o le sili atu fo'i lena o le manu'a e mautinoa lava o le a ia faia.” – Ibid., pp. 198, 199.

Aso Tofi

Iuni 20

5. FA'AMALOSIGA MO LE AUFAIGALUEGA VAIVAI

a. O le a se mea e masani ona avea ma mafua'aga o le fa'avaivai i le olaga o se tagata faigaluega o le tala lelei? 1 Peteru 5:5 (vaega mulimuli).

“O loo matuā tele lava a tatou faifeau ma'ale'ale e matuā vaivai lava lo latou iloa, e lē o ia i latou alofa tunoa fa'akerisiano, e lē o ia i latou le loto tu'u atu atoatoa i le Atua, ma e faigofie lava ona fa'avaivai. . . . O tane o loo mana'omia i le galuega lenei, o tane ia o le a lē muimui pe faitio fo'i i faigatā poo tofotofoga fo'i, mā latou te iloa o se vaega lea o le tofi ua tu'ua mai e Iesu ia i latou. E tatau ona latou naunau e o atu i fafo atu o le to'agalauapi ma puapuagatia ai i faitioga ma tauaveina avega e fa'apei o fitafita lelei a Keriso.” – *Testimonies for the Church*, vol. 3, p. 423.

b. A taumafai Satani e fa'avaivaia so'o se tasi o i tatou e ala i lona fa'ailoa mai o fa'afitauli i totonu o le ekalesia, o le a le folafolaga e tatau ona tatou pipi'i atu i ai? 1 Peteru 5:4, 7.

“Aua ne'i tatou fa'atagaina se mea e tasi lava e taofia mai ai i tatou mai i lo tatou ofoina atu o ō tatou mana'oga i le suafa o Iesu, ma tatou talitonu ai ma le fa'atuatua mausali, ua fa'afofoga mai le Atua ia i tatou, ma o le a Ia tali mai ia i tatou. Ia tatou aveina atu o tatou fa'afitauli i le Atua, ma tatou fa'amaulaloina i tatou lava i Ona luma. O loo i ai

le galuega tele lava e tatau ona faia; ma a’o ia i tatou le avanoa sili ona taua tatou te fefautuaa’i ai, e tatau ona tatou matuā mautinoa, i mataupu ta’itasi uma lava, ina ia tatou fautua fa’atasi ma le Atua, auā o le a Ia lē ta’ita’iseseina lava i tatou. E lē tatau ona tatou faia le tagata ma o tatou malosi. Afai tatou te faia fa’apena, . . . o le lē talitonu o le a sau fa’alilolilo i totonu, ma o le a oti ai loa lo tatou fa’atuatua.” – *Testimonies to Ministers*, p. 487.

“O le agaga o le leoleo mamoe moni, o le agaga lea o le fa’agaloina e ia o ia lava. Ua galo ia te ia, ia lava ina ia mafai ai ona ia galuea’iina galuega a le Atua. . . . O le galulue fa’atasi ma le Atua silisiliese o Lē na te tauaveina avega, Na te tofusia ai i o latou puapuaga, ma Ia fa’amafanafanaina ai o latou fa’anoanoaga, ma fa’amalie o latou agaga fia ‘aai, ma manumaloina mai o latou loto i le Atua.” – *The Acts of the Apostles*, p. 527.

Aso Faraile

Iuni 21

FESILI TOE FA’AMANATU

1. **O anafea le taimi mulimuli na ou tagi ai i o’u tulivae i aao o Iesu?**
2. **Ou te manatu ea i nisi o taimi e fa’apea, afai ou te maua se tofiga sili atu ona maualuga, ona mafai lea ona ou faia mea e sili atu mo le Ali’i”**
3. **Aisea e lē tatau ai ona ulufale mai i lo’u mafaufau, le sini mo se tofiga e sili atu ona maualuga i totonu o le ekalesia?**
4. **O le a lo’u uiga aga’i ia i latou e fa’ailoaina mai o’u sese?**
5. **O ai ou te manatu e agasala mo o’u taimi ou te fa’avaivai ai?**

Lesona 13

Sapati, Iuni 29, 2024

Ia Outou Fa’autauta, Ia Outou Mataala

MAU TAULOTO: “Ia outou fa’autauta, ia outou matāala; ona o lē ua fai outou mona fili o le ti’apolo lea, o loo fealualua’i o ia e pei o se leona tagi, e sa’ili se tasi e aina e ia” (1 Peteru 5:8).

“Na amata mai lava i aso o Atamu e o’o mai lava i o tatou taimi, o lo tatou fili tele lava o loo ia fa’aaogaina lona malosi e fa’apologa ma fa’aumatia ai.” – *The Great Controversy*, p. 510.

Faitauga Fautuaina: *Selected Messages*, bk. 1, pp. 126, 127;
The Great Controversy, pp. 39-48.

Ulua’i Aso

Iuni 23

1. **ILOAINA O UIGA O UPU NA IA TAUTALA E FA’ATATAU I AI**

a. O le a se apoapoa'iga tāua lava na tusia e Peteru i le i'uga o lana ulua'i tusi? 1 Peteru 5:8.

“O loo galue Satani i taimi uma lava, peita'i e itiiti lava tagata o loo latou iloa e fa'atatau i ana gaioiga ma ana galuega fa'alilolilo. O tagata o le Atua e tatau ona latou sauni e te'ena le fili taufa'asese. . . . O la'asaga o Satani e lē fa'alogoina sona leo, o ana gaioiga e fai fa'alilolilo ma le fa'autauta, o ana taua fo'i na te natia ona lagona ma ona uiga moni. Na te lē taumafai e fa'ailoa fa'aaliali mai o ia, ne'i ia fa'aosofiaina malosi o loo moe o le kerisiano, ma auina ese atu ai o ia i le Atua i le tatalo. . . .

“O le tagata o le pagota lea a Satani ma na te naunau lava fa'alenua e mulimuli i ana fa'aosoosoga ma faia mea na te fa'atonu mai. E leai se malosi i totonu ia te ia e tete'e manumalo atu ai i le leaga. . . . E na oi totonu lava ia Keriso e taofia ai le mana o Satani.” – *Testimonies for the Church*, vol. 5, pp. 293, 294.

b. O le a le mea na iloa mulimuli ane e Peteru o le mea lilo lea na semanu e fesoasoani ai ia te ia e manumalo ai i totonu o le maota o Kaiafa i le fa'amasinoga o Iesu? Mataio 26:38,40, 41.

“O le talitonuga o le tagata ia te ia lava, e ta'ita'ia atu ai i le fa'atalalē i le mataala ma le tatalo agamalū ma le salamo. O loo i ai fa'aosoosoga i fafo e tatau ona inoino i ai, o loo i ai fo'i fili i totonu ma le nunumi lē malamalama e tatau ona manumalo mai ai, auā e fa'atatau e Satani ana fa'aosoosoga i amioga ma uiga eseese o tagata ta'ito'atasi.” – *Ibid.*, vol. 3, p. 445.

Aso Gafua

Iuni 24

2. IA Ē ILOA PO'O AI LOU FILI

a. E ese mai i lona sau i uiga o se leona, ta'u mai se isi auala e masani lava ona fa'alatalata mai ai le fili o ō tatou agaga ia i latou na te sa'ili e fa'aumatia. 2 Korinito 11:14.

“O Satani o loo ia sa'ili i taimi uma lava mo le fa'afanoga o i latou e lē o iloaina ana faufauga, ae latou te lē lagonaina so latou mana'oga fa'apitoa mo tatalo ma fautuaga a uo ua lava lo latou iloa ma amio atua. O le tele o talavou e o mai i _____ ma filifiliga lelei ina ia ola i olaga kerisiano, latou te goto ifo fa'atasi ma se vasega o talavou laiti o ē e ta'ita'iina i latou i o latou lima ma, i lalo o le ufiufi o uiga fa'auō, latou te ta'ita'ia tu'usa'o atu ai lava i latou i totonu o le mailei a Satani. O le fili e lē sau i taimi uma e fa'apei o se leona tagi; ae masani lava ona ia fa'aali mai e fa'apei o se agelu o le malamalama, ma fa'afoliga mai i uiga fia sili loto vi'i nai lo lona natura moni, ma tu'u mai fa'aosoosoga uiga ese ia e faigatā ona te'ena e tagata e lē lava lo latou iloa i le olaga fa'aleagaga.” – *Testimonies for the Church*, vol. 4, p. 207.

b. O a auala aga'i atu i le agaga o loo sili ona maua ai e Satani le manumalo, aemaise ai lava i lenei augatupulaga o telefoni ma le initaneti ua toeitiiti a so'o atoa ai le lalolagi? 1 Peteru 2:11; 1 Ioane 2:16.

“O le to'atele o fanau . . . latou te faitauina mea uma lava latou te mauaina. O tala fa'aoso lagona o le alofa ma ata eleelea, e i ai lo latou a'afiaga e fa'aleagaina ai. O tala fatu, o loo faitauina ma le naunau e le to'atele, ma, o lona i'uga, ua fa'aleagaina ai o latou manatunatuga. . . . O ata o tama'itai o loo telenoa o loo masani lava ona fa'asalalau solo [aemaise ai lava i luga o le initaneti]. . . . O le tu'inanau o mata ma lagona leaga ua osofia a'e, ona o le va'ava'ai ma le faitau i ai. Ua fa'aleagaina le loto ona o manatunatuga. Ua fiafia le mafaufau i le manatunatu i va'aiga ia e fafaguina ai lagona maulalo ma sili ifo ona leaga. O nei ata leaga matagā, a matamata i ai e ala atu i manatunatuga ua fa'aleagaina, e fa'aleagaina ai amioga ma saunia ai tagata ua fa'aseseina ma fa'avaleaina, ina ia tu'usa'oloto atu le fa'atagaga lē fa'atapula'aina, i tu'inauga leaga. Ona soso'o mai ai lea o agasala ma soligatulafono, e toso atu ai tagata na foafoaina i le fa'atusa o le Atua, i lalo i se tapula'a e tutusa ma manu, ma fa'agoto mulimuli ifo ai lava i latou i le fa'afanoga. Aua ne'i faitauina ma aua fo'i ne'i va'ai i mea o le a aumaua ai manatunatuga leaga. Ia fausiaina a'e malosi o le amio ma le mafaufau. . . .

“Ou te ole atu i matua ina ia latou fa'atapula'aina mea e faitau [ma va'ava'ai i ai i le initaneti] a latou fanau.” – Ibid., vol. 2, p. 410. [O Upu o loo puipuiina sa fa'aopoopoina]

E ala atu i le tu'inanau leaga i le 'ai, e pulea ai e Satani le mafaufau ma le tagata atoa lava.” – *Christian Temperance and Bible Hygiene*, p. 37.

“O le tele o tina kerisiano, o la latou fa'ata'ita'iga ma la latou a'oa'oga o loo latou tu'uina atu i a latou fanau, o loo saunia ai i latou ina ia avea ma tagata ua tu'uina atu i le so'ona 'a'ai ma le so'ona inu uaina. O fanau o loo masani lava ona fa'atagaina e tu'inanau i le 'aina o mea latou te filifilia, ma taimi uma latou te filifili e a'ai ai, e aunoa ma le manatu i le ola maloloina.” – *Counsels on Diet and Foods*, p. 235.

Aso Lua

Iuni 25

3. O LE AUALA E TASI I LE MANUMALO

a. O le a le mea e tatau ona maua e kerisiano ta'itasi ina ia mafai ai ona tete'e atu ia Satani? 1 Peteru 5:9 (vaega muamua); Iakopo 4:7.

“[O Eva] e lē'i talitonu i upu a le Atua, ma o le mafua'aga lenei na ta'ita'ia atu ai i lona pa'ū. I le fa'amasinoga, o le a lē fa'asalaina tagata ona o lo latou talitonu ma le fa'amaoni i se pepelo, peita'i, o le a fa'asalaina i latou ona latou te lē'i talitonu i le upu moni, auā na latou fa'atalalē i le avanoa latou te su'esu'eina ai, poo le a le upu moni.” – *Patriarchs and Prophets*, p. 55.

“Afai o loo ia i latou nā o se fa'amatalaga aloa'ia o tapula'a o loo fa'avae ai se mataupu o su'esu'ega, o se fa'atuatua papa'u e lē mafai ona latou fa'amatalaina, o se fa'aosoosoga fa'afuase'i o le a afua ai ona latou tafetafea ese atu i le galu o loo alu atu aga'i i le lalolagi.” – *Our High Calling*, p. 332.

b. O le a se mea o loo faia ai le tele o kerisiano o ni tagata e faigofie ona tu'uina atu mo Satani, e ui lava ina latou fai mai latou te talitonu i le Upu a le Atua? Fa'ata'oto 19:2; Hosea 4:6 (vaega muamua); fa'atusatusa i le Roma 10:17; 15:4.

“O fa'aosoosoga, e masani lava ona foliga mai e lē mafai ona te'ena talu ai ona, e ala atu i le fa'atalalē i le tatalo ma le su'esu'eina o le Tusi Paia, e lē mafai ai e lē ua fa'aosoosoina ona manatua vave folafolaga a le Atua ma te'ena ai Satani i a'upega a le Tusi Paia.” – *The Great Controversy*, p. 600.

c. O le a le upu moni e tatau ona avea ma fa'amalosi'au mo tagata ta'itasi uma lava ua si'omia e osofa'iga a Satani? 1 Peteru 5:9, 10; 1:6, 7; 2 Korinito 4:17.

“Na tusi atu Peteru i le au uso talitonu i se taimi o tofotofoga uiga ese i le ekalesia. E to'atele na leva ona tofusia i puapuaga o Keriso. . . . ma e le'i toe umi ae ulufale atu loa luko i totonu, mā latou te lē'i fa'asaoina le lafu. Peita'i, e leai ma se tasi o nei mea na mafai ona aumaia ai le fa'avaivai ia i latou ua taula'i atu lo latou fa'amoemoe ia Keriso. O upu fa'aloto tele ma le fa'amalosi'au, na taula'i ese atu ai e Peteru mafaufau o i latou na talitonu, mai i tofotofoga o le taimi lea . . . ‘aga'i atu i se tofi e lē pala lava . . . ‘Na ia ole atu ma le finafinau, ‘O le Atua o le alofa tunoa uma lava, o Lē ua vala'auina i tatou i Lona mamalu e fa'avavau e ala mai ia Keriso Iesu, pe a uma ona outou puapuagatia mo sina taimi, o le a Ia fa'aatoatoaina outou, fa'amausalīina, fa'amalosi'ia, ma fa'atumauina.’” – *The Acts of the Apostles*, p. 528.

Aso Lulu

Iuni 26

4. O LE EKALESIA I TOTONU O PAPELONIA

a. O a mea na tutupu i le tala'aga o loo fa'atusatusa atu i ai e Peteru le ekalesia kerisiano o loo salalau solo i “Papelonia” ma o loo fa'apologaina e pule fa'alelalolagi? Tanielu 3:1-6; Eseta 3:8; 1 Peteru 5:13.

“I se laueleele na matuā ta'atele ai le ifo i tupua, o le fa'atusa matagofie ma le taugatā i le laueleele laugatasi o Turu, lea sa fa'atusa mai ai le mamalu o Papelonia, . . . na tatau ona fa'apaiaina e avea o se autu o tapua'iga. . . . Na tu'uina atu ai se poloa'iga e fa'apea, a o'o i le aso o le fa'apaiaina o lea fa'atusa, o tagata uma e tatau ona latou fa'ailoaina lo latou fa'amaoni silisili i le puleaga a Papelonia, e ala i lo latou ifo i luma o le fa'atusa. . . .

“I lena aso tāua, o pule o le pouliuli na foliga mai na latou maua se fa'ailo o le manumalo. . . .

“Peita'i, na ese le poloa'iga a le Atua. E lē o tagata uma na to'otuli o latou tulivae i le fa'ailoga ifo i tupua o le malosia fa'aletagata. . . .

“O le fa'asino atu o [le tupu] i le ogaumu mumū, na ia fa'amanatuina ai ia i latou e fa'atatau i le fa'asalaga o loo fa'atali mai, ia i latou pe afai o le a latou fa'aauau pea lo latou mumusu e usita'i i lana poloa'iga. Peita'i na molimau mausalī talavou Eperu i lo latou usita'i fa'amaoni i le Atua o le lagi.” – *Prophets and Kings*, pp. 505-507.

“O le poloa’iga lea o le a tu’uina atu mulimuli lava e tete’e ai i tagata totoe o le Atua, o le a tutusa lelei lava ma le poloa’iga lea sa tu’uina atu e Asueru e tete’e ai i tagata Iutaia. O le aso lenei, o fili o le ekalesia moni, latou te va’aia ai i le tama’i vaega o tagata o lo o tausia le poloa’iga o le Sapati, se Moretekai i le faitoto’a. O le ava o tagata o le Atua mo Lana tulafono, o se a’oa’iga lea i taimi uma lava ia i latou ua lafoa’ia le mata’u i le Atua ma o loo latou soli i Lona Sapati.

“O le a fa’aosofia e Satani le ita i le tama’i vaega o tagata ia e mumusu e talia tu ma aganu’u lauiloa.” – *Ibid.*, p. 605.

“O pule o le lalolagi ma seoli na latou fa’apotopotoina fa’atasi i latou e tete’e atu ia Keriso i le tino o Ona so’o. O le talitonuga fa’apaupau na ia mua’i iloa, afai e manumalo le tala lelei, o ona malumalu ma fata faitaulaga o le a tafieseaa; o lea na ia fa’apotopotoina ai ana au ina ia fa’aumatia le fa’akerisiano.” – *The Great Controversy*, p. 39.

b. Aisea ua itiiti ai, pe leai fo’i ni sauāga i le tele o nofoaga i le taimi lenei? Ioane 15:19.

“E na o le agaga lava o le faia o maliega ma le agasala, talu ai ona o upu moni tetele o le Upu a le Atua ua matuā lē naunau lava i ai, talu ai ona ua matuā itiiti lava le amioatua matuā tāua lava i totonu o le ekalesia, o lea ua foliga mai ai ua matuā ta’uta’ua lava le ekalesia i le lalolagi. Ia toe fafagu mai le fa’atuatua ma le mana o le ulua’i ekalesia, ma o le a toe fafaguina mai fo’i le agaga o sauāga, ma o afi o sauāga o le a toe tutuina.” – *Ibid.*, p. 48.

Aso Tofi

Iuni 27

5. LESONA I LE I’UGA O LE TUSI

a. O ai na fesoasoani ia Peteru i le tusiaina o lana tusi? 1 Peteru 5:12.

b. E fa’apefea ona tatou iloa o Siluano o se misionare galue lea, ma sa galulue fa’atasi ma Peteru ma Paulo (o ia lea e foliga mai na fesoasoani ia i la’ua i le fa’aaogaina o upu o le gagana Eleni i le tusiaina o nisi o a la tusi)? 2 Korinito 1:19; 1 Tesalonia 1:1; 2 Tesalonia 1:1. Na fa’apefea ona tutusa lenei nei uiga ma le olaga o Ellen G. White?

“A’o ola la’u tane, na ia galue e fa’apei o se fesoasoani ma se fautua i le auina atu o feau na tu’uina mai ia te a’u. . . . O le fa’atonuga na ou maua i fa’aaliga na ou tusiaina ma le fa’amaoni. . . .

“Mulimuli ane, sa ma auiliiliina fa’atasi le mataupu, ma fa’asa’o ai e la’u tane vaega sa sese o le gagana ma aveesea ai upu ma fa’aupuga na tusia fa’alua. Ona kopiina lea ma le fa’aeteete mo tagata o loo lafo atu i ai, pe mo le masini lomi tusi fo’i. . . .

“Ina ua mavae le maliu o la’u tane, na fa’atasi mai ai ia te a’u tagata fesoasoani fa’amaoni, o ē na galulue ma le lē malolo i le galuega o le kopiina o molimau ma le sauniaina o tusitusiga mo le lomina ma le fa’asalalauina.

“Peita’i o ripoti o loo fa’asalalauina solo nei, e fa’apea, o so’o se tasi lava o a’u fesoasoani o loo fa’atagaina ina ia fa’aopoopo upu pe suia fo’i le uiga o feau ou te tusia, e lē moni lea.” – *Selected Messages*, bk. 1, p. 50.

c. O le a le masaniga lelei fa’akerisiano na fa’atuina e le au aposetolo ma e tatau pea ona fa’atinoina i le lotolotoi o le au talitonu o le taimi lenei? 1 Peteru 5:14.

“O le fa’afeiloa’iga paia . . . e tatau lava ona manatunatu i ai i lona uiga moni. *O se kisi paia*. E tatau ona manatu i ai o se fa’ailogaga lea o fa’atasiga i uo fa’akerisiano pe a fa’amavae, pe a toe feiloa’i fo’i, pe a mavae ni vaiaso po’o ni masina fo’i sa nofo eseese ai E lē mafai ona va’aia se foliga o le agasala pe a tu’uina atu le kisi paia i le taimi fetau ma le nofoaga sa’o.” – *Early Writings*, p. 117.

Aso Faraile

Iuni 28

FESILI TOE FA’AMANATU

1. E fa’apefea ona avea le fa’alagolago o le tagata ia te ia lava, o se uiga e masani lava ona mua’i o’o mai ae pa’ū atu loa i le fa’aosoosoga?
2. E fa’apefea ona mafai ona ou pa’ū atu i fa’asesēega a Satani ona o o’u lagona leaga ma tu’inanauga o le ‘ai?
3. Aisea o le a fesoasoani tele ai ia te a’u lo’u su’esu’eina so’o fa’apaiaina o le Tusi Paia?
4. Fa’amatala le paleni i le va o so’otaga lelei fa’alaua’itele ma filifiliga sese o maliega e faia ma le agasala?
5. O le a se mea e mafai ona ou faia e fesoasoani ai i le ekalesia i le aga’i i luma i le fa’asalalauina o le tala lelei?